

WANTOK

NIUSPEPA BILONG OL PAPUA NIUGINI STRET

44 pes


Namba 765

2 - 8 Mas, 1989

30 toea



• Pater Marai i kamap Bisop bilong Goroka - pes 18



• Ignatus Kilage i nupela gavana jeneral - pes 2

PNG - Indonesia stretim tok long nupela opis

INDONESIA gavman bai i no inap opim nupela Konsulate Opis long Vanimo inap gavman bilong Papua Niugini i tokaut stret olsem bai i no gat trabel i kamap.

Dispela toktok i kamap taim Foren Afeas Minista Michael Somare i tok PNG bai opim nupela opis bilong Konsulate long Jayapura, Indonesia.

Mausman bilong PNG long Indonesia Sebulon Kulu bai go long Jayapura long dispela wik long stretim wok bilong nupela opis.

Mista Somare i tok olsem ol opisa bilong em i bin toktok pinis wantaim lain Indonesia long kisim wanpela opis spes long Jayapura.

Dispela tupela opis i kamap bihain long tupela gavman i pasim toktok. Ol i bin wanbel aninit long wanpela kontrak bilong ol PNG PNG/Indonesia

Joint Boda agrimen.

Mista Somare i tok tingting bilong wokim dispela ol Konsul i bin kamap long JBC miting long Medan, Sumatra long Indonesia. Dispela em i namba 7 JBC miting na i kamap long Novemba 7 i go inap long Novemba 9, 1988.

Tingting bilong sanapim dispela tupela opis bai strongim gutpela wok namel long tupela kantri.

Foren Afeas Minista i tok PNG bai go het long wokim opis bilong em. Tasol Indonesia bai i no inap opim inap ol i toktok bilong sekjurit i orait.

Dispela tupela opis bai strongim ol wok namel long tupela kantri. Bikos insait long agrimen planti ol toktok bilong ol kain kain senis tu i bin kamap.

Ripot i kam long Vanimo i tok Provin-

sal primia bilong Wes Sepik, Egbert Yalu i bin raun long Jayapura. Em i go long mekim sampela wok aninit long agrimen bilong provins na gavman bilong Indonesia.

Mista Egbert Yalu i tok nau gavman bilong em i bin makim pinis hap graun insait long Vanimo taun long givim i go long ol Indonesia long wokim opis bilong ol.

Ol pipel sut long helikopta

WANPELA helikopta bilong Bougainvil Developmen Koperesen (BDC) i bin bagarap taim em i bin flai abrusim ples Kongara. Dispela i bin kamap taim ol sampela man i bin sutim long em long 1 Mas.

Dispela helikopta i bringim tupela senia skul inspekta na tu memba bilong Devo Ioro long Provinsal asem-bli Paul Dobitupa. Nem bilong tupela tisa ya em Joseph Rumbalis na Aaeon Peter.

Taim helikopta i lusim tupela skul inspekta long Kongara em i kam bek na harim pairap long bus. Em i no klia gut dispela em wanpela gan o nogat. Orait taim ol i lusim Takusida ol pasindia i sekim olsem helikopta i gat hul.

Ol plisman i go stap long dispela eria nau long mekim wok painimaut long dispela trabel. Ol bai go bek gen long mekim wok bilong ol long painimaut ol dispela trabel man.

Plis Komisina Paul Tohian i tok ol i go long pes 3



• Lukim moa poto na stori long Rugbi Lig Nius

• Falamen ripot - pes 2

• Oposisen i no putim vot - pes 2

• Timba kampani kisim tokorait - pes 5


• Primia Nombe laikim senis - pes 3

• Lukim PNG Helt Nius insait



• Gren fainal bilong ol meri-pes 26

Pinisim Laik Wantaim
Morobeen Cuptea Bisket



Morobeen

Biscuit Makers To PNG

COLOR USED

PLIS

Ripot



Mosbi

MOSBI - Long Sarere (Februari 25) plis i holim pasim wanpela man bihain long ol i painim em i karim wanpela gan. Dispela samting i kamap long Jeksens ples balus long Pot Mosbi.

Man ya Sarawin Aisa, krismas bilong em 28, na em bilong ples Kompiam insait long Enga Provins. Plis i sasim em long karim gan long pablik ples.

Sarawin i bin kisim kar long Hagen i kam long Goroka na i kam olgeta long Lae. Em i kisim balus long Lae na taim em i kamap long Mosbi nau ol plis i holim pasim em.

Mosbi - Ol 4-pela man i bin hensapim na bagarapim wanpela meri long Dogura nambis autsait long Pot Mosbi.

Plis i tok meri ya i bin kaikai wantaim pren bilong em insait long kar bilong ol i stap taim ol man ya i kam. Ol i pretim man bilong em long naip na ol i pulim meri ya i go long ol bus klostu na bagarapim em. Bihain nau ol i ranawe tasol ol i no stilim wanpela samting. Plis i wok long panim aut yet.

Daru

Daru - Tripela man bilong Kiwai Ailen i kisim bagarap bihain long wanpela pait namel long ol yet na ol pipel bilong Bamu long Sande (Februari 26) avinun.

Ripot i tok ol sampela yangpela Kiwai manki i bin pilai long wanpela lapun bilong Kamu taim em i wok long kam bek long wanpela klap.

Plis i holim pas pinis ol man husat ol i ting ol i go pas long dispela pait long tupela sait wantaim. Pait i stap pinis na olgeta samting nau i orait gen.

Rabaul

Rabaul - Ol stilman i bin ranawe wantaim 6-pela sot gan long Haus Kalabus bilong Rabaul long Trinde (Februari 22). Plis i bin painim tupela tasol.

Provinsal Plis Komanda John Toguata i tok asde (Februari 28) olsem 4-pela gan i stap yet long han bilong sampela man.

Mista Toguata i tok ol opisa bilong em i wok long painim yet ol dispela gan. Nau 10-pela ken em ol stilman i kisim long las yia.

"Ol man i mas kisim tok lukaut olsem i gat 13-pela gan em ol i bin lus taim ol man i brukim CIS long tupela taim.

"Ol dispela gan i stap long han bilong ol rong lain na mi laikim ol man mas lukaut gut taim ol i painim ol man ol i no save gut long ol," Mista Toguata i tok.

Em i tok ol opisa bilong em i wok long bihainim sampela toktok ol i bin kisim long painim ol dispela gan na holim pasim husat i bin stilim ol dispela gan.

Lae

LAE - Plis long Lae i bin holim pa pinis 3-pela man husat i stilim mani long Indosuez Benk long Lae long Mande (Februari 27).

Long 10 Kilok long Mande moning, dispela 3-pela man i bin hensapim ol wokman bilong benk long wanpela gan na poket naip na ranawe wantaim K6600.

Morobe Provinsal Plis Komanda Ludwick Kembu i tok long aste (Februari 28) olsem ol plis i bin holim pasim dispela ol man ya long Lae Intanesenel Hotel.

Ol plis nau i wok long askim ol. Mista Kembu i no tokaut sapos ol i painim sampela mani pinis o nogat yet.

Oposisen i tok ol i redi long tekova

OL lida bilong tripela bikpela pati long oposisen i tokaut pinis olsem oposisen i no bruk. Sir Julius Chan bilong Pipel Progres Pati, Utula Samana bilong MUF na Paias Wingti bilong PDM i mekim dis-

pela toktok long sakim ol toktok olsem ol pati long oposisen i no wanbel.

Long wanpela pepa dispela tripela lida i bin autim, ol i tok olsem ol pati long oposisen i wanbel na ol i redi tasol long tekova long gavman bilong

Mista Namaliu.

Ol i tok olsem planti hevi i kamap long kantri long dispela taim na sapos ol i no tekova long gavman bai dispela kantri i pundaun na bagarap olgeta.

Ol i tokaut tu long husat bai kamap praim minista sapos

ol i rausim gavman bilong Mista Namaliu. "Mipela laik tokim olgeta pipel bilong Papua Niugini olsem sapos mipela tekova long gavman bai memba bilong Westen Hailans, Paias Wingti i kamap praim minista". "Mipela i amamas tu long tingting bilong

Nesenel Pati long lusim gavman na bai mipela i toktok wantaim ol o ol arapela pati long stap wantaim mipela long nupela gavman sapos ol i laik".

Tasol ol lain bilong oposisen i no inap tokaut long wanem taim tru ol bai kamapim vot i no gat bilip long Mista Namaliu na gavman bilong em.

Oposisen lida Mista Wingti i tok olsem ol lain bilong em i skelim yet ol samting i kamap long palemen na taim ol i redi bai ol i kamapim dispela vot i nogat bilip.

Ol Sauten Hailans memba i paia

SPIKA Dennis Young i bin pasim Palamen inap long 5 pela minit long Trinde 1 Mas bihain planti bikmaus i bin kamap.

Trenspot Minista Anthony Temu i bin tok olsem em i no gat bilip long ol memba bilong Sauten Hailans na ol memba i kirapim bikmaus.

Mista Temu i bin bekim sampela askim

bilong memba bilong Nipa/Kutubu Philemon Embel na mekim ol dispela toktok.

Mista Embel i laik save sapos Minista i bin go raun wantaim wanpela helikopta long Sauten Hailans na givim mani long ol memba bilong oposisen long Sauten Hailans provinsal gavman.

Minista i tok olsem em i tru olsem em i bin raun long helikop-

ta long Sauten Hailans tasol em i bin givim mani long ol Distrik Kodineta bilong yusim long developim wan wan distrik bilong ol.

Tasol taim minista i tok olsem olpela trenspot minista i bin yusim mani long paul pasin, planti tok i kamap long ol lain bilong oposisen long Mista Temu i rausim dispela toktok.

Em nau ol bikmaus i

kamap na Mista Young i pasim Palamen. Taim Palamen i op gen Mista Temu i bekim ol arapela askim bilong Mista Embel na spika i askim long ol arapela askim.

Ol memba i stap namel

NANCY HILLARY i raitim

FOAPELA memba bilong oposisen i toklout pinis olsem ol i no sapotim tingting bilong Gabriel Ramoi long joinim lain bilong Mista Namaliu.

Ol memba ya em Memba bilong Chimbu Peter Kuman, memba bilong Kairuku Hiri, Joseph Aoa, memba bilong Essa'ala Johnson Maladina na memba bilong Tambul-Nebiller, Thomas Negints.

Ol i tok olsem ol i sapotim yet Oposisen na ol i no gat tingting bilong bihainim Ramoi i go long sait bilong Namaliu.

Ol i tok olsem Mista

Ramoi i wanpela memba nau bilong oposisen na wanpela wan wok bilong ol tasol ol i no amamas olsem em i bin yusim nem bilong ol long strongim nem bilong em yet.

Mista Kunam i tok olsem em i wanpela memba bilong Oposisen tasol em i no stap wantaim wanpela pati.

"Olsem na mi no save sapos ol lain Oposisen bai kamapim vot i nogat bilip o nogat," em i tok.

Mista Maladina i tok olsem em bai stap wantaim PDM i go inap 1992.

Nupela GG kisim mak



• Nupela Gavana Jenerel Sir Ignatius Kilage i lusim Palemen bihain Seiv Jastis Sir Buri Kidu i kisim tokorait long Sir Ignatius olsem em bai mekim gut olgeta wok bilong em.

Memba askim long Sivik eksen progrem

DIFENS Fos bai kamapim wanpela kem bilong ol long Banz long Westen Hailans dispela yia.

Dispela kem em i bilong wanpela lain soldia bilong Sivik Eksen Grup na wok bilong ol em long kirapim ol rot na bris na ol arapela samting long Banz na ol arapela ples i stap klostu.

Difens Minista Arnold Marsipal i autim dispela toktok taim Memba bilong Not Waghi William Wi i bin askim long wanem taim dispela kem bai kamap.

Mista Marsipal i tok olsem gavman i givim tok orait pinis tasol ol i wetim yet wanpela ripot bilong em long wok bilong dispela

grup.

Gavman bilong Mista Wingti i bin stapim wok bilong dispela grup taim ol i bin rausim mani bilong ronim dispela grup. Tasol nupela gavman bilong Namaliu i oraitim gen sampela mani long statim wok bilong dispela grup na bai ol i stap long Banz.

Long dispela taim tu Mista Marsipal i tokaut olsem wok painimaut long ol trabel i kamap wantaim ol soldia i go het nau.

"Taim ripot bilong dispela wok painimaut i kamap orait mipela ken mekim ol arapela tingting long strong dispela kain wok bilong ol soldia long ol arapela hap bilong kantri", Mista Marsipal i tok.

Samana askim Namaliu long ol ripot

PRAIM Minista Rabbie Namaliu i tokaut pinis olsem em i tru olsem em i bin toktok wantaim Praim Minista bilong Australia Bob Hawke.

Tasol Mista Hawke yet i bin ringim mi.

"Em i no tru olsem mi bin ringim Mista Hawke na askim em long salim sampela lain ami bilong Australia i kam helpim yumi". Mista Namaliu i tok.

Mista Namaliu i mekim dispela toktok long bekim askim bilong Memba bilong Morobe Utula Samana husat i laik save sapos ol ripot i bin kamap long ol niuspepa i tru o nogat.

Ol ripot long niuspepa i tok olsem

Mista Namaliu i bin askim Mista Hawke long sampela helpim long stretim ol trabel i bin kamap wantaim ol soldia long Mosbi.

Praim Minista Rabbie Namaliu i tok olsem em i bin toktok wantaim mista Hawke tasol ol arapela ripot long ol niuspepa i no tru.

"Mista Hawke i laik painimaut long ol hevi i kamap long kantri taim ol soldia i straik na mi bin tokim em olsem olgeta samting long kantri i orait tasol", Mista Namaliu i tok.

Mista Samana i bin askim tu sapos gavman i luksave long gavman bilong Taiwan o nogat. Las wik Foren Afeas Minista Mista Michael Somare i bin tok olsem Taiwan bai opim wanpela opis long Mosbi.

Difens Fos Komiti i kisim toktok long Kiunga

KOMITI bilong mekim wok paini-maut long wok bilong Papua Niugini Difens Fos i stat pinis. Oli statim pinis namba wan wok bilong ol long Kiunga Garrison Bareks long Westen provins.

Olpela memba bilong Not Flai Warren Dutton i tok olsem dispela hevi i bihainim tru

sosaiti bilong Papua Niugini.

Em i tok planti ol arapela skul na sosaiti i no save givim gutpela skul long helpim ol arapela man. Oli no gat menesmen.

Em i tok stat long minista na i go daun long pablik sevis, na tu hetman bilong ami na i go daun long praivet, mipela i no

sve skelim na luksave long dispela samting. Olgeta taim ol pipel i save tingim ol yet.

Mista Dutton i mekim tok piksa olsem "Sapos mi komanda bilong ami, wok bilong mi em tokim ol ami long bihainim toktok bilong mi. Arapela wok em long lukautim ol.

Em i tokim komiti

olsem "Sapos mi no lukautim ol bai oli no inap mekim gut wok.

Orait sapos oli laik bihainim maus bilong mi, mi mas givim ol wanem kain ol samting em oli laikim."

Wanpela bikpela samting em ol man i mas gat laik long mekim wok orait givim ol samting bilong mekim wok.

Sapos no gat ol bai no inap wok gut.

Mista Dutton i tok em i no amamas tru long dispela trabel bilong ol ami long Februari 7 na Februari 8. Ol dispela lain ami i bin mekim promis long pait long helpim kantri na watpo tru oli go mekim dispela kain pasin nogut long Palamen.

Em i tok gavman i

ken yusim ol lain ami long mekim wok long boda eria. Sapos oli mekim wok, oli bating lus long mekim dispela kain ol wok na tingting nogut.

Olpela Jastis minista, Dutton i no bilip tumas em oli tingting long wokim long ol straksa bilong Difens Fos o ol dispela lain disiplin fos.

Em i tok em i bin

stap olsem politisen inap long 20 yia olgeta. Tasol i no gat ol bikpela senis i bin kamap long dispela taim.

Oli arapela pipel tu i bin givim tingting bilong ol tu long dispela komiti.

Komiti i lusim Kiunga na go long Vanimo na bihainim bai oli go long Wewak na Manus.

Abaijah toksave long ol pipel bilong Mosbi

SIAMAN bilong Nesanel Kepitel Distrik Interim Komisin Josephine Abaijah i singaut pinis long ol pipel bilong Nesanel Kepitel Distrik long lukautim ol paip bilong karim wara long Mosbi.

Em i mekim dispela singaut bihainim long sampela hevi i bin kamap long Mosbi las wik taim ol wara saplai long siti i pinis na ol pipel i bin brukim ol paiap na kisim wara.

Misis Abaijah i tok olsem hevi i bin kamap taim oli lain bilong Elcom i pasim wara klostu long Rouna long klinim Sirinum Dam. Tasol oli oim wara gen, dispela wara i bin brukim sampela paip. Planti pipel long Mosbi i bin brukim ol paip taim oli wet longpela taim tru na wara i no kamap long tep.

Misis Abaijah i tok olsem taim oli wokman bilong NCDIC i traim long stretim ol dispela paip oli bin kisim taim stret long ol pipel.

Em i askim ol pipel bilong Mosbi long larim ol wokman bilong NCDIC i stretim ol dispela paip na tu long lukautim ol arapela paip bilong karim wara.

Siti Manesa, Bill Skate i tok olsem planti paip long Mosbi oli bin putim long-



• Ol pipel i lukluk long wara long pawa stesin long Rouna. Wara saplai bilong Mosbi siti save kam long dispela ples.

taim bilong gavman bilong Australia na oli lapun na ros pinis.

Mosbi em i kamap bikpela kwiktai tru na oli paip i stap nau i no inap saplain wara long olgeta pipel long Mosbi.

Misis Abaijah i tok

olsem oli yut long Hoskem, Kaugere, Pari, Baruni, June Valley, Hohola namba 4 na Gerehu namba 7 i tokaut pinis olsem oli bai helpim oli wokman bilong NCDIC long stretim oli hevi bilong wara i kamap nau.

Em i askim oli arapela lain long Mosbi long kisim wankain tingting na helpim oli wokman i stretim dispela hevi.

Em i tok sori tu long oli pipel bilong Mosbi bikos oli lain wokman

bilong em i no bin givim gutpela toksave long oli pipel bilong Mosbi olsem oli bai pasim wara.

Em i tok bihainim bai NCDIC i tokaut gut long oli pipel sapos oli laik pasim wara.

Ol pipel sut long helikopta

i kam long pes 1

oli bin holim pinis sampela man long taim tambu. Tupela wik bilong givim taim long Francis Ona long givim em yet long han bilong oli pinis. Olsem na Operesen bai go het.

Mungkas Asosiesen i bin bung pinis wantaim oli mausman bilong 40 Komyuniti gavman. Dispela miting bilong oli bin kamap long Pirung Komuniti gavman senta.

Tupela bikpela toktok i kamap long mting em oli plisman i mas go painim Francis Ona isi. Na oli no ken bagarapim nating sampela bilong oli pipel. Olsem na oli pipel i save belhat na

bikpela pait i save kamap namel long oli.

Mungkas Asosiesen i askim oligeta nesanel memba long wok wantaim. Oli mas lusim pasin bilong pasin politik man wok long helpim oli pipel na stretim dispela hevi bilong Panguna.

Siaman bilong Mungkas Asosiesen Patrik Ita i tok i gat liklik haplain i sapotim bilong BCL. Em i bin kisim planti ol pasin long pretim em.

Oli wok long painim yet Francis Ona. I gat ripot olsem oli bin lukim las wik long Buka Ailan. Nau yet planti oli yangpela manki nau i stap long bus. Oli wok long tren wantaim oli lain ami bilong Francis Ona.

Ol studen bai skul yet

OL STUDEN husat i kisim save long komes long yunivesiti long Mosbi bai stap yet long skul.

Las wik i bin gat ripot olsem i no gat tisa long lainim ol dispela studen na oli bai pinis long skul long Fraide 3 Mas. Tasol pablik sevis Minista Akoka Doi i tok olsem oli dispela lain bai stap yet long skul.

Mista Doi i mekim dispela tok long bekim askim bilong memba bilong Huon, Ben Geri husat i laik save sapos gavman bai mekim wanpela samting long helpim oli dispela lain.

Minista tok lukaut long ol pipel

GAVMAN bai stapim oligeta wok sapos oli pipel i no sapotim oli wok na sevis em gavman i kamap. Provinsal Woks minista bilong Not Solomons Peter Mikausi i mekim dispela toktok

bihainim long oli pipel bilong Nagovis i bagarapim sampela samting.

Mista Mikausi i autim dispela toktok bihainim long oli opisa bilong Woks i tokim em long sampela trabel i kamap long

Pomarate viles. Oli man long ples i bin bagarapim wanpela gavman ka, na oli bagarapim na stilim oli samting bilong makim graun, na tu oli kisim tupela pasbuk. Mak bilong mani i sktap long dispela pasbuk inap long

K385,00.

Dispela oli trabel i kamap taim oli wokman bilong Woks i wok long makim rot klostu long wara Tavera. Dispela em hap han rot bilong Boku Sovele rot.

Em i tok dispela kain birua i kamap i

soim tru olsem oli pipel i no soim rispek long oli samting bilong gavman. Na i daunim tru gutpela wok namel long oli komyuniti na gavman.

Mista Mikausi i tok sapos oli man i gohet long bagarapim wok

bilong gavman oli bai stapim oligeta wok long gohet hariap. Dispela i min olsem oli wokman bai i no inap mekim wok sapos oli dispela kain oli trabel i wok long kamap strong long oli dispela eria.



HIA EM OL TOKAUT BILONG

WANTOK

Ol memba i tingim husat? Mipela i les pinis nau long harim toktok bilong vot i no gat bilip na nupela gavman i kaisim ples. I gat planti hevi i stap pinis insait long kantri na long taim ol memba i mekim olkain toktok olsem, ol pipel i paul. Ol wok bilong gavman i no ran gut. Ol memba i tingting long sindaun bilong ol na ol i no strong tumas long paitim toktok bilong helpm ol pipel. Ol pipel i makim yupela ol memba. Na long taim yupela i kamap long Palamen yupela i mekim promis long sanap strong na helpm ol pipel na kantri.

Dispela promis i stap we nau? Mipela i les pinis bikos nau ol toktok i raun i go kam na i no gat wok i kamap. Ol lain husat i opim maus i mekim wanem kain wok bilong helpim kantri? Bai ol i kamapim wanem kain nupela wok na ol i pairap planti?

Sapos ol i putim sindaun bilong ol pipel i go pas, orait soim ol pipel nau. Mekim stret wok bilong yupela long autim wari na hevi bilong ol pipel long ilektoret.

Wantok

P.O. Box 1982, Boroko
Telepon: 25 2500
Teleks: NE 22213
Faks: 25 2579

PE BILONG WANPELA YIA, 52 NIUSPEPA

Ples	Air	Surface
Port Moresby	K20	K20
PNG	K29	K29
Australia	K60	K39
New Zealand & Pacific	K78	K16
Amerika & Europe	K118	K60

Printed and published by Anna Bernadette Solomon, of Bitten Place, Gordons, at Allotment 2, Section 209, Hohola.

Kisim skul long pis binis

MOA long 9-pela fiseris opisa bilong DPI long Vanimo na Aitape i bin kamap long wanpela wik kos long Vanimo. Dispela kos i bilong skulim ol long stret-pela pasin bilong lukautim pis binis.

Provinsal Fiseris Opisa, Benny Vakoe i tokim Wantok olsem

em i namba tri taim dispela kain kos i kamap. Mista Vakoe i tok bihain bai dispela ol opisa i ken skulim ol man long ol ples long Vanimo na Aitape.

Long Oktoba las yia Mista Vakoe i bin salim tupela opisa bilong em i go skul long Kavieng Fiseris

Kolis long Nu Ailan. Dispela tupela man i kam bek pinis na nau ol i go pas long dispela kos. Tupela ya em long Kararols Pius na Steven Yangs.

Long dispela kos ol skul long ol rot bilong pulim pis long umben, long string, na pulim pis taim ol i ran long bot bik solwara. Ol i

skul tu long luksave long wanem taim i gutpela long go painim pis.

Mista Vakoe i tok i gat wanpela fiseris opisa i stap pinis long Vanimo husat i gat bikipela save long dispela wok.

Em i tok tu olsem dispela kos i no pinis yet. Em i gat sampela

moa plen long skulim ol man long ol ples olsem Yako, Lido Waromo na long ol ples klostu long Vanimo taun.

Planti man long Vanimo na Aitape i laikim pis tasol i no gat man i gat bisnis bilong pulim pis na salim long ol pipel.

Bisnisan helpim Nu Ailan

MALAGAN Lods i bin givim K75,000 long Nu Ailan Provinsal Gavman long Tunde (Februari 27).

Malagan Lods i han bilong Nu Ailan Developmen Koporesen (NAIDC). NA NAIDC i wanpela bisnis bilong Nu Ailan Provinsal Gavman.

Dispela mani i bilong baim aut graun nau Lods i sanap antap long en.

Nu Ailan Developmen Kopresen na Tasukolak Pty Ltd i papa bilong Malagan Lods.

Provinsal Minista bilong Fainens na Plening i tok, "Aninit long lukaut bilong Primia Pedi Anis, mi amamas tru olsem mipela i bin kamapim planti developmen. Na mi amamas long kisim dispela sek."



Ol lain bilong Shortland Ailan i kamap long Kangu nambis...Buin long salim ol samting bilong ol long Buin maket.

Primia Nombe i sapotim askim bilong Giheno

PRIMIA bilong Isten Hailans Walter Nombe i sapotim tingting bilong Minista bilong Stet, John Giheno long kamapim ol senis long ilektorel sistem na tu long kon-

stitusen bilong Papua Niugini.

Em i tok i mas gat senis nau long ol dispela kain lo. Bikos olgeta taim i save gat vot i no gat bilip. Na dispela i no helpim tru kantri long go het. Tripela nesenel ileksen i kamap pinis tasol no gat wanpela gutpela senis i kamap long strongim wok bilong dispela kantri.

Mista Nombe i tok nau i no gat strongpela lo long banisim ol memba na ol i save mekim ol kain kain samting long brukim lo. Sapos i gat lo dispela bai lukautim gut tru dispela ol vot i no gat bilip i save kamap klostu klostu.

Ol memba bilong-palamen i mas traim skelim ol tingting bilong IASER i bin kamap long wanpela ripot las yia. Dispela ripot i toktok strong long i mas gat senis long konstitusen bilong Papua Niugini.

Dispela ripot i gat askim olsem: gavman i mas traim long kamapim president sistem long kantri. Daunim namba bilong ol politikel pati long kantri na makim primia olsem rijonel memba.

Primia Nombe i tok rijonal sit i no gutpela

PNG na Solomon pasim tok

WANPELA miting namel long ol lain bilong Solomons Ailan na Papua Niugini i pinis. Dispela miting em long toktok long mak namel long si long tupela ailan. Kibung ya i bin kamap long Honiara biksiti bilong Solomons Ailans las wik.

Tupela kantri tu i pasim toktok long tripela bikipela samting. Ol dispela samting em: Toktok bilong Spesel Eria, Mining bilong Spesel Eria na Wok bilong ol Lokal Sief.

Seketeri bilong Not Solomons, Peter Tsiamalili i tok ol toktok Spesel Eria long Honiara nau i pas. Dispela ol toktok ya i stat long 5 Februari las yia tasol ol i ne inap sainim long dispela yia bikos i ne pinis.

Gavman bilong Solomons Ailan i kamapim dispela toktok bikos ol i no amamas tumas. Bikipela toktok bilong ol i bin kamap long Lokal Sief.



•Giheno

tumas. Bikos nau dispela ol memba i no save mekim tru wok. Primia i save mekim bikipela wok tru bikos ol i save pait long birngim developmen i kam insait long provins.

Em i tok ol primia i no ken kisim wankain helpim olsem ol memba bilong Palamen. Bikos nau yet ol primia i winim tru ol arapela memba long ol kainkain liklik helpim em ol i save givim long ol.

Mista Nombe i tok Gavman na Oposisen i mas lusim pait pasin na sindaun na stretim ol wok bilong ilektoral sistem na tu konstitusen. Dispela em bilong strongim kantri bilong yumi.



Taim bilong makim kaunsil presiden

TUDE 2 Mas samting olsem 10-pela lokal gavman kaunsil insait long Westen Hailans bai makim ol nupela kaunsil presiden bilong ol.

Man i go pas long lokal gavman ileksen,

Kaping Isong i tokim *Wantok* olsem olgeta wok bilong makim ol kaunsil i pinis long Mande. De tru bilong pinisim olgeta wok bilong makim nupela kaunsil i pas long 28 Februari.

Dispela wik planti ol kaunsil i laik resis

long dispela posisen bilong presiden i kempen. Planti ol politikal pati i wok long kempen na makim ol kendidet bilong ol long resis bilong kaunsil presiden.

Mista Isong i tok opis bilong Loka gavman long Hagen nau i

wok hat tru long stretim resis bilong kaunsil presiden.

Em i tok planti ol lain i askim opis long surikim taim long givim inap taim bilong kempen. Tasol konstitusen i no tok bikos em i no min olsem Lokal Gavman

opis i brukim tru mama lo.

Opisa ya i tok long 6 Mas, ol pipel bai save husat i nupela kaunsil presiden bilong ol. Tasol ating long dispela wik Fraide tasol olgeta ripot bai kamap na ol bai save husat i nupela presi-

den. Emi tok olsem em i no amamas tumas long ripot i bin kamap olsem ol pipel i bagarapim stesin bikos long kaunsil ileksen.

Mista Isong i tok Lokal Gavman Opis long Hagen i no kism yet ripot olsem ol man i bagarapim stesin bikos ol i no win long ileksen. Em i tok dispela toktok i no tru bikos ol pipel i kros

long graun bilong ol. Ilekseen bilong Hagen Loka gavman kaunsil bai stat long tude 2 Mas. Na ol pipel insait long dispela eria bai save long Mande long husat i nupela kaunsil presiden bilong ol.

Mista Isong i tok em i amamas tru long olgeta kiap insait long provins long gutpela helpim ol i givim long taim bilong lokal gavman ileksen.

Eplikesen bilong graun i paul

MICHAEL MOSES, em i wanpela man bilong Mosbi husat i bin salim eplikesen long Lands Dipatmen long kism tokorait long yusim wanpela hap graun long Mosbi.

Michael i bilong Goilala long Sentral provins tasol em i stap long Mosbi inap long 16 year nau. Em i marit na i gat 4-pela pikinini. Tupela pikinini i save skul long Kaugere Komyuniti skul. Las wik bikpela brata bilong em na famili i kam stap wantaim em. Na ti gat upela arapela kandre tu i save stap wantaim em.

Long 1986 Michael i bin baim wanpela liklik takaboks long K1500. Tasol long 1987 ol lain bilong Nesenel Kapitel Distrik Interim Komisn i kam na rausim takaboks na tokim Moses long klia long dispela ples.

Moses i tokim ol lain bilong NCDIC olsem em bai baim dispela graun na kamapim stua gen. Long dispela taim i kam inap nau Moses i bin go long Lands Dipatmen na long NCDIC tasol hatwok bilong em i lus nating.

Long Ogas las yia Michael i go lukim ol lain bilong Liklik Bisnis Manmeri Asosiesen (LIKBA) na ol i bin helpim em long raitim narapela eplikesen.


Em i tok, "Mi putim eplikesen bilong mi long Ogas 1988. Ol wokman bilong Lands Dipatmen i bin tokim mi long go lukim ol bihain long tupela wik. Taim mi go lukim ol gen, ol i tokim mi olsem man husat i bin kism eplikesen bilong mi i bin go malolo long ples na wanpela meri i kism ples bilong em.

Meri ya i tokim mi olsem em i nupela long wok na em i askim mi long go stap narapela tu wik gen. Tupela wik i pinis na mi go bek long opis na ol i tokim mi olsem dispela meri i go karim pikinini na ol i no save we em i bin putim eplikesen bilong mi.

Seven mun i lus pinis na mi no save wanem taim bai ol dispela lain i lukluk long eplikesen bilong mi".

Michael i gat bikpela wok tru long lukautim ol lain husat i stap nau wantaim em. Em i kism ol liklik kontrak long NCDIC na lukautim ol lain bilong em. Tasol dispela wok i inap stap longpela taim.

Michael i tok sapos ol lain long Lands dipatmen i no stretim eplikesen bilong em na ol kontrak bilong NCDIC i pinis bai em na famili bilong em kism taim stret.



Liklik bisnisman

WANPELA yanpela manki bilong Wes Sepik nau i gat banis kakaruk bilong em yet.

Allen Ake i gat 9-pela krismas na em i bilong ples Yako long Wes Kos bilong Vanimo.

Long las yia, papa bilong Allen i givim em K100 Krismas presen bilong em. Allen i no yusim dispela mani long baim ol samting bilong en. Nogat. Em i painim tumbuna bilong em na askim em sapos em i gat sampela gutpela tingting long yusim dispela mani.

Tumbuna bilong Allen i tokim em olsem papa bilong em (Allen) i wokim wanpela banis kakaruk pinis tasol, em i no lukautim wanpela kakaruk bilong ol didiman. Em i lukautim ol kakaruk bilong ples tasol.

Tumbuna ya i tokim Allen long rot bilong wokim oda na kism kakaruk. Orait Allen i go lukim papa bilong em na tupela i salim oda i go long Lae.

Long 7 Janueri Allen i kism namba wan lain pikinini kakaruk. Em i amamas nogut tru long ol didiman.

Nau ol kakaruk bilong Allen i kamap olsem 55 olgeta na ol i wok long karim kiau.

Allen i salim namba wan kiau bilong em long 6 Februari. Em i salim long ples bilong em yet na em i kism K4.

Nau em i mekim olsem, bihain long olgeta Sande em save salim ol kiau. Em bai baim 5-pela moa kakaruk.

Em i save skul long Baro Komyuniti Skul na em i stap long gret tri. Long olgeta moning em i save tilim kiau long ol tripela sista na tupela brata bilong em, na ol i save kaikai na ol i go skul.

Allen i tok nau em i tingting long askim papa bilong em long wokim bikpela banis kakaruk i go bikpela.

Timba kampani kism tok orait

LONG Fonde 23 Februari, Gavman i bin sainim wanpela tokorait pepa long Stetin Bei Lamba Kampani Pty Ltd (SBLC) bai katim timba long Talasea, Hoskins, Kapiura na Ania-Fullerbourne timba eria insait long Is na Wes Nu Britin.

Minista bilong Forest Karl Stack i tok dispela tokorait i gat ol dispela samting em kampani bai i mas wokim.

SBLC bai wokim ol rot, bris na ol krosing. Wanpela bikpela rot bai ol i wokim i stap namel long Amio-Uvolna Amio-Gasmata. Kampani bai i wokim tu ol liklik rot i go long ol ples klostu long dispela hap. Ol bai i wokim tu samting olsem 15 bris olgeta.

Kampani bai i planim ol plantesen diwai bilong gavman. Gavman bai wokim tokorait sapos kampani i laik katim timba long ol dispela plantesen. Sampela diwai plantesen SBLC i planim bipo long dispela tokorait bai i stap yet long lukautim bilong kampani.

I gat wanpela somil pinis long Buluma na narapela bai ol i wokim long Amio long namba tu yia bilong



• Stack

dispela projek. Ol i ting olsem kampani bai kamapim 18,890 kiubik mita timba long dispela 25 yia.

Wanpela taun tu bai i kamap long Amio. Taun bai i gat ol gavman opis, haus bilong slip, haus sik, plis stesen, ples bilong pilai na pablik toilet.

Stetin Bei Lamba Kampani tu bai wokim strongpela bris bilong long ol bikpela bot bilong timba long kam insait long en.

Kampani bai i wok aninit long Envairementel Plening Ekt na bai no ken bagarapim ol gutpela bus na graun bilong ol man.

Gavman bai i kism olsem K122,585,000 i kam long ol kainkain takis kampani bai i baim.

Mista Stack i tok dispela wok kamap bai i helpim tru ol pipel long Saut-Wes na Saut-Kos bilong Is na

GLOUSTER Distrik i no gat nem o mausman long Kabinet bilong Primia Robert Lawrence bihain long em i autim Francis Auram las wik.

Mista Lawrence i

Primia Lawrence autim Auram

autim olpela Fainens Minista Mista Auram bikos em ino bihainim laik bilong gavman. Em i no bin vot wantaim gavman long sapotim mosen bilong kamapim nupela wok minista insait long gavman bilong Wes Nu Briten.

Mista Auram i tok dispela as bilong primia Lawrence i autim em i no tru. Bikos tupela i bin sapotim tru em na makim em na kamap primia.

Em i tok em i gat bikpela bilip olsem sampela ol man mas askim primia long autim em. Dispela tu bai soim olsem liklik taim gavman bilong Primia Lawrence bai pundaun.

Em i tok em i vot egens long dispela mosen bikos dispela i westim tru mani. Bikos nau yet provins i save hevi long wok bilong lukautim mani. Wok bilong minista em long lukautim gut mani bilong ol pipel. Na dispela mani mas givim ful sevis i go long ol pipel.

Mista Auram i tok tupela ministri i save mekim wanpela wok tasol. Na sapos yumi i go het long mekim olsem mipela minista i tromei mani nating.

Primia Lawrence ino skelim gut wok minista. Nau Kimbe Distrik yet i gat 6-pela minista, Bialla 1, Kandrian 4 na Gloucester i no gat.

Mista Auram i singaut i go long primia long tingting gut na makim wanpela memba bilong Gloucester long PEC o gavman bilong em. Bikos dispela eria i no gat planti development.

Provinsal Kabinet bilong Primia Lawrence i gat Melanesial Alaiens na Independant.



PEKING - Saina Ol Saina meri i wokim sampela dens long amamasim meri bilong Presiden George Bush. Dispela dens i bin kamap long Gong-Wang-Fu Tea haus las wik Sande.



SEOUL- SAUT KOREA Wanpela studen i holim piksa bilong presiden bilong ol Mista Roh Tae-woo. Em wantaim planti ol arapela studen i protes klostu long Myongdong Katidrel las wik Sarere. Ol plisman i wok long traim stapim planti ol arapela grup i wokim dispela kain ol mas na protes.



PEKING - SAINA Presiden bilong Amerika George Bush na Siaman bilong Saina Dng Xiaoping i dring bia. Ol i mekim belo kikai bilong ol long wanpela haus kai klostu long Great Wall of People.



PHNOM PENH - KEMPUCHEA Wanpela opisa i sekim bun bilong wanpela manAmerika. Em i bin dai taim ol lain bilong Khamer Rouge i bosim dispela eria. Gavman bilong Phnom Penh i helpim Karl Deeds bilong California long painim bodi bilong papa bilong em Michael. Brata bilong em i bin dai long dispela hap long 1979.

Presiden Najibullah tok lukaut long Amerika


PRESIDEN Najibullah bilong Afganistan i no amamas tumas long Amerika i saplaim ol samting bilong pait long ol Mujahideen rebel paitman. Najibullah i tok sapos Amerika i helpim yet ol paitman long daunim gavman bilong em, em bai kisim helpim gen long Rasia. Najibullah i no amamas tru long wanem samting Amerika i mekim nau. Em i tok olsem dispela ol pait-

man i save kamapim planti trabel long Kabul. Kabul em i biktaun bilong Afganistan. Najibullah i tok strong tru olsem Amerika i no ken saplaim moa ol samting bilong pait long ol rebel paitman. Bikos Rasia i rausim pinis ami bilong em long Kabul nau. "Bilong wanem bai Presiden Bush i givim moa samting bilong pait i go long oposisen?" Najibullah i tok. "Amerika i save sanap long lukautim

sindaun bilong ol pipel long olgeta kantri. Tasol bilong wanem na em i mekim olsem", Najibullah i tok. Ol rebel paitman i bin pait long daunim gavman bilong Najibullah long 9-pela yia olgeta nau. Na ami bilong Rasia i bin go insait long helpim Najibullah. Na Amerika gen i sapotim ol rebel paitman. Ripot i tok olsem Rasia i bin askim Amerika long no ken helpim ol rebel paitman. Tasol Amerika i no harim tok.



PEKING - SAINA Meri bilong Presiden Bush Barbara i pilim giaman elepan. Na em i tok dispela em Ripabliken Saina Elepan. Em wantaim man bilong Presiden George Bush i go raun lukluk long Saina. Ol bai lusim Saina na nau i stap long Seoul, Saut Korea.



TOKYO - JAPAN Ol gat i wok long was long ples we bodi bilong Emperor Hirohito bai slip. Ol i wok long mekim dispela mas taim ol i bringim bodi bilong em i go long dua bilong matmat bilong em.



LES VEGAS - AMERIKA Referi Steel i stapim pait namel long Mike Tyson na Frank Bruno. Tupela i pait long soim husat tru bai sempion long heviwet. Tyson i strong na autim Bruno long namba 5 raun bilong pait bilong tupela.

Ileksen i kamap long Vanuatu

VANUATU i stapim ol stua long salim ol dring. As bilong dispela em long helpim namba tu jenerel ileksen bilong Vanuatu i kamap gut.

Bikos nogut ol pipel i spak na mekim trabel long taim bilong ileksen.

Dispela ileksen i

kamap nau long Pot Vila, biktaun bilong Vanuatu. Ileksen i bin stat las mun yet long Tunde 28 Februeri 1989.

Na em namba wan taim bilong nupela pati bilong Barak Sope long resis.

Nem bilong dispela pati em Melanesian Progressive Paty (MPP). Sope i bin

kamapim dispela pati long mun Septemba bilong las yia. Na 6-pela memba husat em ol plisman i bin holim pasim long las yia i jonim dispela pati.

MPP i bin kamap bihain long taim ol sapota bilong Sope long Palamen i bruk na lusim Vanua'aku Pati.



ZURICH - SWITSALAN Wanpela ami bilong Switserland i soim kain ol samting ol i save putim long banisim ol long pulim win nogut. Ol nau i ken kaikai na dring wara. Ol i no ken wari long rausim dispela pes tumbuan.



WEST BANK - IISRAEL Tupela yangpela manki bilong Pales-tian i taitim katapel bilong tupela na sut long ol mai bilong Israel. Bikpela pait i bin kamap bihain long wanpela mas bilong ol meri i kamap. Ol meri i sapotim Demokretik Fran Muvmen.

Ol mama i dai

TUDE planti mama i save dai long taim ol i karim pikinini. Wol Helt Ogenais-esen (WHO) i bin tokaut olsem long Tunde 28 Februeri 1989.

Rekot bilong WHO i soim olsem moa long 500,000 meri olgeta. i bin dai pinis long taim ol i laik karim pikinini. Na long ol develop kantri em moa long 6,000 meri tasol i bin dai.

Dispela i soim olsem planti mama insait long ol kantri em i no develop gut i gat bikpela sans long dai taim ol i laik pikinini. Wanpela ripot i kam long bikpela opis bilong WHO long Manila i tokaut olsem.

Ripot i tok tu olsem nau yet i luk olsem moa long 7 milien meri insait long wol bai dai long taim ol i laik karim pikinini. Dispela em long nau i go inap long yia 2000.

Pei em i liklik... Teis em i gutpela tru!



"I NO PEIM MOA!"

Hausing Opisa bekim tok

Dia Edita,
Mi laik bekim pas bilong Eiwae Sereba i kamap long Wantok niuspepa. Em i tok Nenenel Hausing Komisn long Bulolo i wantok sistem.

Mi wanpela opisa bilong NHC husat nau i bosim opis long Bulolo. Mi laik bekim sampela bulsit toktok bilong yu long dispela pepa.

Eiwae Sereba, yu wokim tupela toktok em i no tru na mi laik bekim nau.

Yu bin tok olsem mi save givim haus long ol wantok bilong mi. MI laik askim yu long kam long NHC Opis long Bulolo na tokim mi hamas haus em mi givim long ol wantok bilong mi.

Taim mi kisim dispela opis, mi laik tokim yu stret olsem mi no wokim wantok sistem. Olgeta wok mi save wokim em mi bihainim ol lo bilong NHC stret.

Mi no inap givim haus nating long yu sapos yu no aplai. Na sapos yu aplai mi mas lukluk

long wok bilong yu na yu mas bekim sampela askim bilong mi. Sapos mi ting em i orait yu ken kisim haus, sapos no gat em bai yu no nap long kisim haus.

Yu bin tok tu olsem mi save givim haus long ol wan misin bilong mi. Dispela toktok em i no tru. Long wanem mi no save lotu long SDA.

Mi ken givim haus long husat SDA man sapos em aplai. Dispela em wok bilong mi na yu no gat rait long tokim long wok bilong mi.

Eiwae Sereba mi laik tokim yu olsem sapos yu gat bel hevi yu mas kam long NHC Opis long Bulolo na rausim mi. Mi no laik yu westim taim bilong yu long rait ken long niuspepa.

Michael Hausiura,
NHC Box 135.
Bulolo, Morobe Province.

Lukim samting pastaim na toktok

Dia Edita,
Mi laik bekim pas bilong brata Apulni Pumas Parage husat i stap nau long Arawa insait long Not Solomon provins. Brata ya i sapatim tru Memba bilong Kendep long palamen, Malipu Balakau na tok olsem em i bringim planti developmen i go long ol pipel.

Brata ating mi ken tokim yu olsem ai bilong yu i pas ya. Yu mekim wanem nau long Arawa na stap long hap. Maski long klinim pipia long hap na kam long Kandep we yu ken lukim stret long ai bilong yu.

Dispela memba i no mekim wanpela gutpela samting yet long ol pipel bilong Kandep. Em i save tingim poket bilong em tasol.

Taim em i sanap long ileksen, em i tok olsem em bai kamap Praim Minista na helpim mipela sapos em i winim ileksen. Tasol nau em i go insait pinis long palamen na i no mekim wanpela gutpela samting long mipela.

Olgeta taim em i pasim maus na sindaun nating long palamen.

Brata Parage, ating bihain taim yu mas lukim gut ol samting long ai bilong yu na toktok.

Em tasol toktok bilong mi. Yu husat brata o susa i laik bekim pas bilong mi orait rait tasol long Wantok niuspepa bai mi lukim.

Bakaiyingi Piyakain,
P.O. Laiagam,
Enga Province.

Apim pe bilong ol ami

Dia Edita,
Mi wanpela manki bilong Gembogl tasol nau mista long Kundiawa taun. Mi laik autim wari bilong mi i go long ol plisman. Ol i bin yusim yusim smok bom na raba katres long raunim ol ami husat i straik.

Mi sapota bilong ol ami na mi laik askim yupela ol plisman. Yupela i save patrol long boda long lukautim PNG o olsem wanem. Sapos yu ting yu moa yet ating bai yu kisim taim ya. Ol ami i no save yusim ol samting bilong pait. Ol i mas tasol na bagarapim ol samting. Ol plisman em ol

lain bilong pret stret. Na tu gavman bai mekim wanem samting tru long hapim pe bilong ol lain ami.

Yupela gavman i mas tingting tu. Ol ami i stap na yupela i stap sapos nogat ol autsait man bai kam na ranim kantri bilong mipela. Na yupela bai ai op tasol na lukluk.

Husat man i laik sapat o egens i mas rait tasol long Wantok na mi ken lukim.

Joseph Yaka,
Pomberi Viles,
Gembogl,
Simbu Provins.



Taim tambu i no gat mining

Dia Edita,
Mi no amamas long taim tambu (curfew) i kamap nau long Not Solomons provins. No gat wanpela gutpela as long putim dispela taim tambu long provins.

Francis Ona i askim ol papa bilong kampani long baim em long ol samting em i bin bagarapim long graun bilong em. I luk olsem Nesenel gavman i no tingting long bihain taim. Mi lukim tu primia bilong NSP

i no wari tumas long Francis Ona tu. Mi laik tok tenk yu long Michael Ogio na Esorom Burege i mekim sampela gutpela toktok long wari bilong ol papa bilong graun.

Ona em i pait strong bikos em i tingting long ol pikinini bilong em long bihain taim. Gavman i tromoi bikipela mani nating long baim wanpela man tasol.

Sapos ol plisman i sutim na kilim wan-

pela papa bilong graun, husat bai baim kompensesen? Sapos ol papa bilong graun i kilim wanpela plisman, husat bai baim kompensesen?

Long Wol Woa 2 ol Japan i laik tekova long kantri bilong mipela na ol lain bilong Australia i helpim mipela. Bilong wanem na gavman bilong Papua Niugini i no laik mekim wankain long CRA.

Joe S Orua,
P O Box 7535, Boroko.

Vunapope dia tumas

Dia Edita,
Mi wanpela manki bilong Wes Sepik tasol nau mi stap long Tokua Ples Balus long hap bilong Kokopo insait long Is Nu Briten provins.

Mi gat bikipela wari. Bilong wanem na haus sik bilong ol misin long Vunapope i save sasim bikipela mani long ol sikman. Pe bilong baim marasin long Autpeser. Dipatmen inap long 80t. Na sapos ol i slip long haus sik long wanpela de, ol sikman bai baim K8. Ol arapela haus sik i save baim liklik mani.

Mi laik save gut. Dispela em haus sik bilong ol misin o wan-

pela praiwet haus sik. Sapos em i haus sik bilong ol misin orait plis traun na daunim pe bilong marasin na pe bilong Wok (K8.)

Planti ol pipel i save, misin i mas wok marimari long ol sikman. Sapos ol i sassim tumas ol sikamn dispela i no gutpela pasin tumas. Dispela i soim olsem yupela i mekim wok bisnis tasol.

Mi autim wari bilong mi i go long Wantok Niuspepa. Olsem na husat i laik sapatim o egensim plis rait na mi ken lukim

Robin Anio
DCA Tokua Ples Balus
Rabaul

Ol Koroba wetim developmen

Dia Edita,
Mi wanpela man Koroba long Saten Hailans tasol nau mi stap long Rabaul. Mi laik autim dispela wari bilong mi long Wantok Niuspepa na olgeta pipel long Papua Niugini ken lukim.

Mi sapat tru bilong Mista Aruru Matiabe, taim em i resis wantaim Paielo Elo long 1982 and 1987. Mi bin sapatim em bikos mi bilip long giaman politik bilong em.

Long taim bilong ileksen Mista Matiabe i bin tok olsem em bai kamapim wanpela nupela plis stesin, wanpela helt senta, ol komyuniti skul, rot i go insait long ol ples na ol arapela samting.

Mista Matiabe planti yia i go pinis na

mipela i wetim yet ol dispela samting. I luk olsem bilong mipela i lus nating.

Long Wantok Niuspepa bilong 25 Januери mi bin lukim pas Yakae Minoko i bin raitim long amamasim memba bilong em Laipu Balakau.

Nau long yu Mista Matiabe mi laik tok tenk yu long pait hat long planti meri na winim kot. Bikos long strong bilong yu tet bai ol Koroba Kopiago i gat plant manmeri long bihain taim. Ol brata na susa yupela noken pasim maus.

Aloysius L Ilupago,
Gonelia Logging,
P O Box, Rabaul.

Ol memba gris tasol

Dia Edita,
Long taim bilong kempen sampela memba i tok taim ol i kamap memba ol bai wokim rot. Tasol taim ol i kisim wok memba, oloman, ol i go pinis na mipela ol pipel i no save lukim ol. Dispela em ol toktok bilong Roy Yaki na tu Joe Walo Kuna - provinsal memba bilong Las Wiru.

Mipela i bin amamas taim ol i statim Wiru Luk rot. Tasol em i pundaun gen. Yupela i stap long Oposisen o yupela i stap we? Olsem

wanem yupela i save kaikai na go mekim wok ol yupela raun long laik bilong yupela yet.

Yupela ol memba i save karim ol pipia ka na ran antap long ol rot ol man i wokim long han. Na save givim kainkain ol giaman toktok olsem Mi save man, Mi save long Politik Mi abai wokim rot nau. Olsem na nau planti pipel i no luksave yet long wok bilong ol dispela memba.

Yu gat namba pinis orait bihain kam na pilai gen wantaim

mipela. Bai yu kisim taim stret ya.
Warea Wapula
Las Wiru
Pangia, SHP.

Salim pas i kam long:
WANTOK
NIUSPEPA
P.O. BOX 1982
BOROKO

PNG i no sot long saveman

Dia Edita,
Mi alik makim maus bilong ol narapela yangpela manki insait long kantri na autim wari bilong mipela i go long gavman.

Gavman bilong nau i save kisim planti ovasis pipel long kam wok insait long kantri. Na dispela i banisim spes bilong planti greduet insait long kantri.

Ol pipel bilong ol arapela kantri i gat wanem kain save tru na gavman i kisim ol. Gavman i mas tingim yangpela bilong dispela kantri.

Mi laik save long hamas wokman bilong Filipin i wok nau long Ok Tedi Main. Na hamas wokman bilong Kovea na Taiwan i wok nau long Yonki Haidro Pawa Stesin.

Ating namba bilong ol dispela ovasis wokman i bikipela tru. Na dispela no gutpela tumas long ai bilong mipela ol pipel husat i nogat wok.

bikos tude planti yangpela i save greduet na stap nating. Bikos i nogat inap wok.

Mi yet i lukim olsem i gat inap wok insait

long kantri. Tasol ol wokman bilong ol ovasis kantri i save kam na banisim spes bilong mipela.

Long dispela tasol na ol yangpela i save stap nating na mekim raskol pasin.

Oslem na mi laik askim Namaliu Gavman long ulluk long dispela na stretim.

Em tasol wari bilong mi.

Kep Kakone,
Rabaul, ENBP.





Nau yu inap

Go for Goal!

long nupela 6-mail sab-brans,

long Mosbi long olgeta kain wok benk kam na lukim Joe Ben Goru wantaim ol stav.

Mipela i op long 9am inap 2pm Mande inap Fonde. Fride mipela i op long 9am inap 5pm.



Mipela i amamas long lukim yupela.

Ph:257609

6 Mail Sab-brans,

Morea-Tobo Rot,
6-Mail, Mosbi.



Joe Ben Goru,
Officer-in-Charge



Bank of South Pacific Limited

A MEMBER OF NATIONAL AUSTRALIAN BANK GROUP

Ol pipel i wetim rot yet

Dia Edita,

Mi laik autim bikipela wari bilong mi i go long ol bikman bilong mipela olsem Michael Somare, Sir Julius Chan, Paias Wingti, Rab- bie Namliu na ol arapela memba long pala- men.

Yupela ol memba i save lus tingting olgeta long mipela ol gras rut pipel husat i save stap long bikbus tru na long ol liklik Ailan. Mipela ol dispela pipel i save painim hat stret long lukim pes bilong mani.

Yupela i save lus tingting olgeta long mipela na tingim sindaun bilong yupela tasol. Yupela i kamap bos na sindaun long opis na raun long gutpela ka na balus olgeta taim. Yupela mas lus tingting long pilai politik na tingting long developim bilong mipela.

Oposisen na Gavman i mas wok bung wan- taim na developim kantri bilong mipela. Rot em wanpela bikipela samting bilong bringim developmen i go long ol rurel eria.

Bikos rot i ken amamasim ol pipel bai ol i tingting long wok bisnis. Na tu rot bai mekim isi long ol pipel i salim kaikai bilong ol long maket na ol kain samting olsem.

Bikipela as long wari bilong mi em gavman i mas lukluk na stretim sindaun bilong ol pipel long rurel eria. Bikos hia em we planti populesen bilong kantri i stap long en.

Olsem na rot em wanpela developmen gav- man mas lukluk pas long en. Na bihain long rot em Helt sevis na skul.

Mipela ol pipel i save baim takis nating i go long Gavman. Inap long Gavman i yusim dis- pella mani long bringim moa developmen we i ken kamapim planti wok insait long kantri?

Bikos nau yet planti Gred 10 studen bilong mipela i save stap nating bikos i nogat inap wok.



Ol dispela yangpela manki i save stap nat- ing na mekim raskol pasin insait long kantri. Olsem na raskol pasin i kamap bikipela nau insait long kantri.

Dispela em wanpela samting gavman i mas lukluk moa na stretim hariap.

Em tasol wari bilong mi. Yu husat man o meri i laik sapatim o egensim pas bilong mi orait rait tasol long Wantok niuspepa bai mi lukim.

Amo Lai Longap Parage,
P.O. Box 569. Arawa-NSP.

Kitek i gat wok

Dia Edita,

Mi laik egensim pas bilong brata Eyapa Ibu em i bin kamap long Wantok Nius- peps. Brata ya bilong Pangia insait long Sauten Hailans provins.

Em i tokaut olsem em i no amamas long lukim ol grasrut man- meri i raun wantaim ol ki tek long poket. Bikos ki tek i bilong ol wokman na meri na ol studen tasol.

Mi laik tokim yu olsem ating yu mas kisim rong tingting tru ya. Ki tek i bilong kain kain man na i no bilong ol wokman na meri na ol studen tasol.

Bai mi tokim yu long as bilong karim ki tek na raun. Planti pipel i gat planti ki. Na sapos ol i kisim wan wan na raun bai i pundaun na lus. Olsem na wantaim helpim bilong ki tek ol i ken lukautim gut ki bilong ol.

Ating sapos yu kam long Kimbe na lukim mi raun wantaim ki tek bai yu bel kaskas olgeta ya.

Mi laik askim yu olsem sapos yu raun wantaim planti ki na pundaun long rot bai yu mekim wanem? Tingting gut na bihain yu raitim pas long Wantok Niuspepa.

Samuel T. Aron,
P O Box 81,
Kimbe, WNB.

Gavman mas stapim gol bisnis

Dia Edita,

Mi wanpela man bilong Enga tasol nau mi stap long Bougainville Ailan insait long Not Solomon provins. Mi harim olsem long Porgera ol i kolim Mt Kare, ol manmeri i wok long painim gol long laik bilong ol yet na kisim mani.

Long dispela as na mi raitim pas i kam long Wantok niuspepa long autim liklik tingting bilong mi long dispela samting.

Bilong wanem tru na Nesenel Gavman i larim ol pipel i mekim olsem long laik bilong ol yet. Ol i larim ol pipel i painim fri gol na salim long kisim isi mani.

Gavman i mas stapim ol pipel long mekim olsem. Bikos dispela kain pasin i no gutpela tumas.

Dispela i soim tru olsem ol pipel

i laik daunim tru pawa bilong gavman.

I gutpela sapos gavman i go pas long painim kampani bilong kisim ol dispela gol. Na ol pipel i ken kisim helpim olsem long rot, skul, haus na ol kain developmen.

Mi yet mi lukim olsem sapos dispela gol i pinis, ol asples pipel bai pait nabaut namel long ol yet. Olsem na i gutpela sapos yupela ol wantok long Porgera i mas isi liklik long painim gol.

Em tasol liklik toktok bilong mi. Yu husat manmeri laik spotim o egensim pas bilong mi orait rait tasol long Wantok niuspepa bai mi lukim.

Enoch Metaen Lindita,
P.O. Box 303,
Arawa-NSP.

C.O.E.S. skul fi antap tumas

Dia Edita,

Mi wanpela manki bilong Is Sepik tasol mi stap long Lae insait long Morobe provins. Mi save skul long COES Senta long na mi laik autim wari bilong mi i go long Edukesen Dipatmen na Nesenel gavman.

Pe bilong dispela ol kos i go antap tru. Dispela nupela pe bilong K200 em bikipela tumas. Mi no amamas tumas long pe bilong skul fi.

Dispela em wanpela bikipela hevi insait long Edukesen sistem bilong Papua Niugini. Planti ol manki papamama bilong ol i save painim hat tru bikos ol i no save fotnait.

Yupela i save givim wan na hap- mun tasol long bai fi. Na dispela taim i sotpela tumas. I nogat wanpela man i ken painim K200

long dispela sotpela taim.

Taim planti ol yangpela COES i lusim skul ol i save painim hat tru long painim wok. Olsem na planti ol yangpela i save tainim i go long mekim ol kain trabel.

Gavman i mas lukluk tu na skelim bikipela hatwok bilong ol papa mama husat i salim ol pikinini i go skul. Olsem na traim na daunim skul fi.

Ol pikinini tu i tingting long bekim hatwok bilong ol papa mama tasol taim i no gat wok. Ol i save go tasol long mekim ol kain kain trabel. Husat i laik bekim pas orait rait long Wantok mi ken lukim.

Bill Deason,
P.O. Box 3992,
Lae,
Morobe Provins.

Ol pablik sevan i sakim

Dia Edita,

Long las yia krismas mi poromanim Redio Wanimo na mi harim Primia bilong Wes Sepik Mista Yalu i kamap long krismas griting program.

Primia i tokim ol pablik seven i no ken

kaikai buai na smok insait na autsait long ol opis bilong gavman.

Mi lukim olsem ol pablik seven i no bihainim toktok bilong Primia. Ol i wok long wokim yet.

Tasol mi no ken tok- tok em i samting

bilong ol bikman long lukluk long en.

I gutpela sapos Prim- ia i makim sampela man long go insait long opis na mekim wok painim aut long dispela.

John Welai
Wanimo town.

Leba Dipatmen helpim wokman

Dear Edita,

Mi laik sapatim past bilong Peter Tirotot i kamap long Wantok niuspepa namba 761.

Wari bilong mi i go long Nesenel Gavman na Leba Dipatmen. Bilong wanem na ol i no luksave long pe bilong ol wokman long ol plentesen?

Olsem wanem ating ol pelentesen i no kamapim mani long

divelopim kantri.

Mi ting ol plentesen i save kamapim planti samting olsem kakao, kopi na kopra long pulim mani i kam insait long kantri. Ating sapos i nogat plentesen kantri bai i sot long mani.

Olsem na mi laik askim PNG gavman na leba dipatmen long ol i mas lukluk long dispela na traim long

hapim pe bilong ol wokman long plente- sen. Dispela K37 i no nap long 2-pela wik.

Em tasol liklik wari bilong mi na husat brata o susa i laik bekim pas bilong mi, putim tasol long Wan- tok niuspepa na bai mi lukim.

P. Alison Mackie
P.O.Box, 102.
Madang.

Memba Lau i stap we?

Dia Edita

Mi laik toksave i go long memba bilong Laigap na Porgera Mista Tenda Lau.

Yu bin kraik long pipel na ol i givim vot long yu. Na mipela givim vot pinis na yu go stap we? Mipela i no harim nek bilong yu liklik. Ating yu

mas dai o olsem wanem.

Laiagam Taun i bus. Mi tingting planti tru wanem taim bai Mista Tenda Lau i opim maus bilong em na bringim developmen i go long dispela eria.

Maski long yusim nating balus tiket bilong gavman na plis

traim na mekim wok bilong ol pipel.

Em tasol liklik wari bilong mi. Husait i laik sapatim mi o egensim mi orait rait long Wantok na mi ken lukim

Limbson Kalane
P.O. Box 303
Arawa, NSP.

Kombio i no gat senis

Dia Edita,

Mi wanpela man Kombio long Is Sepik tasol nau mi stap long Rabaul Is Nu Briten provins. Mi rait long sapatim pas bilong Jef- fery Suhuau i bin kamap long Wantok Nius- peps namba 760.

Jeffery i bin egensim toktok bilong olupela memba bilong Drekekekir Mista Leo Man- arip. Em i no gut olsem Mista Manarip tok- tok bilong memba bilong Aitape Lumi, Gabriel Ramoi.

Mi Ramoi i laik kamapim nupela pati bilong em na mi ting olsem em i wanpela gutpela samting long helpim ilekteret bilong em. Mista Manarip nau gutpela tu sapos yu kamapim wanpela samting olsem long helpim ol pipel bilong yu long Kombio namba 1 na namba 2.

Stat long 1950 i kam inap nau i no gat wan- pella gutpela senis i kamap long Kombio na Kofem. Dispela i stap yet olsem long taim bilong ol Luluai na Tultul. I tru olsem mipela i gat kopi ol kopo i kamap olsem ol diwai nat- ing nau bikos i no gat man long helpim mipela karim ol kopi i go long maket. Long taim bilong ileksen mipela save tromoi vot bilong mipela bai luk olsem vot i save lus nating. I no gat wanpela gutpela samting i kamap long ples bilong mipela.

Mipela save karim ol kopi bek bilong mipela moa long 27 kilomita long bungim haiwe. Bia gutpela sapos Mista Manarip i yusim sam- pela mani gavman i givim em long mekim wanpela rot long haiwe i go long ples bilong mipela.

Sapos no gat orait bai mipela ol lain bilong Kombio bai joinim ol lain bilong Mista Ramoi long Wes Sepik provins

Lazarus Noah Walpim,
P O Box 1583,
Rabaul,
Is Nu Briten Provins.

Rausim olupela kaikai

Dia Edita,

Mi wanpela mangi Songom long Morobe Provins tasol nau mi stap long Morata namba wan long Pot Mosbi.

Mi save go baim ol kaikai olsem rais, suka na bret long wanpela stua. Mi painim olsem ol dis- pella samting i gut- pella. Tasol ol nara- pella samting olsem kakaruk, kari wan- taim tinpis na mit i olupela pinis. Ol i bilong las yia pinis tasol pe bilong ol i stap antap yet.

Mi ting olsem ol inspekta i no save sekim ol dispela stua. Ol i save stap nating long opis o haus na karim mani bilong gavman. Ol i save raun nating na ol man i wok long kaikai ol sting kaikai na pulapim ol haus sik nabaut.

Taim ol man i go long haus sik noken ting ol i sik long ol narapela samting. Em ol i sik long sting kaikai tasol.

Emos Nasate,
P.O.Box, 25250.
Boroko, NCD.

Ol PMV draiva straik long wan de

SAMTING olsem 500 bas draiva long Mosbi i bin straik long Mande 27 Februeri.

Sampela long ol i bin kamap long opis bilong Wantok Niuspepa long Mande moning na autim wari bilong ol.

Mausman bilong dispela grup Peter Mallow Kunti i tokim Wantok olsem ol i strai kbikos ol plisman i save sasim ol na kisim nating ol laisens bilong ol. Ol plisman i save sasim

ol long taim ol i brukim ol liklik lo bilong trefik.

Mista Kunti i tok ol plis i save sasim ol long ol bas stop long Taun, Gordons na Boroko. Em i tok ol dispela bas stop ya i liklik tru na taim ol bas i kam pulap ol draiva bai traim long givim spes long narapela. Tasol taim ol i laik go aut liklik, ol plis i stap pinis long sasim ol.

"Ol plis i save kisim ol laisens bilong mipela na holim inap

Sam Vulum i raitim

mipela i givim K100 long kisim bek. Dispela K100 mipela i save kisim long fotnait. Olsem na taim ol plis i kisim nau mipela bai no gat mani long lukautim ol famili bilong mipela," Mista Kunti i tok.

Em i tok ol plis i stapim em long wok inap long 4-pela mun. Narapela yanpela draiva tu Kunjip Kupa bai i no nap

wok long 6-pela mun olgeta.

"Sapos mipela i mekim ran long hap bilong narapela bas o kilim wanpela man na plis i sasim mipela em i orait, bikos mipela i brukim lo," Mista Kunti i tok.

Mista Kunti i tok ol bai i straik inap long wanem taim Minista bilong Trensport na Plis i tokim ol long wanem samting bai ol

i ken wokim.

Tasol Asisten Plis Komisina Graham Ainui i tok ol plis i no nap holim wanpela man nating.

Em i tok, "Olgeta lo bilong trefik i wankain tasol. I no gat wanpela i bikpela na narapela i liklik. Sapos ol draiva i no bihainim ol dispela lo, plis i ken sasim ol. Sapos ol i stapim kar long long hap rot we i tambu em ol i brukim lo pinis.

Mipela i save olsem ol draiva i gat dispela

kain hevi, tasol mipela i mas sasim ol bikos ol i brukim lo bilong trefik.

Siaman bilong Len Trensport Bod Brian Amini i tok sori i go long pablik long wanem samting i kamap long Mande.

"Bod bai i sapotim ol plisman long lukautim lo. Tasol mipela i amamas long harim toktok bilong ol mausman bilong ol draiva na helpim ol long wanem kain wari ol i

gat," Mista Amini i tok.

Em i tok tu olsem Dipatmen bilong Trensport i bin luksave long dispela hevi pinis. Na ol i wok mekim wanpela stadi na Dipatmen i wok long toktok wantaim Nesenel Kapitel Distrik Interim Komisin long wok bung wantaim na stretim dispela samting.

Long Tunde moning ol bas i wok gen na karim ol pasindia.

Somare toksave gen long lo bilong PNG

LONG Fonde 23 Februeri 23 Minista bilong Foren Afeas, Michael Somare i bin givim wanpela bikpela ripot long Palamen long wanem samting dipatmen bilong em bai i mekim long ol man bilong narapela kantri husat i kam insait long Papua Niugini.

Dispela ripot i kam aninit long lo Mairesen na Sitsensip Ekt bilong Papua Niugini.

Mista Somare i tok taim ol opisa bilong em i wokim dispela ripot, ol i stapim 12-pela man long no ken kam insait long kantri. Na tripela man ol i

bin rausim pinis i go bek long kantri bilong ol.

Em i tok ol i laik kam bek gen orait ol i mas gat wanpela tok orait pepa, na tu bai em yet (Mista Somare) i mas givim tok orait bilong em.

"Ol opisa bilong mi i gat pawa long rausim ol man bilong narapela kantri long ol bikpela ples balus na ol bris. I gat 42 man ol i bin rausim pinis," Mista Somare i tok.

Em i tok long las wik na sampela wik i go pinis, ol niuspepa i bin karim planti stori long tupela long ol dispela man. Tupela ya em long Douglas Valentine, i save wok long Aviesen Sevises long Pot

Mosbi na Robert McCormack husat i statim Kaibola Hotel Risot long Trobrikan Ailen.

"Mi no nap yet long toktok long Valentine bikos ol samting i stap yet long han bilong kot. Tasol taim kot i pinis, bai mi tokim Palamen long wanem samting bai i kamap long em," Mista Somare i tok.

Em i tok Mista Robert McCromak i lusim pinis kantri long 17 Februeri 17. McCormak i nogat tokorait pepa long kam long Papua Niugini.

McCormak i wokim hotel long mani bilong em yet na ol pipel long dispela hap i givim em graun. Tasol taim ol

opisa bilong Foren Afeas i mekim painimaut n ol i painim olsem ol pipel i paul tru long wanem helpim ol i kisim long dispela hotel.

Mista Somare i tokaut long Palamen olsem dipatmen bilong em bai i no inap tru long larim ol man bilong narapela kantri i kam long Papua Niugini sapos ol i kam long wokim mani bilong ol o traim long bagarapim kantri.


"Mi no nap pret long rausim ol man husat i kam insait long kantri na wokim ol samting long helpim ol yet," Mista Somare i tok.




Mekim ol strongpela wok wantaim **HARDIFLEX • HARDIPLANK**



I no inap sting



Em i strong moa na i no inap bruk hariap



Ol binatang i no inap bagarapim



I no inap pala



Hardiplank Woodgrain

- I no dia tumas
- I ken raun long ol kain ples
- I save pasim strong bilong san na ol bikpela nois
- I isi long wok long en wantaim ol liklik tul
- Em i gutpela tru-i no gat asbestos o wanpela samting bilong kamapim paia long em

Hardiflex



Steamships

HARDWARE

HELPING TO BUILD THE NATION



HARDIE'S
fibre cement building products

Progrem bilong sanapim haus long taun

EBEN Hausing Infrastrakta em i wanpela progrem bilong helpim ol pipel insait long taun long wokim haus bilong ol. Na ol i makim pinis 6-pela senta long kirapim dispela nupela projek.

Ol dispela senta em Mosbi (Gerehu Saut), Wewak (Kreer), Lae (Boku), Hagen (Keabug), Milen Be (Alotau) na Goroka (Asaroka).

Minista bilong Hausing Gerard Sigulogo i autim dispela toktok long Palamen las wik.

Wanpela projek i wok long kamap tu nau em Eben Hausing i bin sainim pinis agrimen. Dispela agrimen em i stap namel long dipatmen na ol papa bilong graun long Lae.

Mista Sigulogo i tok dispela nupela projek bai ran inap 5-pela yia olgeta. Projek ya inap long K24.9 milien.

Em i tok dipatmen bilong em bai statim ol wok long tripela taun long dispela yia. Pe bilong kirapim projek long wapela taun bai inap long K5 milien.

Ol opisa bilong Hausing Komisen na Dipatmen bilong Hausing i bin sainim agrimen.

Dispela agrimen em namel long gavman na ol papa bilong ol dispela 6-pela eria long kantri.

Minista i tok ol papa bilong dispela graun em Agatu, Apopu, Busulum 1, Apo, Busulum 2, Awepek na Gwati. Ol papa bilong dispela graun i bin paitim toktok wantaim gavman inap sampela mun nau na ol i sainim agrimen.

Mista Sigulogo i tok ol asples i no salim graun. Gavman bai yusim dispela graun aninit long lis agrimen long wokim ol dispela haus.

Dispela ol agrimen em ol i sainim long 30 Januery namel long gavman na ol papa bilong graun. Ol dispela 6-pela grup i bilong ples Butibam.

Gavman bai painim mani long developim dispela hap graun. Na tu gavman bai helpim tu ol papa bilong graun long stretim gut graun bilong ol.

Memba bilong Mosbi Not Is, David Unagi i tok em i no amamas tumas. Bikos planti ol dispela kain progrem i kamap tasol i no gat wanpela progrem i karim kaikai.



•Unagi

Namaliu tok gavman i no inap marimari long Ona

PRAIM MINISTA Rabbie Namaliu i tok gavman bai i no inap larim Francis Ona i go fri sapos em i kamap ples klia. Em i tok Ona bai kisim taim sapos kot i painim aut olsem em i brukim lo.

Mista Namaliu i mekim dispela toktok long taim em i bekim ol askim bilong memba bilong Not Bougainvil, Michael Ogio.

Mista Ogio i laik save sapos i tru olsem Gavman bai marimari long Francis Ona. Ona em i lida bilong wanpela grup husat nau i hait long bus bihain long ol trabel i kamap long Panguna kopa main long Not Solomons.

Mista Namaliu i tok gavman na kampani bai i no inap givim K10 bilion long ol papa bilong graun. Lain bilong Francis Ona i bin askim long kompensesen long ol bagarap i kamap long graun bilong ol.

Em i tok i no gat wanpela gavman o kampani inap tromoi dispela kain mani. Dispela mani em bikpela tumas. na i no gat gutpela risen tumas long askim dispela kain mani (K10 bilion).

Gavman bilong Papua Niugini i sapatim pinis Bougainvil long kisim ol bekim long askim bilong ol.

Gavman na kampani igivim planti mani pinis long kamapim ol skul, helt sevis, rot na tu pulim ol pawa i go long ol wan wan ples. Dispela em ol bikpela helpim tru gavman i givim.

Mista Ogio i tok dispela kain marimari em gavman i tingting long givim Ona bai kamapim tu ol hevi long Misima, Porgera na Lihir gol main.

Minista bilong Jastis, Bernard Narokobi i sapatim tu Praim Minista na tok gavman i no inap marimari long Francis Ona.

Mista Narokobi i tok kot yet bai tokaut na askim NEC long givim marimari. Na i no gat wanpela minista o gavman i ken oraitim marimari bilong ol trabelman olsem Ona.

Mista namaliu i tok gavman bai i no inap givim K10 bilion. Tasol ol i redi logn kamap toktok wantaim ol papa bilong kampani long wanem kain helpim em ol i laik. Bikpela kampani BCL tu i wanbel long tingting bilong gavman.

Praim Minista i tok BCL i save givi ol kain helpim i bin stap insait long agrimen. Olsem na ol bai i no inap givim helpim long laik bilong ol pipel.

AT THE BANK OF SOUTH PACIFIC IT'S SO SIMPLE TO SAVE when you

Go for Goal!

Start a Bank of South Pacific 'Goal' Savings Account today...and you're on your way!

SAVE UP FOR

- 1 School Fees
- 2 Car Registration and Insurance
- 3 New Furniture
- 4 Airfares to home province
- 5 Loan Eligibility

All you have to do is decide on your 'Goal' when you open your account.

We give you a 'Goal' deposit book with K10 or K20 coupons.

When you want to make a deposit you just hand the money and the coupon to the teller. No fuss, no filling in forms.

...AND YOU GET BETTER INTEREST!

Because with a 'Goal' Account you do not withdraw until your goal is reached we can give you 6.5% interest on all savings over K100.

FILL IN THIS FORM AND TAKE IT ALONG TO YOUR NEAREST BANK OF SOUTH PACIFIC BRANCH.

Port Moresby, Boroko, Waigani, Lae, Mt. Hagen, Rabaul, Arawa, Kieta, Buka, Kundiawa, Banz, Wabag.

Goal

Kina 10 Deposit Book

Name: _____

Address: _____

I wish to open a **GOAL SAVINGS ACCOUNT**

My Goal is: _____

I expect to save K _____ per month.

GO FOR GOAL!
SAVE THE SIMPLE WAY
AT THE BANK OF SOUTH PACIFIC

CALLING ALL BANDS

Mipela salim samting bilong Musik...

Emplifaia
Spika
Miksa
Dram
Kibod
Maut Ogen
let bilong Gita
Skin bilong Dram
Ol Songbuk na Kodbuk
Mekim pairap bilong gita nating olsem pawa gita wantaim pick-up bilong gita.
K33.50 tasol.

Bateri Emplifaia bilong Gita L1D na BEIS K140.00 tasol Post Nating.

Rook's Radio, P.O. Box 191, Lae. P.N.G. Telefon: 424616

STAP ISI

("TAKE IT EASY")



Stap isi (Take it isi)

OL PIPEL bilong Papua Niugini i ken lukim wanpela video we i mekim ol pipel i luksave olsem pasin bilong paitim meri em i rong. Nem bilong dispela muvi em Stap Isi (Take It Easy). Na em i kamap long Tok

Pisin. Video i stori long wanpela famili bilong ples na narapela famili bilong taun. Papa bilong tupela famili i save paitim mama oltaim. Na i gat planti hevi i kamap we i bagarapim sindaun bilong famili. Na klostumarit bilong papamama i bruk.

Tasol tupela man i luksave long asua bilong ol na ol i traim stretim sindaun bilong ol na painim rot bilong abrusim pasin bilong paitim meri. Em i tru olsem long dispela muvi yu no inap long lukim man i paitim meri tasol yu inap long harim

mama i krai na ol samting pairap insait long haus long taim tupela i pait. Olsem na ol pikinini na ol yangpela pipel i ken lukim dispela muvi. Ol yut na sios grup na ol wimens grup na wanem ol arapela lain i ken yusim disepla muvi long givim skul long ol pipel.

Husat lain i laik kisim dispela video i ken salim pas i kam long dispela adres,

Women and Law Committee
C/-The Law Reform Commission,
P.O. Box 3439
BOROKO. NCD

Pasin pait i ken bagarapim meri na pikinini

Dokta i samapim maus bilong Naomi na tupela ai bilong em i bin solap nogut tru. Dorcas i bin kisim bagarap long planti hap bilong bodi bilong em na bun long tupela pinga bilong em i meme olgeta. Na bun bilong het bilong Margaret i bin bruk. Olgeta yia planti tausien meri long Papua Niugini i save kisim ol kain bagarap olsem ol dispela tripela meri ya. Na sampela bilong ol i save dai.

Tasol ol dispela meri i no kisim bagarap long taim ka i bam, o long han bilong ol raskal, nogat. Ol i kisim bagarap long han bilong man bilong ol yet. Ol i kisim bagarap long taim man bilong ol i paitim ol o domestik vailens.

Lo Rifom Komisn i bin mekim wanpela stadi long dispela kain pasin bilong paitim meri. Na long olgeta 6-pela meri ol i bin askim long Mosbi, wanpela meri i tok em i mas go long haus sik na kisim helpim bihain long man bilong em i paitim em. Na long hap bilong Hailans, klostu olgeta meri i bin tok olsem man bilong ol i save paitim ol. Sampela i tok man i no save paitim ol tumas, sampela i tok man i save paitim ol oltaim.

Planti taim ol bagarap ol meri i kisim long bodi bilong ol em ai solap, skin bilong helt o maus i bruk, bodi i pen

bikos man i paitim ol nabaut long bodi bilong ol. Wanpela meri i bin kamap long Mosbi haus sik bikos man bilong em i bin kaikaim em long planti hap tru long bodi bilong em. Sampela meri i save kisim bikpela bagarap tru we bun i bruk o we bikpela bagarap i kamap insait long bodi bilong ol.

Sampela meri i save dai long taim man i paitim ol. Ol arapela i kilim ol yet bikos ol i les pinis long man i paitim ol oltaim. "Spleen Killing" em i wanpela bikpela samting i save kilim ol manmeri long PNG. Man o meri husat i gat bikpela splin bikos long sik malaria, i ken dai sapos narapela man o meri i paitim em long splin bilong em. Planti meri i dai bihain long man bilong ol i paitim ol olsem.

Sapos man i paitim meri long het bilong em, yau bilong meri i ken pas, ai bilong em i ken bagarap o kru bilong em i ken bagarap. Dokta Burton Bradley, wanpela sevisman bilong mental helt long PNG i tok olsem sapos man i paitim narapela man long hat, bai i ken kamapim bagarapim long kru. Em i lukim planti manmeri i kisim bagarap long het bikos bipo sampela lain i bin paitim ol long het bilong ol. Em i tok mobeta no ken tru paitim man o meri o pikinini long het bilong ol.

Ol man tu i ken kisim bagarap sapos meri i paitim ol. Tasol planti taim man

i save statim pait pastaim na meri i belhat na bekim pait.

Ol pikinini i save kisim taim sapos papamama bilong ol i pait oltaim. Planti liklik pikinini i save kisim bagarap bikos ol i holimpas mama long taim papa i paitim mama na papa i abrus bai em i paitim pikinini. Na ol bikpela pikinini tu i ken kisim bagarap long taim ol i go long helpim mama bilong ol. Sapos meri i gat bel na man i paitim em, pikinini i ken kisim bagarap. Sampela taim bebi i save dai long bel bilong mama.

Sapos papamama i pait oltaim na ol pikinini bilong ol i lukim bai tingting bilong ol i paul. Ol bai wari oltaim. Sampela bilong ol bai bikhet tumas na sampela bai i pret oltaim o i no inap long toktok tumas. Long skul bai ol i no inap long wok gut. Na long taim ol i bikpela na i marit bai ol i no inap stap gut bikos ol bai mekim wankain pasin papamama bilong ol i save mekim.

Pasin bilong pait i save kamapim bikpela hevi long famili. Na disepla hevi i ken kamapim hevi tu long komyuniti. Wok painimaut bilong Lo Rifom Komisn i soim olsem pait namel long ol marit em i bikpela as bilong planti marit i bruk. Moa hevi gen i kamap bikos long taim marit i bruk, no gat man i lukautim gut ol pikinini na planti bilong ol i kamap raskal. Dispela

pasin i kamapim moa hevi blong lo na oda long kantri.


I gat senis i wok long kamap nau long daunim dispela hevi. Lo Rifom Komisn na wok bilong Wimen na Lo Komiti i mekim planti pipel i ritim ol toksave na luksave olsem pasin bilong paitim meri i mas pinis nau. Bikos dispela pasin i kamapim moa hevi insait long famili laip na tu long komyuniti. Ol sios grup, yut grup, wimens grup na ol arapela lain olsem i bung wantaim nau long salim toksave long ol pipel long stapim dispela pasin.

Helt Dipatmen i salim ol posta na tok-save pepa i go long ol etpos, klinik, helt senta na ol haus sik long kantri. Na i gat wanpela video i redi nau. Ol pipel i ken lukim dispela video, "Stap Isi".

Ol plisman tu i wok long helpim ol meri husat i bungim kain hevi olsem long han bilong man bilong ol. Long taim ol marit i pait na ol plisman i kamap, ol i ken sasim man sapos meri i tok orait. Edukesen Dipatmen tu i helpim wok bilong toksave. Ol i salim ol toksave pepa long ol skul.

Ol meri husat i askim distrik kot o lokal kot long Good Behaviour Bond i no hatwok tumas long kisim dispela helpim long mejistret. Na long viles kot, ol mejistret i wok long yusim preventive oda long helpim ol meri husat i painim dispela kain hevi.

LO I TAMBUIM PASIN PAITIM MERI



I RONG LONG MAN I PAITIM MERI BILONG EM, BIKOS

- Lo bilong Gavman i tambuim
- Konstitusen bilong PNG i tambuim
- Kristen bilip i tambuim

Sindaun gut long komyuniti

SAMUEL i stap nau long wanpela liklik taun ol i kolim Aske. Em i bin bikpela klostu long Aske na kisim save na kamap wanpela komyuniti skul tisa. Em i lusim wok tisa na stap long wanpela kos long helpim ol pipel long komyuni-

ti i stretim sindaun ol. Long dispela kos em i kisim bikpela save long wok wantaim ol pipel na harim gut ol hevi bilong ol.

Em i go stap long Aske wantaim famili bihain long dispela kos. Em i wok long gaden bilong wanpela bikman long Aske.

Taim em i no wok em i raun long taun na harim toktok bilong ol pipel.

Em i poromanim planti pipel long Aske na planti taim em i bung na toktok wantaim ol. Na em i harim gut ol hevi bilong ol.

Planti pipel long Aske i kamapim tingting pinis olsem sindaun bilong ol i no inap senis. Tasol Samuel i mekim sampela askim long kirapim tingting bilong ol pipel long stretim sindaun bilong ol. Ol pipel i luksave olsem Samuel i harim toktok na hevi bilong ol na em i laik helpim ol.

Em nau ol i askim em long toktok long ol yut, ol meri na ol arapela lain long komyuniti. Samuel i kamapim sampela tingting long autim strongpela toktok long

helpim ol pipel na em i autim ol dispela tingting long ol poto, na toktok na long ol pilai tu.

Long ol dispela samting em i soim ol pipel long ol hevi bilong ol na askim ol long ol pasin ol i ken stretim ol dispela hevi. Ol pipel i luksave nau olsem ol yet i ken stretim ol hevi ol i painim long sindaun bilong ol.

Wanpela bikpela hevi ol man bilong Aske i bungim em bilong ol pipel long baim ol kaikai long ol bikman i stap long Aske long lukautim famili bilong ol.

Taim Samuel i toktok long ol, ol i luksave olsem ol i gat wanpela liklik hap graun i stap nating klostu long wara.

Ol i bungim liklik

- The Pulse- pes 16
- Toksave bilong ol helt woka- pes 16
- Ol helt woka na pait bilong ol marit- pes 16
- Epril 17 Wol Helt De- pes 16
- Ol birua em dring i save kamapim- pes 14
- Stori bilong ol sik nogut- pes 14
- Ol helt woka long Kerowagi kirapim narapela kain progrem- pes 16

Stori bilong ol sik nogut bipo na AIDS

WANPELA bikipela askim long dispela taim i stap olsem. Sik AIDS i kam long wanem hap tru? Wanpela gutpela pasin bilong save gut long bekim bilong dispela askim em long lukluk long ol arapela bikipela sik nogut i bin kamap long wol bipo.

Namel long yia 1100 na 1200 ol kantri long Yuro i stap orait tasol. Ol pait i no kamap na ol pipel i groim planti kaikai. Long dispela taim namba bilong ol pipel i kalap long 25 milien i go antap long 75 milien.

Tasol long yia 1300, ples i kol na ol kaikai i no kamap gut. Planti pipel i bung wantaim long wanpela hap na ol taun i doti tru. Ol rat i pulap tu long ol dispela ples.

Long dispela taim wanpela sik nogut ol i kolim Bubonic Plague i stap pinis long Asia tasol i no planti lain i gat dispela sik. Ol rat i save karim dispela sik na ol pipel husat i slip nabaut long bus long ol ples ol dispela rat i bin stap i kisim dispela sik.

Wanpela binatang i karim ol jerm bilong dispela sik long rat i gat sik na givim long narapela rat.

Dispela jerm nogut i kalap tu long ol man tu na givim sik long ol. Taim ol man husat i gat dispela sik i raun long narapela ples orait ol i givim dispela sik nogut long ol lain husat i stap long dispela hap.

Long yia 1343 dispela sik i kamap long Yuro. I no long taim na dispela sik i kilim moa pipel i bin dai bihain long dispela taim tu. Tasol sampela lain husat i bin kisim dispela sik nogut i no

dai. Skin bilong ol i strong na kilim ol binatang nogut. Ol dispela lain i no inap kisim dispela sik nogut gen. Dispela em i wankain olsem sik misels. Sik misels (measles) i save givim strong long bodi i kilim ol arapela binatang nogut.

Bubonic Plague i bin kamap bikipela bikos planti pipel i bung na stap wantaim long wanpela hap, ol haus i no gutpela tumas, em i isi long ol pipel husat i gat dispela sik i bin raun long planti arapela hap na no gat marasin long stretim dispela sik nogut.

Pastaim tru bodi i nogat strong long pait wantaim ol binatang bilong dispela sik nogut. Wankain samting i kamap taim smol poks i kamap long Saut Amerika. Long dispela taim i bin gat 25 milien pipel. Taim dispela sik i kamap 15 milien pipel i dai. Smol poks (small pox) i bin kamap long kus na i no long wanpela binatang o animal.

Ol jerm i save kamapim ol kain kain sik. Olsem ol natnat i save kamapim sik malaria. Sik rabies i save kamap long tit bilong ol dog. Ol peklek na pispis save kamapim sik taipoid (typhoid) na kolora (Cholera). Ol sik olsem sifilis, gonoria na AIDS i save kamap taim ol lain husat i gat dispela sik i slip wantaim ol lain husat i no sik.

Nau yumi go bek long askim bilong yumi. AIDS i kamap long wanem hap tru. Taim Bubonic Plague i kamap ol pipel i bin ting olsem wanpela man i bin poisinim ol. Sampela lain i tok olsem ol masalai i kamapim dispela sik. Bihain ol pipel i luksave olsem wanpela binatang i kamapim dispela sik.

Wankain tingting i kamap taim sik

Kolora (Cholera) i kilim planti lain long Amerika. Ol pipel i tok olsem ol pipel i dai long dispela sik bikos ol i les long wok. Ol arapela lain i tok olsem ol pamuk i kamapim dispela sik. Taim influensa i kilim planti lain long 1918, ol lain bilong Inglan i tok olsem ol Frans i kamapim dispela sik. Ol pipel i no save olsem wanpela jerm nogut i bin kamapim ol dispela sik. Nau ol pipel i tok olsem pamuk pasin i kamapim sik AIDS. Tasol ol liklik pikinini i gat AIDS tu. Long ol arapela kantri ol pipel i kisim AIDS taim ol i kisim blut bilong ol man husat i gat AIDS.

As bilong ol dispela toktok i stap olsem. Olgeta sik i gat as na i no inap kamap nating. No gat man i save tru long wanem samting i bin kamapim sik AIDS. Tasol i luk olsem sampela senis i bin kamap long sampela jerm. Ol dispela jerm i kalap long ol animal na bihain ol i kalap long ol pipel.

Ol i bin luksave long AIDS long blut bilong sampela lain bilong Afrika long 1959. Tasol i luk olsem dispela sik i bin stap longpela taim long ol arapela hap long wol tu.

Bikipela samting nau, em yumi save pinis long olsem wanem AIDS save kalap long ol arapela man. Olsem na yumi ken toksave long ol rot bilong abrusim dispela sik. Tasol AIDS em i narakain long ol arapela sik nogut i bin kamap bipo. I no gat wanpela marasin long stapim AIDS. Yu ken kisim dispela sik taim yu slip wantaim ol lain husat i gat jerm bilong sik AIDS. Yu inap long kisim jerm bilong AIDS tasol dispela sik i no inap kamap ples klia inap 5-

pela yia i pinis. AIDS i ken kamap taim yu kisim blut bilong ol lain husat i gat AIDS. Na ol mama husat i gat AIDS i ken givim dispela sik long ol nupela pikinini bilong ol tu. AIDS bai stap long bodi longpela taim tru. Bihain bai sikman o meri i dai.

AIDS em i wanpela nupela sik na em i narakain long ol arapela sik. Tasol yumi save pinis long pasin dispela sik save kalap long ol arapela. Olsem na yumi ken stapim dispela sik i kamap bikipela moa. Yumi save pinis. Na tingim ol dispela samting tu,

• Raun wantaim wanpela man o meri tasol. Yu no inap kisim AIDS.

• No ken slip wantaim ol pamuk lain.

• Yusim kondom sapos yu laik slip nabaut wantaim ol arapela lain. Kondom i no gutpela tumas, tasol ol i ken banisim AIDS.



• Sapos yu gat kain sik olsem Sifilis o Gonoria orait lukim ol dokta na kisim marasin hariap bilong pinisim dispela sik. Yu mas tokim man o meri bilong yu long lukim ol dokta tu.

• No ken yusim ol nil i doti long putim mak long ol skin o long givim sut long ol siklain.

• No ken spak. Spak i ken bagarapim tingting na yu no inap save taim yu slip wantaim ol lain husat i gat AIDS. Wanpela bia long wan wan aua em i gutpela.

Sapos yu laikim sampela moa toksave long ol dispela toktok, rait i kam long STD/AIDS Unit P O Box 3991 Boroko.

Strepela pasin bilong katim rop



LONG Janueri "PNG Helt Nius" i bin autim sampela ol toktok long rot bilong helpim ol mama i karim. Planti ol man i no klia gut tumas long rot bilong katim rop bilong bel bilong bebi na mama. Lukim 3-pela piksa daunbilu.

1 Taim mama i karim pikinini, pulim rop na rausim blut na pasim long hap hap. Taim yu rausim blut orait rausim i go long pikinini.

2 Orait bihain kisim hap rop na taitim long hap hap.

3 Yu kisim naip, resa o sises na katim namel long tupela hap we yu taitim. Dispela naip, resa o sises i mas stap long hat wara taim yu laik yusim.

Sampela ol pipel insait long komyuniti i gat ol rop na ol i tu ol klinpela resa o naip long mekim dispela wok. Yu mas askim wokman bilong helt long givim saplai o trening long yu.

Ramu Suga helpim helt progrem

LONG DESEMBA 1988, Ramu Suga kampani i givim samting olsem K1,000 i go long Divisen bilong Helt long Kaiapit, Morobe provins. Ol i yusim dispela mani long ranim Viles Birth Attendant woksap. Ol i bin makim ol wanwan meri long sindaun long dispela woksap. Na ol i givim skol long gutpela rot bilong mama i karim. Dispela liklik woksap i ran inap tupela wik olgeta. Insait long dispela skol, ol meri i inap long ol mama i bin kamap long wan de skol. Ol i kamap long kisim skol bilong kamapim pikinini na tu mama i karim. Helt Divisen i givim skol long ol dispela lain. Morobe Provinsal Helt Dipatmen na Project Concern Intanesenel (PCI) si bin go pas longranim dispela kos Village Birth Attendant Project.

I gat ol buk

Dia Edita, Mipela i amamas na kisim planti save long ol stori i kamap long PNG Helt Nius long TB, Leprosi na ol arapela sik nogut i ken kamap long ol arapela sikman. Leprosi misin i save raitim ol buk, mekim ol arapela samting na kamapim ol bung bilong toksave long ol helt woka long ol pasin bilong pasim luksave olsem em i bin gat ol sain bilong dispela sik. Em i go lukim ol dokta na ol dokta i luksave long dispela sik long dispela man. Em i kisim marasin nau long stretim dispela sik. Dispela yangpela man i bin ritim stori bilong Stan long PNG Helt Nius.

Edita.

Sindaun gut long komyuniti

manu ol i bin gat na rentim dispela hap graun. Bihaun ol i bung na digim dispela graun na planim ol kaikai. Taim kaikai i redi ol i salim sampela na sampela ol i kaikaim. Sampela pikinini kaikai ol i putim bilong yusim long bihaun taim. Tasol bikipela samting ol i painim em olsem, ol pipel i ken stretim ol hevi bilong ol sapos ol i bung wantaim na wok. Bihaun ol i baim dispela graun na yusim ol winmani long stretim gut sindaun bilong ol. Ol meri tu save painim hevi long kisim taim long karim wara long longwe hap i kam long Aske. I gat wanpela hul wara klostu long Aske tasol ol animal save bagarapim. Samuel i bintoktok wantaim ol na ol i klinim na banisim dispela wara. Ol i larim liklik wara bilong ol animal i yusim i kam aut tu. Bihaun ol i amamas na tokaut olsem ol yet i bin stretim dispela hevi. Nau ol meri i askim Samuel long lainim ol long gutpela pasin bilong lukautim ol pikinini bilong ol. Samuel i askim wanpela helt woka i kam long skolim ol meri long ol dispela pasin. Dispela woka i bihaun im pasin bilong Samuel na harim gut ol na wok tu long stretim sindaun bilong ol. toktok bilong dispela helt woka tu na bihaunim ol toktok em i mekim. Nau ol meri i kamapim strongpela tingting long oraitim sindaun bilong ol. Sampela yia i pinis na ol meri i luksave olsem ol i ken mekim wankain wok olsem ol man ol stretim sindaun bilong ol. Ol lain husat i no skul na i nogat planti mani i autim tingting bilong ol na wok tu long stretim sindaun bilong ol.

INDIPENDEN STET OV PAPUA NIUGINI
DIPATMEN BILONG LEBA

HIA EM OL NUPELA PE BILONG OL WOKMAN LONG OL LEVEL 1 NA LEVEL 2 TAUN NA SITI. DISPELA NUPELA PE BAI STAT LONG MAS 1, 1989. NA EM I BIHAINIM TOKTOK BILONG KONSUMA PRAIS INDEKS HUSAT I TOK PE BILONG OL SAMTING I GO ANTAP LONG 5 PESEN LONG DISPELA TAIM. NA TU EM I GO BEK INAP LONG JANUERI 1, 1989.

OL LAIN PIPEL BILONG FOTNAIT	OL LEVEL 1 NA SITI		OL LEVEL 2 TAUN	
	BILONG WIK	BILONG FOTNAIT	BILONG WIK	BILONG FOTNAIT
	K26.95	K53.90	K22.75	K45.50
	K53.91	K107.82	K45.90	K91.00
Klas 1	K57.22	K114.44	K48.92	K97.84
Klas 2	K60.96	K121.92	K52.77	K105.54
Klas 3	K65.76	K131.52	K57.85	K115.30
Klas 4	K71.52	K143.04	K71.52	K143.04
Klas 5 Ol tredsmen i gat setifiket (B1) (B2)	K77.28	K154.56	K77.28	K154.56
Klas 6 Ol tredsmen i gat setifiket Klas A	K83.06	K166.12	K83.06	K166.12

LONG AS PLES - Nesenel Minimum Pe - (no ken bai aninit long dispela mak) em K20.11 long wik na K40.22 long fotnait.
OL YUT - Long 26 Jun 1988 Minimum Wage Bot i pinisim Junior Wage Skel. Nupela pe bilong ol yut bai stat long 26 Jun 1989. Nupela pe em i osem: Long ol Level 1 o Level 2 taun/siti em 50 pesen long pe bilong ol jenerei leba. Dispela skel em bilong ol lain i stat wok binain long 26 Jun 1988. Sapos yu stat wok bipo long 26 Jun bai yu mas stap Junia inap long taim yu winim 22 yia. Sapos yu kisim wanpela gut gur long wok.

DR. R. KEKEDO, OBE.,
Secretary for Labour and Employment.

Ol birua em dring i kamapim



HIA em ripot bilong Transpot Dipatmen long ol birua i bin kamap long rot bihain long ol man i dring spak na draivim ka. Dispela ripot i bilong 1987.

- 1) 731 birua i bin kamap bikos man i bin dring na draivim ka;
- 2) 1,080 ka i bin bam
- 3) 77 pipel i bin dai;
- 4) 309 pipel i slip long haus sik;
- 5) Narapela 280 pipel i bin kisim bagarap tasol ol i no go long haus sik;
- 6) 217 birua i bin kamap long NCD; 101 long Morobe
- 64 long Is Nu Briten
- 50 long Not Solomons

na aninit long 50 birua i kamap long ol arapela provins.

Galp provins i stap daunbilu tru. I no gat ripot bilong ol birua we man i dring na kamapim birua long rot.

Manus i gat wanpela birua na Wes Sepik i gat 2-pela tasol.

Smok i save kamapim sik kensa

Tobacco or Health Choose Health



SIK KENSA em wanpela hevi tru long ol kantri olsem Papua Niugini. I gat samting olsem 6 milien ol nupela sik kensa i save kamap long olgeta hap bilong wol. Na samting olsem 3 milien i save kamap long ol developing kantri olsem Papua Niugini.

I gat as na planti ol man i kisim dispela sik kensa. Planti ol pipel i save smok tabak. Taim ol i pulim smok ol i save kisim sik kensa long lewa, nek na maus. Pasin bilong kaikai buai em wanpela as bilong kamapim sik kensa long maus.

Planti pipel nau long ol developing kantri nau i save olsem pasin smuk i no gutpela tumas. Na tu smok i ken bagarapim ol lain husat i stap klostu long yu na pulim win tasol maski ol i no smuk.

Ol Smok kampani nau i salim planti smuk bilong ol tru long ol dispela kantri. Planti pipel long rureleria i no klia gut

sapos ol i smuk planti ol i ken kisim sik kensa. Sik Kensa long lewa i hat tru long pinisim. Na planti ol pipel i kisim dispela sik i save dai hariap tru. Ol mama i bel na smuk bai bagarapim pikinini bilong ol. Ol

ai bilong ol arapela. Tabacco kampani i sae givim helpim o sponsa mani i go long ol spot olsem ragbi lig, tenis na planti ol arapela spot. Ol i save yusim nem bilong ol smok wantaim nem bilong ol top pilaita long ol dispela gem. Tasol planti ol rana i save smuk i save bagarapim skin bilong ol. Pasin smok i kamap bikipela bikos taim ol wantok i kam, em i namba wan samting bilong toktok na amamas. Taim man i stap long smok ol i save painim hat tru long pinis.

Gavman i kamapim pinis wanpela Ekt Tabacco Prodak Ekt, 1987. Dispela em lo bilong lukautim ol smuk kamapim long noken yusim ol nuspela long tokaut long smuk bilong ol. Na ol i no ken salim ol smuk long ol lain husat krismas bilong ol i aninit long 18. Sapos kot i painim aut ol i brukim dispela lo bai kisim taim stret. Ol bai tromoi K1,000 long baim kot sapos no gat i go kalabus.

pinis. Olgeta 13 sekens, i gat wanpela man i dai long sik kensa. Tapak em i gat bikipela nem. Bikos ol i save kamap long muvi piksa na TV. Ol laik soim olsem taim yu smuk bai yu luk smat, na luk nais long

Ol helt woka na pait i kamap namel long ol marit

Pait i kamap namel long wanpela man na meri bilong em i ken kamapim bikpela birua long bodi na bagarapim helt bilong ol. Em i wok bilong yupela ol helt woka long givim marasin na pasim sua.

Tasol i gat narapela wok yupela i ken mekim tu. Traim long helpim man o meri long stapim dispel pasin bilong pait. Planti ol helt woka i save sem long mekim olsem bikos ol i tok

em i samting bilong tupela marit long stretim. Tasol tingim lo i tok em i tambu long paitim narapela man o meri.

Sampela pipel i ting sapos man i baim meri pinis, orait i no gat tok sapos em i paitim meri bilong em. Tasol dispela kain tingting i rong tru.

Aninit long lo bilong Papua Niugini, em i tambu long paitim narapela man o meri. Pasin bilong paitim man o meri bilong yu i rong bikos dispela pasin i brukim lo

bilong kantri. Dispela pasin bilong man i paitim meri bilong em i mas pinis nau. Ol pipel i mas luksave na pinisim dispela pasin nau. Na yupela ol helt woka i ken helpim ol pipel long stapim dispela pasin bilong paitim meri.

I gat planti rot yu inap bihainim long stapim dispela kain pasin long komyuniti bilong yu. Yu inap mekim olsem:

• putim posta ya "Lo i Tambuim Pasin Paitim Meri" long wol long etpos o klinik we

olgeta pipel i ken lukim.

• kisim ol liklik tok-save pepa em ol meri husat i gat dispela hevi i ken yusim long kisim helpim. Na givim ol dispela tok-save pepa i go long ol pipel long komyuniti. Yu ken kisim ol dispela toksave pepa long Tok Pisin, Hiri Motu o Inglis long dispela adres, Women and Law Committee, P.O. Box 3439, BOROKO, Telepon 258755.

• Long taim wanpela meri husat i kisim

bagarap long pait i kam long klinik o etpos, orait yu ken tokim em olsem yu inap raitim ripot bilong bagarap em i kisim sapos em i laikim dispela ripot (medikal setifiket). Na sapos yu ting olsem em i kisim bagarap long bodi bilong em i bikos man i paitim em, orait yu mas raitim stret long kat bilong em. Yu mas raitim tu dispela toktok long medikal setifiket na putim nem na mak bilong yu long en.

• Yu mas raitim daun ripot bilong ol kain bagarap olsem ol meri i kisim long taim man i paitim ol. Sampela bilong ol bai i laikim dispela ripot bihain long helpim kot bilong ol.

• Go toktok long ol lokal komyuniti grup na ol skul. Toksave long ol long wanem kain bagarap long dispela kain pasin bilong pait inap long kamapim.

• Sapos i gat masin bilong soim video, orait stretim rot bilong soim dispela

video "Stap Isi". (Yu ken kisim long Women and Law Committee o long provin-sal hetkota bilong yu.)

• Yu yet i soim gut-pela eksampel na no ken mekim kain pasin olsem long man o meri bilong yu.

Yu ken helpim ol yangpela pipel bilong yumi long luksave long dispela pasin nogut na ol i ken abrusim dispela kain hevi i kamap long famili bilong ol long bihaintaim.

Toksave bilong ol Helt Woka

DIPATMEN bilong Helt i gat planti ol toksave pepa bilong imunaisesen long Tok Inglis, Tok Pisin na Hiri Motu. Em i tru olsem imunaisesen Wik i pinis, tasol wok bilong toksave long ol manmeri em i samting i save kamap olgeta de. Dipatmen i gat tu ol toksave pepa bilong Smok na ol Helt toksave long Tok Inglis. Dipatmen bai i salim sampela i kam long yupela na yupela i ken putim long ol klinik, etpos, helt senta na givim long ol skul tu. Toksave long mipela sapos yupela i nidim moa.

7 Epril em i Wol Helt De

DIPATMEN bilong Helt bai salim sampela toksave pepa i kam long helpim yu long tingim dispela bikpela de. Em i gutpela sans tu long stretim sampela samting ol skul long hap bilong yu i ken wokim long Wol Helt De. Yupela i ken redim tu ol toktok bilong putim long radio, toktok long ol pipel na kamapim sampela samting bilong tingim dispela spesel de.

Helt opisa statim progrem bilong helpim sikman

Stori kam long SIMBU NIUS



• Ol APO bilong Kerowagi distrik wantaim Gabriel bihain long kos

OLGETA Helt Ektensen Opisa insait long Kerowagi distrik long Simbu i karimaut wanpela projek nau long stapim wanpela sik ol i kolim

nimonia. Antap long hailans na long nambis, ol pikinini husat i no save kaikai gutpela kaikai long kamap strong i save dai long sik imonia. Ol pikinini husat em krismas

bilong ol i stat long 5 na go daun i ken dai isi tru long dispela sik.

Bikpela as bilong karimaut dispela projek em long daunim namba bilong ol pikinini husat i save

dai long nimonia. Wol Helt Ogenaisesen (WHO) i givim mani long karimaut dispela projek.

I gat tupela bikpela as bilong karimaut dispela projek. Namba wan em long klianin ol pipel long aidia bilong stapim dispela sik. Namba tu em long skulim ol mama long we bilong luksave long dispela sik. Na tu long we bilong stapim hariap bipo long pikinini dai.

Dispela projek i bin stat long 1987. Dispela taim olgeta Helt Ektensen Opisa bilong Kup na Kerowagi i bin kamap long Kundiawa Haus sik long wanpela Insevis trening.

Insait long dispela trening ol i painimaut olsem ol i no ken ting olsem nimonia na sik sotwin em tupela narapela kain sik. Bikos dispela tupela sik em ol i ken stapim long wankain marasin tasol. Olsem na ol i mas sekim tasol long lukim sapos pikinini i

kol, sotwin, i no kaikai gut o kus. Dispela em long sekim na lukim sapos nimonia i strong tru, i no strong tumas o liklik tasol.

Insait long dispela trening ol i senisim tu wanem kain marasin ol bai givim long ol pikinini husat i kisim nimonia na sik sotwin.

Aninit long ol dispela senis, ol pikinini husat i no kisim strongpela nimonia i no inap long kisim marasin. Ol bai tokim mama tasol long we bilong lukautim pikinini long haus long stapim dispela sik.

Long Septemba, bai sampela opisal bilong WHO na ripresentativ bilong olgeta provin-sal helt senta bai bung long wanpela woksop. Dispela woksop bai i kamap long Wara Simbu Trening Senta.

As bilong holim dispela woksop em long soim ol arapela provins long kamapim kain projek olsem.

The Pulse

* **Metron Maniana bilong Sekeonderi Helt Sevis bai i go pas long wanpela woksop long Hagen. Dispela kos i bilong Supavaisori skils bilong ol sista. Na kos bai i kamap long 20 i go inap 24 Mas.**

* **Asisten Seketeri bilong Disis Kontrol, Dokta Timothy Pyakalia i go long wanpela woksop bilong Malaria Kontrol long Honiara, Solomon Ailan. Mista Leo Makita bilong Disis Kontrol na tupela opisa bilong Wol Helt Ogenaisesen, Dokta Manitary na Mista Habash i go tu long dispela woksop.**

* **Mista Muka Hairoi wanpela Malaria rises opisa bilong Disis Kontrol i bin go long Manus long 19-26 Februari. Em i go skulim ol helt woka long pasin bilong putim marasin long ol taunam.**

* **Bai 4-pela opis bilong NBC na Dipatmen bilong Helt i go long wanpela woksop bilong Stapim sik AIDS long kalap long ol pipel. Dispela woksop i kamap long Suva, Fiji long 27 Februari i go inap long 3 Mas. Opisa bilong NBC em Kosma Apelis na ol opisa bilong Helt Dipatmen em Byron Geniembo, bilong Helt Edukesen, James Mullally na John Tawai bilong STD/AIDS yunit. Wol Helt Ogenaisesen i go pas long dispela woksop.**


* **Enoch Posanai, Nesenel Kodineta bilong Nutrisen i bin go stap insait long Hailans rijonal woksop long nutrisen. Dispela woksop i bin kamap long 20 Februari i go inap long 23 Februari.**

* **Johnathan Yali (DOH/Het**

Edukesen) na Barry Karlin (WHO) i bin go long Hagen long stretim wok bilong Rijonal Helt Edukesen woksop em bai kamap long Hagen na Madang long mun Jun na Julai. Helt Edukesen i kisim moa helpim nau long Dipatmen bilong Helt. Tupela samting ol i wok long kamapim nau em "PNG Helt Nius na AIDS edukesen.

Tingim Helt

Tingim Helt em i komyuniti helt progrem i save kamap long EM TV long Sarere moning long 9.30am na long belo long Sande na long 10.30pm long Mandenait.



MERCEDES — BENZ

COMMERCIAL VEHICLES

THE NEW HEAVY TRUCK CLASS

FLEET RUNNER



2235

Our Commitment to your Success




Meridian Motors


PORT MORESBY - 25 2477, LAE - 42 2869

BAIBEL KOMIK

Ol wok bilong ol APOSEL




Pol i redi long go long Rom. Na em i salim wanpela pas i go long ol lain Kristen long Rom.



Pol i pinisim wok long Korin na em i laik go long Jerusalem long pestode bilong Pasova. Tasol ol birua bilong em i kisim tok pinis.

Em nau wanpela gutpela moning, sip i redi long luslain long basis long Korin.....



Bisop Michael Marai i lukautim Goroka nau

LONG Fonde 23 Februari, Pater Michael Marai i kamap Bisop bilong Goroka. Em i wanpela diosenen pater long daioses bilong Wewak.

Krismas bilong Bisop Michael em 40 na em i bilong Mushu Ailen klostu long Wewak. Em i namba tu man long kamap pater long Wewak Daioses. Bisop Michael i bin namba tu bos bilong Wewak

Daioses long dispela 3-pela yia i go pinis.

Taim em i kamap pater namba wan wok bilong em i olsem wanpela tisa long Tanguto Pastorel Senta long Wewak.

Bihain long dispela na wanpela kos em i wokim long Sydney, em i kamap olsem pater bilong Passam Katolik Misin. Na tu em i bin pater bilong Wiru Peris na Boikin Katolik Misin.



•Pater Michael Marai na papa bilong em i sanap na redi long go long alta. Long baksait yu ken lukim Pater Cherubim Dambui i sanap. Pater Marai i kamap bisop las wik.

Asbisop bilong Madang Leo Arkfeld i blesim em long Kefamo. Bisop Leo tu i bin givim sacramen bilong Ordo long bisop Michael long 1976. Bisop Marai bai i kisim ples bilong Bisop Raymond Caesar, SVD, husat i dai long Jun 1987.

Samting olsem 100 manmeri i bin kamap long dispela bung wantaim. Planti bilong ol man ya i bilong Is Sepik. Ol i bin kisim balus i go long Goroka long olgeta hap bilong kantri.

Ol singsing tumbuna bilong Wewak, Madang, Simbu, Goroka, na Rabaul i bin kamap long amamasim dispela de.

TU MINIT TINGTING

FRANK MIHALIC i raitim

Kamap wanbel wantaim God

LONG wanpela liklik taun long kantri Inglan, tupela man i save tok kros na tok pait inap long planti planti yia. Orait, nau Petrik em i wok long dai. Meri bilong em i wari moa long em na i go singautim pris long pre wantaim em. Meri i tokim pater olsem, "Petrik i bin pait inap planti yia wantaim Maikel. Petrik i wok long dai nau. Inap yu ken stretim dispela kros bilong tupela?"

Orait, Pater i kamap nau na i toktok planti wantaim Petrik. Petrik i tanim bel nau na em i orait long stretim tok wantaim Maikel. Orait, ol i singautim Maikel i kam. Nau em i sanap klostu long bet, na i tok, "Petrik, yumi sekan gen. Maski long ol tok kros; yumi pinisim nau inap oltaim."

Orait, Petrik i givim han long Maikel, na tupela i sekan. Na bihain liklik, Maikel i wok long lusim rum na go bek long haus bilong em. Petrik i lukim em na em i kros yet. Em i brukim han bilong em na i tromoim long Maikel na tok olsem, "Sapos mi no indai, orait, dispela pait namel long mitupela i mas i stap yet."

Em i gutpela eksampel bilong man i giaman long tanim bel.

Tanim bel i min: yumi kamap wanbel wantaim God, olsem Sen Pol i tok. (2 Korin 5:17-21) Wanbel i min: laik bilong mi i mas bihainim long God, olsem yumi save beten long "Papa bilong mipela" (Matyu 6:10). Sapos mi mekim olsem, bai kingdom bilong God i kam insait long mi.

Long narapela ples Sen Pol i tok olsem: "Laik bilong God em i olsem: yupela i mas kamap holi." (1 Tes. 4:3) God i save olgeta samting na em i

save tumas. Olsem na em i save stiaim olgeta samting long laip bilong yumi, bai yumi ken kamap holi. Tasol yumi hatwok tru long bilipim na bihainim dispela tingting.

Sampela taim yumi save tingting olsem: bilong wanem God i no mekim mi gutpela? Em inap. Em i God. Em i strong olgeta. Em bikos em i bin givim wanpela fridom long mi, dispela samting yumi save kolim "fri wil." Dispela i min, mi fri long bihainim laik bilong God o nogat. God i no save givim heven nating long yumi. Nogat. Yumi mas mekim sampela wok tu long kamap long heven.

Sot kat tru bilong winim heven em i dispela bilong bihainim laik bilong God long olgeta samting i kamap long laip bilong yumi. Maski gutpela taim o taim nogut i painim yumi, tupela wantaim i bin kam long han bilong Gutpela God tasol.

Sampela Karismetik i save trenim tingting bilong ol long dispela we. Maski wanem samting i kamap, maus biong ol i save tokaut olsem, "Pres i go long Bikman. Litimapim nem bilong Bikman."

Long gutpela taim, em i isi long tokaut olsem. Tasol long taim ol samting i paul nabaut, em i no isi. Santu tru em inap tok olsem; yumi ol manmeri nating, yumi hatwok tru. Dispela tok i pas insait long nek bilong yumi. Em i no laik kamaut.

Olgeta taim yumi save beten, "Ol i mas bihainim laik bilong yu long graun olsem ol i bihainim long heven", orait, yumi mas tingim dispela arapela tok: "em i laik bilong God bai yu kamap holi."

Ol meri maritim ol kapiak man

BIPO BIPO tru long hap bilong Wasu long Morobe provins i gat ol kapiak brata i save stap long Kalalo. Tude Kalalo komyuniti skul i sanap long dispela ples. Na i gat ol meri save stap long sait bilong wara Kalalo long ples ol i kolim Horon Keban.

Long san ol dispela brata i save hangamap olsem ol kapiak tru long diwai. Long taim ol man i lukim bai ol i ting olsem em ol kapiak tasol i wok long hangamap i stap. Na long nait ol i save lusim diwai na kam daun singsing. Ol bai paitim kundu bilong ol na mekim save long singsing i go inap tulait i bruk na bai ol i go bek gen long diwai.

Olgeta nait ol dispela meri long ples Horon Keban i save harim pairap bilong kundu na nek bilong ol yangpela man i hatim singsing i stap. Na ol i save tingting planti. I go nau wanpela de ol i pasim tok long go na lukim husat tru i save singsing long nait.

Orait ol i pasim ol bombom bilong ol na wet i stap. Long nait nau ol kapiak ya i senis na kamap man tru na ol i kam daun mekim save long singsing i stap.

Ol yangpela meri ya i harim olsem na ol i laitim bombom bilong ol na ol i wokabaut i kam. Long taim ol i kalapim wara Kalalo na kamap long ples, sori tru, asde yet ol man ya i ranawe i go bek long diwai bilong ol na hanagamap olsem ol kapiak i stap.

Ol meri ya i kamap na i lukim olsem i no gat man i singsing i stap. Ol bilas bilong ol tasol na ples bilong singsing i stap tasol i no gat man i stap. Ol man ya i hangamap long diwai na lukluk long ol meri ya i stap. Tarangu ol meri ya i painim nogat nau na ol i lusim ples na go bek gen long ples bilong ol.

Orait long narapela nait gen ol meri i harim kundu i pairap na ol man i hatim singsing i stap, na ol i kirap kalapim wara i kam bek gen long Kalalo. Tasol i no gat man i stap long ples bilong singsing. Oltaim dispela kain pasin i save kamap nau ol meri i les na ol i pasim tok long go hait na lukim husat tru save singsing long Kalalo.

Long hap san yet ol i kirap i go hait na ol i lukluk i stap. Em nau tudak i kamap nau ol i lukim ol dispela kapiak ya i kirap lusim diwai na ol i kam daun hatim singsing i stap. Ol i no save olsem ol lain meri ya i hait i stap na lukim ol pinis.

Long taim ol meri i lukim ol yangpela man ya hariap tru ol i makim wan wan bilong ol pinis. Na long taim ol i pinis singsing ol meri ya i kamap ples klia na



holim ol man ya na ol i no gat rot long ranawe.

Em nau ol meri ya i maritim ol dispela ol kapiak man na ol i stap wantaim. Las brata i maritim wanpela naispela meri tru olsem na ol bikipela brata bilong em i save belhat long em.

Long taim ol i go raun long bus na ol i lukim ol abus long ples nogut, bai ol i salim liklik brata long go kilim. Ol i laik bai em i pundaun na dai na bai ol i maritim meri bilong em.

Tasol manki ya em i save moa long abrusim ol kain birua olsem. Na long taim em i sutim kapul i kam daun bai ol i kisim kapul o wanem abus em i sutim na ol i ranawe i go long ples. Na long taim em i kam daun bai em i no inap painim abus.

Wanpela de ol brata ya i painim abus i go daun long hap we wara Kalalo i kalap. Long dispela hap i gat wanpela longpela diwai tru. Dispela ples em i wanpela ples nogut tru na nem bilong en i Monin. Sapos yu kisim sip na go daun lusim Sialum na kam long Gidua bai i yu ken lukim wara i kalap i go daun. Ol asples oltaim i save pret long go daun long dispela ples.

Ol brata i kamap long dispela hap na ol i lukim kapul i pulap i stap long dispela longpela diwai. Ol i lukim olsem na ol i wokim wanpela longpela lata tru. Ol i wokim pinis dispela lata na ol i tokim liklik brata long go antap na kilim ol kapul long diwai ya.

Liklik brata ya i kilim ol kapul i kam

daun na ol brata bilong em i wok long kisim i stap. Ol i kisim ol kapul pinis nau na ol i kirap katim rop na rausim lata ya long diwai. Na liklik brata i no gat rot bilong kam daun gen long graun.

Ol bikipela brata i mekim olsem na ol i ranawe i go pinis long ples.

Tarangu liklik brata i kilim ol kapul pinis na em i laik kam daun tasol i no gat rot na em i pas i stap antap long longpela diwai ya. Long nait em i kol nogut tru na em i hait namel long ol lip bilong diwai na em i slip. Long moning em i kirap na traim gen long kam daun tasol em i no inap. Bikos ol han bilong diwai stap longwe longwe na em i no inap long kam daun.

Long nait taim ol blakbokis i kam long diwai ya em i save sutim ol. I no gat man i stap long kisim ol dispela blakbokis olsem na ol i save pundaun i go daun long wara Kiari.

Wanpela taim tupela susa i painim ol sel i go antap long dispela wara na ol i lukim ol blakbokis i pas nabaut arere long wara. Na ol i bihainim i kam na ol i lukim tewel bilong man ya long wra. Na long taim ol i lukluk i go antap ol i lukim em i sindaun i stap long diwai.

Ol i singautim em long kam daun tasol em i tokim olsem em i no gat rot long kam daun. Tupela meri i harim olsem na ol i go bek long ples na tokim papa bilong ol. Em i kam lukim olsem na em i wokim

lata i go antap long diwai.

Tasol man ya i no inap long kam daun. Bikos longpela taim em i no kaikai na skin bilong em i no gat strong moa. Papa bilong tupela meri i lukim olsem na em yet i go antap long lata na karim man ya i kam daun.

Orait ol i karim em i go bek long ples bilong ol long hap sait bilong baret. Ol i givim kaikai long em na em i kaikai na malolo gut inap long taim skin bilong em i strong gen. Na em i maritim tupela meri ya.

Ol i stap wantaim i go na ol i wokim ol gaden na lukautim ol pik. Kaikai bilong gaden redi nau na ol pik tu i go bikipela tru. Em nau brata ya i pasim tok wantaim tupela meri bilong em na papa bilong ol. Em i laik bekim dinau long ol brata bilong em.

Orait em i salim tok long ol brata bilong em long kam singsing long ples bilong em. Na em i pasim wanpela bikipela pik tru na planti kaikai. Orait em i mumim wanpela pik wantaim sampela wel taro na wel banana. Em i wokim singsing pinis long ol kaikai ya na wetim ol brata bilong em i stap.

Ol brata bilong em i kam kamap na ol i giaman olsem ol i amamas tru long lukim em. Orait ol i singsing i go tulait na em i givim kaikai long ol. Ol i kaikai pinis na em i givim dispela draipela pik long ol. Ol i amamas tru na ol i karim i go bek long ples bilong ol.

Long taim wokabaut i go long rot wanpela brata husat i karim pik ya i laik pispis. Na em i tokim ol arapela brata long kam senisim em na em i go pispis. Long taim em i pispis em i tanim na kamap wel taro.

Orait wanpela moa brata i pilim pekpek na em i go insait long bus long pekpek na em i tanim na kamap wel banana. I go liklik nau na narapela brat gen i tok em i laik pispis. Long taim em i go pispis em tu i tanim na kamap wel taro.

Mekim olsem i go i go na tupela brata tasol i karim pik ya i go. Ol i kamap antap long wanpela maunten na ol i putim pik i go daun na malolo na ol i toktok. Wanpela brata i tok, "Ating ol man i wokim posin long yumi o?" em i toktok olsem na em i pilim pispis tu.

Em i kirap long go pispis na em tu i tanim na kamap wel taro. Na narapela brata i pilim pekpek na long taim em i laik go pekpek em i tanim na kamap wel banana.

Na dispela pik i slip i stap na em i wok long sakim lek han bilong em i go i go na rop i lus. Na em i kirap na ran i go bek long haus bilong papa bilong em. Em tasol stori tumbuna bilong mi.

Nelson Dapepe,
P.O. Box 357, Rabaul.

NUPELA

WANTOK

BINGO

Winim K50

NA OL SMATPELA WANTOK T SIOT

LAKI BINGO

31	32	33	37	38	39	43	44	45	49	50	51	55	56	57
34	35	36	40	41	42	46	X	48	52	53	54	58	59	60

No 2

Pilai i olsem - i gat 5-pela bokis. Na insait long wan wan bokis i gat 6-pela namba i stap. Yu mas makim wanpela namba tasol long ol dispela 5-pela bokis. Mipela i helpim yu pinis na makim namba 8 king namba wan bokis. Sapos olgeta ansa bilong yu stret bai yu winim K50. Ol arapela 5-pela pilaita husat i kamap klostu long rait ansa bai kisim fri Wantok T-Slot.

Makim gut ol ansa bilong yu na salim i kam long Wantok Bingo No.2 P.O. Box 1982, Boroko, NCD.

Resis i pas long Trinde 22nd March na bai mipela tokaut long ol wina long Fonde 23rd March. Namba tri resis bai stat tu long dispela taim.

NEM.....

P.O. BOX.....

TAUN.....

Foren Afeas kisim patrol bot

FOREN Afeas opis long Vanimo insait long West Sepik i gat nupela bot long helpim ol long painim ol trabel insait long boda eria bilong Papua Niugini na Indonesia.

Nem bilong dispela nupela patrol bot em Chopper 89. Na tu em bai lukautim tu 300 mail fising jon bilong Papua Niugini long ol wara klostu long boda eria.

Dispela bot bai was gut long ol ausait bot husat i laik kam stilim pis insait long solwara bilong Papua Niugini.

Na tu dispela bot bai patrol na was long ol pipel husat i save yusim kanu o moto long kalapim boda na i go i kam long Jayapura na Vanimo.

Ol lain bilong Foren Afeas, Plis, Helt Inspekta, Kwarantén Opisa na Imigresen opisa bai yusim dispela bot long mekim wok bilong ol long boda.

Kastams Opis bilong boda taun, Michael Som i redi tasol long aut long painim Wes Irian husat i abrus na kalapim boda.

Telmin opim supamaket long Vanimo

TELMIN TRADING i nem bilong wanpela nupela supamaket klostu nau bai i op long Vanimo.

Papa bilong dispela nupela supamaket Dipo Dikinsep i tokim Wantok olsem kos bilong en i samting olsem K60,000 olgeta.

Mista Dikinsep i bin baim dispela haus na

graun long 1987 long wanpela bisnisan bipo. Nem bilong em Goden Campbell. Dispela i kos olsem K25,000. Mista Dikinsep nau i wok hat tru wantaim ol lain bilong em long Telefomin long pinisim dispela supamaket.

Mista Dikinsep i gat sampela bisnis long asples bilong em long Telefomin. Em i gat bikpela supamaket, wanpela bakstua, haus kaikai na haus piksa.

Long 1976 em i statim wanpela liklik stua long ples bilong

em yet long Kopremin klostu long Telefomin Stesen. Bihain long 1980 em i statim supamaket nabakstua.

Mista Dikinsep pas-taim i save kisim ol samting bilong stua long George Seeto long Wewak. Tasol long taim STC holsel long Tabubil i op em i stat long kisim ol kago bilong em long ol.

Em i tingting long putim 9-pela stuakipa na wanpela akaunten o man bilong lukautim mani long dispela nupela supamaket.

Long olgeta hap long PNG nau na taim bihain tu. Wanem haus moni na benk i ken halpim yu.



**YU AMAMAS LONG WESTPAC
BENK EM KEN HALPIM YU.**



Westpac ken halpim yu

Stap Isi- bikos pasin pait i ken bagarapim famili

BIKPELA kempen bilogn daunim trabel bilong paitim meri i wok long kamap gut tru. Dispela em toktok i kamap long maus bilong seketeri bilong Wimens na Lo Komiti Misi Josepha Kanawi.

Em i bin mekim dispela toktok long taim komiti bilong em i tokaut long pablik olsem vidio bilong ol em ol i kolim "Stap Isi".

Dispela vidio i soim wanem kain hevi i save bagarapim famili sapos papamama i save pait oltaim.

Wimen na Lo Komiti i bin wokim ol posta na toksave pepa long daunim dispela hevi bilong paitim meri. Pasin pait i ken bagarapim famili.

Dispela vidio i stori long liklik Peter (Tapas Kanawi) Em i stori long pasin pait i bagarapim skul na laip bilong em. Taim em i go skul em i no save amamas tumas bikos planti taim em i bai tingim ol dispela kain pasin nogut long haus ya.

Tasol bihain papa bilong mi i sensim tingting na go wok long taun. Em nau dispela famili bilong Peter i orait.

Tasol bikpela tingting long dispela vidio em olsem: Pasin pait i ken bagarapim famili laip. CUSO na Hai Komisín bilong Kanada, Australia i givim mani bilong wokim dispela vidio.

Ol pipel long ples bai i gat sans tu long lukim taim ol wan wan pipel o grup long eria bilong ol i soim. Ol Wimens grup na Sios grup bai ken yusim vido longhlepim long soim ol dispela piksa.

Bai ol i soim dispela vidio long Goroka long Faide 17 Mas long 3 klok apinun long Nesenel Spot Institut.

Seketeri bilong Wimens na Lo Komiti, Misi Kanawi i tok o i tromoi moa long K40,000 long wokim dispela kempen bilong ol. Ol i yusim K15,000 long wokim posta na K30,000 long wokim dispela vidio.

Husat i laikim dispela vidio i ken rait long Women na Lae Committee c-Lae Reform Commission P.O. Box 3439 BOROKO, NCD. o ring long dispela namba 25 8755.

WANTOK

OKSAVE BOKIS 252500

BIRTHDAY

Belated Betde to

TOK SAVE



Birthday greetings to **GEORGIE K. SILO** who will turn 3 years old on the 5/5/89. Keep smiling my Sweet Heart. Luv & sweet kisses from mum Therry & dad P.K. Haunje, small bro. Gilbert Haunje. Not 4-getting all uncles, aunties, bubus of Rapex - Hoskins and also aunties & bubus of Passam No. 1 Wewak, E.S.P. May our heavenly father richly bless & guide you in your future!!!

Birthday greetings to **GILBERT H. RAGI** who will turn 1 year old on the 14/6/89. Luv & sweet kisses from mum & dad. Gee Gil! noken lus tingting long uncle George & family of POM. Na tu uncle Stanis long Aitape, E.S.P. God bless you!!!



JNR GORETTI
You are 2 yrs today 13/02/89. Birthday greetings from your loved ones in PNG. Bubus of Mt Hagen Bogia & Biem Island Wewak. Also bubus of Newtown - Madang. Uncles & Aunties of Mt Hagen, Wewak and Madang. Special love from Aunties Goretti & Uncle Isidor



MOROBE
LAE CITY AUTHORITY

LAISENS BILONG SALIM AISBLOK

Taim nau long senisim olupela laisen bilong yu long salim aisblok na kisim nupela.

Fe bilong laisens em i go antap long K25.00.

Sapos yu no gat nupela laisens bai yu go long kot na baim kot long K100.00 or kalabus long tri mun (3 months).

Oi loya bilong Authority i redi long sasim yu sapos yu no gat laisens.

T.P. GABRIEL
Chief Health Inspector.

KEEP LAE CITY CLEAN. DO NOT LITTER.

HAPPY BIRTHDAY



HAPPY BIRTHDAY

★ GRACEE JADA ★

You will be 6 years old on 3rd March, 1989. My one and only daughter always. - .. Maybe another one coming later?? Happy Birthday from Mum, Dad, Uncles, Bubus from Maprik, Lealea, Rigo, Gabagaba and the M. Noah's Family (PNGBC) next door and Vava Jayjay too.

HAPPY BIRTHDAY SWEETIE GEE!!

new nation

PNG's new Governor-General advises youth. Get your own pull-out poster of Kylie Minogue. Follow up on your very own PNG True Life Tales. Do you want to take charge of your own life? Find out how - read this month's New Nation. All this plus your regular stories in the colourful March Issue of New Nation. OUT NOW!!

new nation


Mipela Salim Nau!!

ALSO

• Governor General Dr. Kilage's visit to PNG

• and find out in Role Yourself how to take charge of your life.

Pot Mosbi Prais - 90t
Ol Provinsis - K1.00



Sapos yu laik edvataism
Toksave, Painim Wok,
Pablik Notis, Ringim:
Miria Ravao
Telepon: 25-2500
Ext. 217.

SIMBU PROVINCIAL GOVERNMENT



SIMBU PROVINSAL GAVMAN WANTAIM AGRIKALSA BENK I KIRAPIM PINIS AGRIKALSA LON PROGRAM LONG SIMBU PROVINS.

SIMBU PROVINSAL GAVMAN I AMAMAS LONG TOKAUT
LONG OL SMOL HOLDA FAMA INSAIT LONG PROVINS OLSEM
YUPELA INAP GO LONG AGRIKALSA LONG KUNDIAWA NA
APLAI LONG KISIM LON MANI ANINIT LONG SIMBU
PROVINSAL GAVMAN 'AGRIKALSA GARENTI SKIM (AGS).

DISPELA I BIHAINIM WANPELA KONTRAK SIMBU
PROVINSAL GAVMAN WANTAIM AGRIKALSA BENK
BILONG PAPUA NIUGINI I WOKIM PINIS. AGRIKALSA BENK I
ORAIT LONG OL SMOL HOLDA FAMA LONG APLAI LONG
KISIM LON LONG MEKIM GOHET OL WOK FAMA
BILONG OL. NA SIMBU PROVINSAL GAVMAN I ORAIT
LONG BEKIM BEK MANI BILONG BENK SAPOS WOK I
PUNDAUN.

SIMBU PROVINSAL GAVMAN I PUTIM PINIS K400,000
OLSEM WAS MANI LONG DISPELA WOK NA I TINGTING
LONG SKRUIM I GO BIKPELA BIHAIN.

MIPELA TOKTOK LONG DISPELA SAMTING INAP TUPELA
YIA OLGETA NAU OLSEM MIPELA I AMAMAS TRU DISPELA
GUTPELA TINGTING I KARIM KAIKAI.

DISPELA PROGRAM I SOIM GEN TINGTING BILONG SIMBU
PROVINSAL GAVMAN LONG LUKAUT NA HELPIM OL PIPEL
BILONG EN. NA PROVINSAL GAVMAN I AMAMAS LONG
LUKIM OL PIPEL I APLAI LONG KISIM LON MANI INSAIT LONG
DISPELA PROGRAM.

DAVID GORO MAI. MPA
SIMBU PRIMIA

SIMBU PROVINCIAL GOVERNMENT

"FRI KOMUNIT SKUL EDUKESEN I KAMAP PINIS"

Long mun Janueri Provinsal Edukesen Kaunsil bilong Simbu i pasim mosen pinis long kirapim FRI KOMUNITI SKUL EDUKESEN stat long begin long dispela 1989 skul yia.

Dispela nupela program bai i stap inap sampela yia. Na mipela i tingting long skruim i go olgeta long taim bihain.. Ol pipel i amamas tru long dispela nupela program na taim mipela wokim dispela nupela program mipela i save bai ol pipel i laikim tru.

Na Simbu Provinsal Gavman aninit long Primia, Mista David Mai i laik tokim olgeta pipel insait long Simbu provins na olgeta Simbu pipel i stap aut-sait long provins olsem; Provin-sal gavman i kirapim pinis ol wok long helpim ol pipel na tu long helpim provins long go het.

Mi, primia bilong Simbu, i laik tok klia long ol pipel. Mipela i

save long ol hevi bilong yupela na mipela i wok nau long stre-tim ol dispela hevi. Long dis-pela tingting tasol mipela i wokim dispela fri edukesen ekt

Na tu dispela nupela fri edukesen em bilong helpim ol pipel long go het. Mipela i save yumi no gat plenti kopa o gol o wel. Olsem mipela laik helpim ol pipel bai ol yet i ken go het. Ol pipel em i namba wan samting olsem mani i go long helpim ol stret.

Simbu i namba wan provins insait long Hailans long kirapim Fri Komuniti edukesen. Simbu tasol i go pas. Mipela i hop bai ol 4-pela arapela provins i bihainim mipela.



DAVID GORO MAI, MPA
Simbu Primia

Sapos yu laik edvataisim
Toksave, Painim Wok,
Pablik Notis, Ringim:
Miria Ravao
Telepon: 25-2500
Ext. 217.



NESENEL TAS FOS LONG WOKIM PROGRAM BILONG OL HAUS

Ministri bilong ol Haus

Tok save i go long ol pipel olsem. Nesenel Tas Fos long wokim program bilong kamapim ol gutpela we long helpim ol pipel long painim ol winim haus i wok nau long raun long ol sampela provins.

Ol bai raun long Morobe, Madang, West Nu Briten, Nu Ailan, Is Nu Briten, Westen na Westen Hailans provins.

I gat 3-pela tim i wok long raun. Wanpela bai go long Kimbe, Rabaul na Kavieng. Namba tu tim bai go long Tabubil, Kiunga na Hagen. Namba tri tim bai go long Lae na Madang. Ol bai raun namel long 26 Februeri na 3 Mas long dispela yiu.

As bilong dispela raun em i olsem:

1) Bai ol memba bilong Tas Fos i ken lukim ol kain kain haus bilong ol pipel. Ol haus kapa na ol haus kunai. Ol gutpela haus na ol haus nogut.

2) Bai Tas Fos i ken harim tingting bilong ol provinsal na lokal gavman, ol bishisman, ol man nating na ol kain kain grup o sosaiti, long ol kain kain haus i stap nau.

3) Long go lukim ol papa bilong ol kampani i save wokim haus, ol so mil, ol transpot kampani na ol man i glasim ol wok haus.

4) Long kisim olgeta tingting na toktok o kain kain save long wok long kirapim ol haus long ol pipel.

Ol Tas Fos i gat wok oslem:

1) Go lukim ol sampela gutpela haus na ol haus nogut. Na sekim ol graun i stap klostu, ol we ol i rausim rabis na pekpek, stail bilong ol haus, as ples bilong ol pipel i slip long ol haus. Ol kain kain samting ol i yusim long wokim haus na tu ol ples bilong wok i stap klostu o longwe long ol dispela haus.

2) Toktok wantaim ol pipel o ol grup husat i stap long ol dispela ples na painimaut watpo ol i kam i stap hia na ol hevi ol i painim long wokim haus. Na ol inap kism lis long graun na ol i stap klostu long wara o PMV o stua a ples wok. Na tu long kisim tingting bilong ol pipel long ol we gavman i wok nau long helpim ol long painim haus.

3) Toktok wantaim ol pipel long painimaut ol hevi ol i painim taim ol i laik wokim haus. Ol kism samting bilong woki mhaus we? Ol inap kism lon mani? We ol i bihainim long pinisim ol hevi bilong woki haus.

4) Painim ol kampani i no benk inap helpim ol pipel long wokim haus. Na tu we long kisim lon mani long ol.

5) Toktok wantaim ol Semba ov Komes long wan wan provins na askim ol long tingting bilong ol longhelpim ol wokman long painim haus. na tu long painimaut ol hevi bilong ol long wokim haus bilong ol wokman.

6) Wokim wanpela ripot na tokaut long we long stretim ol polisi bilong ol haus, ol program - bilong ol haus na we long wokim. Dispela ripot bai go long ol lain i wok long stretim ol wok haus.

Olsem mipela i askim ol provinsal gavman, ol kampani, ol asosiesen bilong ol setelmen na ples skwata, ol man i gat tok na ol grup i gat sampela toktok long kam autim tingim bilong ol long dispela Tas Fos.

Mi laik tok tenkyu tru long ol man i lukim Tas Fos na autim tingting bilong ol.

Mista Gerard Sigulogo, MP
Minista bilong Ol Haus

Mista James Simet, Siaman
Nesenel Tas Fos

Tupela wantok tim Bargam na Bank Line i traime bun



• Kepten bilong Bank Line Chris Ongkau klostu i kaikai das. Bal i bin abrusim em na em i pundaun i go daun long graun. I gat sore long dispela kain stail olsem na yu mas pilai gut long dispela wiken.



• Enoch bilong Bank Line i tok "Traime Gen" long Parker. Tasol, em i no was gut na lain bilong Parker (Bargam) i autim em. Bargam i raunim ol na winim Bank Line long 17-15. Bargam nau i sindaun long gren fainol. Na Bank Line bai bungim NBC long dispela wik. Wina bilong tupela bai bungim Bargam long gren fainol.



• TENK yu Uncle Clement. Dispela liklik Charlie Angie i mekim dispela toktok taim em i bin kamap long ples pilai long lukim papa bilong em i pilai. Tim bilong papa bilong em Bargam i daunim Bank Line 17-15

Ol man i bungim mesa semi fainal

**HENRY MORABANG
i raitim**

DISPELA wik, Mosbi Mens Sofbal Asosiesen bai pinisim ol gem na statim gren fainal bilong ol long neks wik.

Insait long A gret, olupela sempian tim Gasel i malolo nau na wet tasol long pilai long gren fainal. Braun Igels bai pilai wantaim NGI long painimaut husat tru bai salensim Gasen long gren fainal.

Wantok i kisim ripot bilong ol arapela gret olsem Mazda bai bungim Hoodsco long B gret. Na Gasel bai bungim Chebu long C gret mesa semi fainal. Tasol insait long D gret tupela wantok tim Bargam na Bank Line (Hanza Be) kirapim das stret las wik.

Bargam i soim tru pawa bilong em na tekova long Bank Line 17-15.

Bank Line inap winim dispela gem tasol ol pilaia bilong em i ting ol i moa yet taim ol i wok long go pas wantaim 6-pela hom ran. Dispela tasol i daunim pilai bilong ol boi Bogia.

Olsem na long dispela wik, Bank Line bai bungim ol NBC long mesa semi fainal. NBC i bin autim Chebu las wik na ol bai bungim Bank Line long dispela wik.

Insait long dispela pilai, wanem tim i win nau bai go bungim Bargam long gren fainol bilong D gret. Na wanem tim i lus em i tok lukim yu long mun Septemba taim nupela sisen i stat gen.

Long pilai sofbal, wok bilong pitsa em i nambawan. Pitsa i save apim o daunim strong bilong ol arapela tim. Sapos wanem tim i gat gutpela pitsa, dispela tim bai isi long win.

Bank Line i gat wanpela gutpela pitsa tru, em Joe Tiriman. Ol lain NBC bai kisim taim sapos ol i no mailim gut ol bal bilong em na i itim.

Las wik Bargam i winim Bank Line. Olsem na ol i sindaun malolo long tupela wik. Ol i wet tasol na NBC na Bank Line bai taitim bun.

Long rekot bilong NBC, ol i no bin statim gut sisen bilong ol. Insait long namba wan raun na namba tu raun, ol gem bilong NBC i no swit tumas. Tasol nau NBC i soim tru ol arapela lain olsem ol tu i gat nem long sofbal ya.

Wantok i no inap kisim toktok bilong NBC bikos mausman bilong o. Ruben Tama i no i stap. Tasol NBC em i wanpela strongpela tim na Bank Line i mas lukaut.

Long sait bilong Bank Line, lapun Joe Bai bilong Bank Line i tokim Wantok olsem NBC i no ken ting tim bilong em bai isi nau. Ol i kisim save pinis long ol asua i kamap las wik na nupela tim olgeta bai kisim fil.

Mista Bae i tok kosa Joe Kaptigau bai mekim sampela senis bikos ol i no laik wankain trabel i kamap. Bai i no inap tokaut wanem kain senis tru em kosa bai mekim.

Long tim bilong Bank Line, kepten Chris Ongkau bai go pas long ol. Las wik, kepten Ongkau i no mekim gutpela pilai tumas olsem na nau olgeta memba bilong tim i ting kepten i ken go pas. Em i bai kisim moa trening long lukautim namba wan bes.

Ongkau na pitsa Joe Tiriman bai kisim helpim long ol arapela pilaia olsem John Sakep (jnr), Dumil, Pius Caspar, na Enoch. Ol dispela pilaia i gat bikpela wok tru long helpim Bank Line i winim mesa semi fainal. Sapos nogat, orait o i ken hangamapim glav bilong ol na wetim nupela sisen long Septemba.

Namba wan gren fainol bilong United na Fuji

DISPELA wiken bai gat bikpela pilai namel long RLC United na Fuji long Pot Mosbi Wimen Sofbal gren fainol. Dispela pilai bai pulim planti manmeri.

Dispela sisen em i namba wan sisen bilong United long pilai long Mosbi Wimen Sofbal kompetisen. Tasol ol pilaia

bilong ol i no nupela long kompetisen, planti bilong ol i bin pilai long Wantok las ya.

Fuji i no nupela tim bilong A gret. Bipo ol i gat nem Elcee tasol long dispela sisen Fuji i sponsa long ol na ol i senisim nem bilong ol i go long Fuji. Na nau em i namba wan taim bilong tupela tim long go long gren fainol.

United i gat strong-

pela tingting long winim dispela pilai. Namba wan kosa bilong United, Dorah Malum i tok ol i bin kam longwe pinis na ol i no inap slek nau.

Fuji i gat wankain tingting olsem United, ol i laik winim dispela gem. Pitsa bilong Fuji Nancy Pala wantaim Betty Varapik long infilda na Bospidik Posman long namba tu bes na Rose Pasok long namba tri bes, iamo Launa wantaim narapela tupela poromeri bai mekim save na kirapim das.

United i no inap tusim dispela pilai, ol i bin win inap long gren fainol na bai ol i no inap givim sans long Fuji.

United i gat ol top pilaia olsem Joan Toliman, Dorah Malum, Rachael Baragu na Bowie Konerus. Dispela ol pilaia i bin bung gut tru na nilim Fuji tupela wik i go pinis.

SOFTBALL

WOMENS SOFTBALL DRAW SATURDAY 4TH MARCH Grand Final

TIME	Grade	Field	Teams	Umpire
12:00	D	1	NGI v Tarangau	T.Simatap
1:30	C	1	Medics v Avia	P.Naron
3:00	B	1	Hoodsco v Elcom	J.Kaptigau/S.Kalai
4:30	A	1	RLC Utd v Fuji	M.Waiku

MENS SOFTBALL DRAW SUNDAY 5TH MARCH 2nd Semi Finals Week 18

TIME	Grade	Field	Teams	Umpire
10:00	D	1	B.Line 2 v NBC	
			Naron/Sorang/Piakolos/lara	
12:00	C	1	Mazda 2 v Hoodsco	
			Simatap/Kaptigau/O.Tqaule/Peni	
2:00	B	1	Chebu 1 v Gazelle 2	
			Duba/Vagalla/Talimi/Mesak	
4:00	A	1	H.NGI v B/Eagles 1	
			Pasok/Kalai/Girara/Sogal	

Rabaul i stat long dispela wiken

RABAU Soka Asosiesen i makim pinis nupela komiti bilong lukautim asosiesen bilong ol long dispela sisen.

Ol dispela man em Maran Nadelio (presiden), Michael Kap (vais presiden), Gervina Kasirei (seketeri), Hani Yutaning (tresera) na Sam (asisten tresera).

Nedelio i kisim ples bilong olpela presiden Peter Diran husat i go wok nau long Goroka. Na ol ara-

RABAUL soka ripot

pela memba i kisim bek wok bilong ol long dispela sisen.

Seketeri bilong asosiesen Gervina Kasirei i tokim *Wantok* olsem ol inap long statim pri sisen long dispela mun yet.

Tasol olpela presiden Peter Diran i no toksave olsem em bai go long

Goroka. Olsem na ol arapela i paul liklik long wanem taim bilong kibung wantaim na redim ol plen", Kasirei i tok klia olsem.

Insait long dispela kibung, asosiesen i makim tu ol ogenaising komiti. I gat 6-pela memba long dispela komiti.

Wok bilong ol em long stretim kik bilong U19 Nesanel sempionsip. Dispela kik bai kamap long Is

Wiken long Mas 24-27.

Ol memba bilong dispela komiti em Joe Pinisi, Steven Pouru, Hatsire Mani, Paul Sobeni, Alois Sobeni na Alois Johnson. Wapela opisa bilong Kokopo Soka Asosiesen i memba tu long dispela komiti. Arapela ripot i kam long Rabaul i tok ol wankain tim bilong las yia bai kik gen long dispela yia. Na pri sisen bai i stat long dispela wiken.

Madang painim mani yet long salim U19 skwat

OL BIKPELA soka olsem Mosbi na Laemas lukaut gut long Madang long kik bilong U19 Nesanel Soka sempionsip. Dispela tok lukaut i kam long menesa bilong Madang U19 skwat, Aron Munggalio.

Munggalio i bilip olsem em i gat gutpela beklain, midfil na fotwatlain.

"Tasol strong bilong tim i stap long midfil. Charles Romo wantaim Semba Awele bai lukautim midfil. Tupela i save kamapim top pilai na mi bilip olsem strong bilong tupela bai helpim tim long win."

Munggalio i tok.

Munggalio i tok tu olsem 7-pela yangpela pilai long skwat i bin makim Madang long U16 Nesanel sempionsip bilong las yia. Na nau ol bai makim Madang gen long U19 Nesanel sempionsip. Kik bilong U19 Nesanel sempionsip bai i kamap long Rabaul long Ista wiken long Mas 24-27.

Asosiesen i makim pinis 17 pilai long go pilai long Rabaul. Hia em nem bilong ol dispela pilai: Alphonse Mongol, Charles Romo, Toboi Elisha, Peter Banga (Mimlon), Kubuan Sining, Max Mathew, Lambu Gaio (Panafun), Bolas

Michael, Semba Awele, Vincent, John Panu, Sebert (Mamose), Lawrence Koio, Danny Kambuka, Jacob Elapo (Nambasa), Ray Romo (Watabag) na Boti Andrew (Aigob).

Na 4-pela opisal bai go tu wantaim dispela skwat. Ol dispela opisal em Aron Munggalio (tim menesa), Dokta Magal (tim dokta) na Bevan (kosa). Asosiesen i painim yet wapela man long kisim ples bilong asisten kosa.

Mani bilong baim balus na go long Rabaul na kam bek em K5,040 olgeta. Tasol nau yet asosiesen i no painim yet wapela mani.

Munggalio i tok olsem em i raitim pinis sampela pas i go long ol praivet bisnis long givim sampela helpim.

Munggalio i laikim olgeta pilai insait long skwat i mas baim hariap K20 levi fi bilong ol. De em olgeta pilai i mas baim dispela fi em Sarere 11 Mas.

Munggalio i tok sapos asosiesen i bungim inap mani bai ol i salim skwat long balus.

"Na sapos asosiesen i no bungim inap mani, skwat bai kisim sip na go long Rabaul. Dispela em samting olsem wapela wik bipo long sempionsip i stat", Munggalio i tok.

Mausman bilong Madang Soka Asosiesen Bob Morris i tokim *Wantok* olsem asosiesen i no holim wapela kibung yet.

Ating long dispela wik bai asosiesen i kibung, em i tok.

Insait long dispela kibung ol bai toktok long wanem taim pri sisen kompetisen bai i stat. Na hamas mani ol pilai na klap i mas baim long registresen fi.

Pilala registresen fi bilong las yia em K6 long ol senia na junia pilala wantaim. Long dispela kibung ol klap opisal na eksekutiv bilong asosiesen bai painimaut sapos ol bai kisim wankain fi onogat, Morris i tok.

MADANG soka ripot

Asosiesen i laik statim pri sisen resis long stat bilong mun Mas.

Planti tim bilong las sisen bai kik gen long dispela yia. Na 10-pela tim olgeta bai kik insait long primia divisen. Sampela bilong ol dispela tim em Aigob, Admiralty, Nambasa, Mimlon, Mamose, Watabag, Gala Yunaitet, Mopi, Laten na Madang Blues.

Madang Blues em i wapela top tim bilong namba wan divisen. Olsem na dispela yia asosiesen bai promotim ol i go kik

insait long primia divisen.

Ripot i kam long Madang i tok olsem planti pilai bilong Laden i bruk na laik kamapim wapela nupela tim. Dispela nupela tim ol i kolim Air Niugini.

Tripela tim bilong primia divisen bai go daun kik long namba wan divisen. Ol dispela tim em EPC, Morobe Yunaitet na Tarangau. Bikos las yia ol i no bin pilai gut. Sapos ol i pilai bilong namba wan divisen. Olsem na dispela yia asosiesen bai gen long primia divisen.

WEWAK SOKA LATA

WEWAK FOOTBALL SOCCER ASSOCIATION INC PRI-SISEN

PREMIER DIVISION LADDER 27.02.1989

Division	Games				Goals		Points
	Played	Win	Draw	Lose	For	Against	
Wewak Utd	3	3	0	0	12	5	6
Wullet	3	3	0	0	10	1	6
Kanai Utd	3	1	1	1	7	5	3
Medics	3	1	1	1	3	4	3
Defence	3	1	0	2	4	0	2
Tarangau	3	0	2	1	1	6	2
Sul	3	0	1	2	5	10	1
Guria	3	0	1	2	14	12	1

Results Sande 26th February 1989

Defence 4 def Sul 1
Wewak Utd 3 def Medics 1
Wullet 5 def Guria 1
Tarangau 0 def Kanai Utd

Draws - 5th March 1989 (Round 4)

Tim	Taim
1. Guria v Medics	12.00
2. Defence v Kanai Utd	1.30
3. Wewak Utd v Tarangau	3.00
4. Wullet v Sul	4.30

Toksave bilong Wewak

BIKPELA kibung bilong Wewak soka bai i kamap long Trinde 8 Mas, 1989. Olsem na olgeta opisal bilong wan wan soka klab i mas kamap long dispela kibung.

Kibung bai i kamap long Eswa Hol na bai stat long 6 klok apinun i go inap long hap pas 6.

As bilong holim dispela kibung em long toktok long 1988 mani ripot bilong asosiesen. Na tu long makim ol nupela komiti bilong dispela sisen. Toksave i kam long Martin Rumbrawer.

Kimbe tu i redi long statim sisen

KIMBE soka ripot

KIMBE Soka Asosiesen i no inap salim wapela tim long kik insait long U19 Nesanel sempionsip. Kik bilong U19 sempionsip bai i kamap long Rabaul long Ista wiken.

Presiden bilong Asosiesen Mathias Ire i tokim *Wantok* olsem Kimbe Asosiesen i no memba long Papua Niugini Futbol Asosiesen olsem na ol i no inap kik long dispela tonamen.

Olgeta klap bilong Kimbe husat i laik kik long 1989 soka resis i mas redim aidi kat bilong wan wan pilai. Dispela strongpela toksave i kam long presiden Mista Presiden.

"Em i tok las yia planti pilai husat i no rejista wantaim asosiesen i save yusim nating nem bilong narapela pilai na pilai.

Olsem na dispela yia olgeta klab i mas mekim aidi kat bilong wan wan pilai.

Na asosiesen bai givim taim long ol dispela tim husat i no bihainim dispela askim toksave.

Klap afiliasen na pilai registresen bai i wankain yet olsem bilong las yia. Tasol Mista Ire i tok olgeta klap i mas baim hariap afiliasen na pilai registresen fi. Klap afiliasen fi em K120 tasol. Pilala registresen fi em K7 long ol man na K5 long ol meri. Ol junia man na meri pilala, em long U18 divisen na go daun, bai baim K3 tasol.

Pri sisen resis bai i kamap long narapela wik. Bikos nau yet gras long fil i bikpela tru na masin i no katim yet. Olsem na resis bai i stat taim olgeta gras long fil i sot.

Ire i tok 7-pela klap bilong las yia bai

kisim gen fil long dispela sisen. Ol dispela klap em Mamose, Vitias, Rangers, Sunam, Wes Yunaitet, Buresong na 1988 primia Saut Kos.

Ire i tok tu olsem sampela nupela tim i laik kik tu long kompetisen. Dispela ol tim i bilong ol eria ausait long Kimbe taun.

Tasol Ire i tok mobeta ol tim ausait long Kimbe taun i mas kamapim wapela soka asosiesen bilong ol yet. Na Kimbe Soka Asosiesen bai sapotim dispela asosiesen long menesmen wok na ol kain samting olsem.

"Bikpela as bilong dispela em mi no laikim olgeta soka pilai bilong ausait i kam pilai long taun kompetisen tasol. I gutpela sapos ol i stap long eria bilong ol yet na pilai long hap. Bikos dispela bai helpim stended bilong soka long kamap long rurel eria tu na i no long taun tasol", Ire i tok klia olsem.

Namba tri wik bilong Wewak soka

WEWAK soka ripot

CHARLES MALENKI i raitim

LAS wiken Wewak Soka Asosiesen i bin pilai namba wan gem bilong raun tri bilong ol kik bilong pri sisen. Na long bikpela gem bilong las wiken, Difens i kamapim strongpela pilai tru na winim Sul 4-1.

Sul em sempian bilong namba wan divisen long las yia. Olsem na dispela yia, asosiesen i surukim ol i go kik antap long primia divisen.

Narapela bikpela kik i bin kamap namel long sempian bilong 1988 pri sisen soka resis, Wewak Yunaitet na ol lain bilong Wewak Haus sik, Medics. Tupela tim i bin pilai gut tru long dispela gem. Tasol Yunaitet i bin strong na rausim Medics 3-1. Skipa Dokta Wanganapi i bin go pas long Medics.

Em i kisim helpim long ol yangpela

fowat pilai bilong em olsem Andy, Pitius na Walter Munjin long winga. Yangpela Munjin bai makim Wewak insait long U19 skwat longgo kik long Rabaul long Ista wiken.

Na kepten Rudy Itar wantaim Emil Hoda i bin go pas long Yunaitet long brukim umben bilong Medics.

Long namba tu hap, pilai i bin kamap rong liklik. Olsem na referi Nelson Kaiangu i stapim gem. Dispela asua i bin kamap samting olsem 5-pela minit bipo long gem i pinis.

Na namba tri gem i bin kamap namel long Wullet na Guria. Insait long dispela gem, Wullet i strong tru na bagarapim ol olpela sempian bilong Wewak soka 5-1.

Nau yet i luk olsem Guria i no moa strong olsem bipo. Kepten bilong Wullet, Adam Pangua i no givim liklik sans long Guria. Em wantaim ol pilai bilong em i bagarapim stret sindaun bilong Guria.

Long strongpela kik bilong em na goli bilong Guria, Cletus Samban i hatwok tru long stapim ol strongpela kik bilong em.

Pangua em wapela olpela pilai bilong Guria long las sisen. Tasol nau em i pilai wantaim Wullet.

Na las gem i bin kamap namel long Kanai Yunaitet na Tarangau. Insait long dispela gem, tupela tim wantaim i strong na dro 0-0.

Namba tu raun bilong Mosbi pri-sisen

NAMBA TU raun bilong ol kik bilong Mosbi pri sisen i kamap long dispela wiken. Na ol tim i lus las wiken bai laik bekim dinau bikos ol i kaikai

gras bilong Bisini graun las wik. Tripela tim nau i go pas long pul bilong ol em Milen Be (pul 1), Rapatona long pul 2, GFC long pul 3. Ol tim ya i skoim 4-pela gol egens long birua

HENRY MORABANG i raitim

bilong ol na ol i wok long go pas long pul bilong ol. Gupela pilai long dispela wiken bai stap namel long Guria Tim 1 na Solo. Dispela kim em ol lain pul 6 bai kamapim. Nau yet Solo i wok long go pas

long dispela pul na bai strong tru long bosim dispela pul.

Dispela gem namel long tupela bai kamap long Sarere long 2.30 long apinun. Solo i mas lukaut long Guria bikos nau Guria em i gat ol intansenel pilaiia tasol i stap long dispela tim.

Guria tim i gat ol pilaiia olsem Buka Pasar, Martin Laviong, Dickson Laviong, Adam Lema, Adam Wangu, Simon Emmanuel na Ruben Tama. Planti ol arapela pilaiia bilong tim i gat nem tu bikos ol i makim pinis Mosbi long sempionsip.

Arapela gupela gem tu bai kamap namel long Nali na Westpac tim 1. Nali em wanpela nupela tim. Olpela nesanel kosa Kolis Pombuai i kamapim dispela tim long bungim ol yangpela bilong Manus.

Las wik ol i dro 4-4 wantaim birua bilong ol Wanzesi. na Westpac tu i bin dro las wik wantaim Yuni- vesiti.

I gat tokwin olsem Toru Turia i lusim Yuni na kik long Guria. Tasol dispela toktok i no tru na em i

bin soim tru olsem em bai sanap klostu long brata bilong em Joe.

Las wik yangpela Desmond Waku i soim tru stail bilong em. Em i stilim sampela stail bilong Sydney Croatia taim em i go stap wantaim ol long Australia. Olsem na ol Wanzesi i mas was gut long Waku.

Long pul 2, straika bilong Anda 18 tim Hans Setu bai go pas long ol Blu Kumul. Las wik em i sim tru olsem em i namba wan straika taim em i helpim nupela tim bilong em Blu Kumul na sutim tripela gol olgeta egens long Stone Axe.

Ol Stone Axe i bekim wanpela gol tasol bikos goli bilong Blu Kumul i no holim gut bal.

Blu Kumul i wok long kamap nau. Tasol ol klap menesa i mas taitim bun long sapotim ol yangpela pilaiia. Las wik sampela samting i no strt tumas na ol i mas yusim yunifom bilong ol Difens long kik. Olsem na ol opisel i mas taitim bun.

Long pul 5, ol lain Morobe Tim 1 i soim tru pawa bilong ol na

daunim Maset 4-1. Dispela wik ol bai traime strong bilong tim tu bilong GFC.

Long Sande moning, tupela tim ya GFC 2 na Morobe 1 bai opim ol kik long graun 1 long Bisini. Olsem na husat sapota bilong dispela tupela tim i mas kamap hariap na lukim ol tim ya.

Mase bai laik bekim dinau long Losegu olsem na bikpela pait tru bai kamap long ples pilai. Olsem na ol wantok long Buang i mas was aut.

Olpela tim bilong guttaim, BFC i soim tru pawa bilong em long pul 4. Nau yet BFC i go pas long dispela pul na Sobou i wok long ran bihain long BFC.

Dispela wik tupela tim ya BFC na Solo bai bung. Na em i taim bilogn soim strong. Tasol long dispela gem, BFC i gat bikpela snas tru long winim dispela gem sapos ol lain Solo ino was gut long ol.

Lukim soka dro long Wantok Niuspepa sapos yu no klia wanem taim tru tim bilong yu bai kik.



• Kasen bilong Pema Soka klap i traime goli bilong GFC. Lain bilong Kasen i no strong na GFC i nilim ol 4-1. Tasol neks taim ating Pema bai tanim na nekim ol lain GFC. Husat i save!

Moa soka sapota i kam bek

DISPELA wik Mosbi bai kirapim namba tu raun bilong pri sisen kik resis bilong em.

Seketeri bilong Mosbi Soka William Vui i amamas tru bikos olgeta program i bihainim plen bilong ol eksekutyut bilong em.

Em i tok em i amamas moa yet bikos nau planti pipel i bin kamap long pilai soka. Moa long 1,00 pipel i bin kamap long Sarere na Sande long sapotim ol asples tim bilong ol.

Insait long rekot bilong get, PMSA i kisim moa long K1,00 long las wiken. Ol bikpela manmeri i baim K1 na ol studen i baim 50t long get. Na dispela em gupela mak tru olsem planti ol pipel nau i kam bek long sapotim soka.

Mista Vui i tok tupela yia taim PMSA i kamapim klap sistem, PMSA i save wokim K500 tasol long pri sisen. Tasol long taim sisen tru, PMSA i save kamapim K800 long wanpela wiken.

Vui i tok ol liklik tim olsem Pema, Verave, Nali, Kula na Stone Axe i wok long

HENRY MORABANG i raitim

pulapim planti sapota bilong ol i kam long ples pilaiia.

Namba tu vais presiden, Noe Bukoya i tok bipo planti ol wantok tim olsem Stone Axe i no kisim planti sapota bikos ol lain ya i lusim tim na pilai aninit long Namba wan Divisen bilong Air Niugini soka klap. Tasol nau ol tim yet i pulim planti sapota stret.

Mista Bukoya i tok bipo planti bilong ol dispela sapota i go lukim pilai ragbi bikos ol i save dispela tim i no bilong ples, em pilaiia bilong ol lain Air Niugini.

Em i sapotim tru tingting bilong PMSA long kamapim na bihainim olpela sistem larim o wan wan tim i putim nem long kik.

Planti ol arapela sapota bilong soka tu i sapotim dispela olpela sistem bilong larim ol liklik tim i kik gem.

Wanpela strongpela sapota Clement Kongate i tokim Wantok olsem las yia

em i no save kamap long soka graun bikos em ino amamas tumas long klap sistem.

Tasol nau em i gat strongpela bilip olsem dispela ol liklik tim bai helpim tru Mosbi soka.

Kongate i lusim soka na i go pilai Aussie Rul wantaim West tim. Tasol nau ol wantok bilong em i pilai soka long Blu Kumul na em bai sapotim Blu Kumul.

Igt planti ol arapela sapota tu i autim wankain tingting olsem Kongate.

Olpela nesanel kosa Kolis Pombuai tu i autim wankain tingting. Nau yet em i putim wanpela tim bilong ples bilong em Nali long kik insait long PMSA kik resis. Planti ol yangpela bilong Manus i kik pinis long dispela tim las wik. Ol i dro wantaim Wanzesi 4-4.

Pombuai i amamas long PMSA i kamapim olpela sistem long singautim ol liklik tim long gimv nem. Dispela bai helpim PMSA long kamapim planti mani bilong helpim wok bilong soka.

long lusim olpela presiden, Haula Hume. Hume i go wok nau long Vanimo.

Warisan i tok tu olsem bikpela tingting nau em long lukim olsem Wewak Volibal Asosiesen i mas go pas wantaim Nesanel Volibal Federesen.

long bungim inap mani bilong salim skwat long Rabaul.

Komiti bilong asosiesen i kibung long Trinde nait na ol i pasim tok olsem pri sisen soka resis bai i stat long Epril 1.

PORT MORESBY SOCCER ASSOCIATION PRE-SEASON DRAW FOR

SATURDAY, 4TH MARCH, 1988

Time	Division	Ground	Fixture
10.00	WOM	B1	GFC v Guria
11.30	WOM	B1	Morobe 1 v Westpac
1.00	MEN	B1	Sunam v Verave
2.30	MEN	B1	Tarangau v Ali Utd
4.00	MEN	B1	Westpac 1 v Nali
10.00	WOM	B2	Kula v Morobe 2
11.30	WOM	B2	Sobou v Wanzesi
1.00	MEN	B2	Uni v Wanzesi 2
2.30	MEN	B2	Guria 1 v Solo
4.00	MEN	B2	Morobe 2 v Konokta

SUNDAY, 5TH MARCH, 1988

Time	Division	Ground	Fixture
10.00	MEN	B1	Morobe 1 v GFC 2
11.30	MEN	B1	Maset v Losegu
12.45	MEN	B1	Sobou 1 v BFC
2.30	MEN	B1	Uni 2 v Kula
4.00	MEN	B1	GFC 1 v Lukang
10.00	MEN	B2	Pema v Bornd
11.30	MEN	B2	Rapatona v Stone Axe
12.45	MEN	B2	Saphire v B Kumul
2.00	MEN	B2	Wanzesi 1 v Guria 2
4.00	MEN	B2	Milne Bay v Steamship

Bye: Waliya

WOMENS DRAW

MID WEEK GAMES

Monday: 6th March 1989 Time: 4.45pm
Bisini 1: Kula v Wanzesi 4.45pm
2: Morobe v Waliya 4.45pm
Sobou bye

Thursday: 6th March 1989 Time: 4.45pm
Bisini 1: Morobe v Wanzesi 4,45
Bisini 2: Waliya v Sobou

Plis olgeta pilaiia i mas kamap long taim bilong pilai.

Sapos nogat referi orait tupela kepten i ken makim wanpela referi.

Volibal sisen insait long Wewak i stat gen. Man husat i go pas long volibal kompetisen em Andrew Warisan na namba tu bilong em, Robin Paqam.

Warisan i tok olsem Wewak Volibal Asosiesen bai holim

Wewak volibal i stat nau

CHARLES MALENKI i raitim

namba wan kibung bilong ol long Tunde 7 Mas. Dispela kibung bai i kamap long volibal kot arere long Prince Charles Oval.

Toksave i go olsem wanem ol klap husat i laik pilai insait long kompetisen long dispela yia i ken kamap long dispela kibung.

Bikpela as bilong holim dispela kibung em long makim ol nupela komiti bilong asosiesen, Warisan i tok.

Warisan i tok asosiesen i sori tru

GOROKA Soka Asosiesen bai statim pri sisen soka resis long Sarere 1 Epril. Tasol neks wiken bai ol kik bilong U19 divisen i stat.

U19 resis stat long Goroka

pas U19 soka resis em long makim 18 pilaiia long makim Goroka long sempionsip bilong U19 em bai kamap long Rabaul long lsta wiken.

Asosiesen i makim tupela opisal long go wantaim skwat. Nem bilong tupela em Poli- ap Kisokau (kosa) na Jack Oga (tim menses).

Seketeri bilong Goroka Soka Asosiesen, Jerry Semos i tokim Wantok olsem olgeta pilaiia i mas baim K20 levi fi. Dispela mani bai helpim asosiesen

WANTOK Spot NIUS

Skul bilong pait

NAMBA wan Chin Sun Kung Fu skul bilong Papua Niugini i wok long kamap strong nau. Dispela skul i bin stat long yia 1987.

Tasol stori bilong em i go bek long yia 1983 yet. Wanpela tisa bilong Kung Fu long Saina na tumbuna tru bilong dispela skul long Mosbi, Han Tok Go i bin kamap long Papua Niugini long 1983. Em i bin kam bilong lainim ol studen bilong Allan Hebu long rot bilong yusim bodi long pait.

Long dispela taim planti studen tru i bin kamap long kisim trening bilong pait wantaim ol hap bilong bodi.

Tasol dispela skul i no stap longpela taim. Long 1984, em i pas gen. Olsem na Masta Han Tok Go i go tism gen ol lain long CIS Bomana long pilai Kung Fu.

Em nau long dispela taim, man husat i bin statim Chin Sun Kung Fu skul long Mosbi, Ben Wape i go askim Masta Han Tok Go long lainim em long pait.

Wape i bilong Ialibu long Sauten Hailens provins na nau i stap wok olsem sief sekyuriti opisa long Nesenel Palamen Haus long Mosbi. Em i kisim pinis Lo Han Chee bilong em. Dispela long Saina em i wanpela bikpela namba tru em wanpela man o meri husat i save pilai Kung Fu i ken kisim.



•Dispela foto i soim ol sampela instrakta wantaim papa bilong ol Ben Wape (Ben i sanap namel long ol lain long baksait) ausait long skul bilong ol long Boroko Spots klap.

Ol soka tim bilong Mosbi

OL SOKA tim i stap insait long Mosbi Soka Asosiesen kik resis bilong PMSA kap i pilai aninit long 8-pela pul. Dispela i ken helpim long skelim strong bilong ol tim na ol i ken pilai knock-out resis. Seketeri bilong Mosbi Soka, William Vui i

autim dispela toktok long ol pilaia husat no klia gut tumas. Bihain long dispela ol dispela gem ol bai statim resis bilong PMSA kap.

Daunbilo yu ken lukim ol tim i stap insait long dispela kik resis. Lukim gut, nogut tim bilong yu i win.



PUL 1	PUL 2	PUL 3	PUL 4
Round 1 Wanzesi 3 v M.Bay 4 Steamship 1 v Guria 2 2	Round 1 Rapatona 4 v Sapphire 1 B.Kumul 2 3 v Stone Axe 1	Round 1 GFC 1 4 v Pema 0 Bornd 4 v Lukang 0 Kula 0 v BFC 3	Round 1 Sobou 1 v Uni 2 0
Round 2 Wanzesi v Guria M.Bay v Steamship	Round 2 Rapatona v Sone Aze Sapphire v B.Kumul	Round 2 GFC 1 v Lukang Pema v Bornd	Round 2 Sobou v BFC Uni 2 v Kula
Round 3 Wanzesi v S'ship Guria 2 v M.Bay	Round 3 Rapatona v B.Kumul Stone Axe v Sapphire	Round 3 GFC 1 v Bornd Lukang v Pema	Round 3 Sobou v Kula BFC v Uni 2
PUL 5 Round 1 2	PUL 6 Round 1	PUL 7 Round 1	PUL 8 Round 1
Morobe 1 4 v Maset 1 Losegu 0 v GFC 2 0	Guria 1 0 v Morobe 2 0 Konokta 0 v Solo 3	Westpac 1 1 v Uni 1 1 Wanzesi 4 v Nali 4	Sunam 2 v Tarangau 1 Ali Utd 0 v Verave 1
Round 2 Morobe v GFC 2 Maset v Losegu	Round 2 Guria 1 v Solo Morobe 2 v Konokta	Round 2 Westpac v Nali Uni 1 v Wanzesi 2	Round 2 Sunam v Verave Tarangau v Ali Utd
Round 3 Morobe 1 v Losegu GFC 2 v Maset	Round 3 Guria 1 v Konokta Solo v Morobe 2	Round 3 Westpac 1 v Wanzesi 2 Nali v Uni 1	Round 3 Sunam v All Utd Verave v Tarangau

Alphonse Arnold bilong Bank Line i tok Sore tumas ... mai ... long Bank Line bilong Bargam Thomas Aiye. Tasol em i no ... strong na Bargam i daunim ol Bank Line 17-15.

BENSON and HEDGES

STERLING 25s

Government Warning. Smoking is Dangerous to Health.



Puisim Lark...



Sampela gutpela video muvi bilong dispela wik.

A STAR IS BORN (1954)

★★★

Judy Garland
James Mason

This musical version of the 1937 David O. Selznick movie is still good entertainment, but it loses some of its dra-



. Judy Garland (namel) i singsing na danis long muvi ya "A Star is Born".

Sapos yu laikim ol olupela muvi orait kisim dispela video bilong Judy Garland "A Star Is Born". Ol i wokim dispela muvi long 1954 tasol sapos yu laikim ol muvi we ol man i singsing wantaim bai yu amamas long lukim. Meri ya Judy Garland i ekt long en wantaim James Mason. Ol arapela lain husat i ekt tu long dispela muvi em Jack Carson, Tommy Noonan, Lucy Marlow na Amanda Blake. George Cukor i dairekta bilong muvi. (PGR)

STARS AND STRIPES FOREVER (1952)

★★

Clifton Webb



. Clifton Webb (lephan) long muvi ya "Stars and Stripes Forever".

"Stars and Stripes Forever" em i wanpela fani muvi liklik na bai yu lap indai long sampela hap bilong en. Em i stori bilong wanpela man husat i laik raitim musik tasol no gat man i laikim musik bilong em. Orait em i stat long go pas long mas wantaim ol ben. I tru olsem bai yu les liklik long lukim ol ben i mas tasol musik i kamap gut na ating bai yu tromoi lek tu ya.

STARTING OVER (1979)

★★★★

Burt Reynolds
Jill Clayburgh
Candice Bergen



. Jill Clayburg na Burt Reynolds long muvi ya Starting All Over.

Dispela muvi bilong Burt Reynolds "Starting Over" em i bilong ol bikpela manmeri. Em i stori long wanpela man marit bilong em i bruk na wanem samting i kamap long em. Tupela meri long muvi em eks meri bilong em (Candice Bergen) na gelpren bilong em (Jill Clayburgh). Ol arapela ekta long dispela muvi em Charles Durning, Frances Sternhagen, Paul Sorvino, Mary Kay Place na Austin Pendelton. (AO)

EM-TV MUVI

FRIDAY NIGHT MUVI



PAPA'S DELICATE CONDITION

VIDEO MUVIS



R2-D2 and C-3PO watch rebel troops defend the Rebel Blockade Runner in Star Wars.

Prowse. (PG) Academy Award Nominations—best picture; Lucas, best director; Guinness, best supporting actor; Lucas, best original screenplay.

LUKIM TELEVISIEN



EM TV MUVI



(PGR) SATURDAY NIGHT MOVIE: "DANGER DIABOLIK"

TIETA MUVI

WARDS CINEMA

Table with 2 columns: Date and Description of movie/show.

DRIVE-IN THEATRE

Table with 2 columns: Date and Description of movie/show.

HUON THEATRE (LAE)

Table with 2 columns: Date and Description of movie/show.

THEATRE LAE (LAE)

Table with 2 columns: Date and Description of movie/show.

Main TV schedule table with columns for days of the week and rows for time slots, listing programs and their ratings.

(G) - GENERAL EXHIBITION (PGR) - PARENTAL GUIDANCE REQUIRED (AO) - ADULTS ONLY

Advertisement for Dixi Cola featuring the text 'TAIM YU PILAI TUHAT NA DEK I DRAI O TAIM BILONG AMAMAS...' and 'I Kam Long HOHOLA softdrinks' with a logo.

"SAMPULA OL GUTPELA KASET!"

STAR WARS (1977) ★★

Mark Hamill Harrison Ford Alec Guinness Carrie Fisher

"Star Wars" em i wanpela muvi bilong ol mani go raun antap long skai na bungim ol birua na ol manmeri bilong narapela wol. Ol man i wokim muvi ya i stailim gut tru na husat man i no save bai ting olsem i tru i gat ol kain manmeri na masin olsem i stap long ol arapela ples long skai. Tupela robot R2-D2 na C-3PO i win tru long ekt long dispela muvi. Harrison Ford, Alec Guinness, Carrie Fisher na Mark Hamill. (PGR)



R2-D2 na C-3PO i lukluk long ol birua i pait long Star Wars.

STILL OF THE NIGHT (1982) ★★

Roy Scheider Meryll Streep Jessica Tandy Joseph Summer

"Still of the Night" em i wanpela muvi i kilim narapela na ol i traim long painmaut, orait lukim dispela muvi ya "Still of the Night." Em i stori bilong wanpela dokta bilong ol man husat i gat sik long het na wanpela meri husat i save go lukim em. Ol i ting meri ya (Meryll Streep) i mas kilim wanpela narapela man. Sapos yu gat laik long lukim dispela kain muvi orait kisim dispela video na lukim. (PGR)

THE STING II (1983) ★★

Jackie Gleason Mac Davis Teri Garr Karl Malden Oliver Reed

"The Sting II" em i namba tu hap bilong muvi ya The Sting. Em i bihainim yet stori ya we ol kain kain trikman i save wok na kisim mani. Tasol dispela muvi i no smat tumas olsem namba wan hap bilong en. Jackie Gleason na Mac Davies i kisim ples bilong Paul Newman na Robert Redford tasol tupela i no smat tumas olsem Redford na Newman. (PGR)




Teri Garr na Jackie Gleason long The Sting II.


YU KENPAINIM OL DISPELA VIDEO KASET KLOSTU LONG VIDEO SENTA BILONG YU!!

BIM BOROKO MOTORS

MARINE SHARPIES BANANA BOAT!!



EVINRUDE
OUTBOARD MOTORS
Solid, no problem outboard. The market
leader 4.6.14.25.30.40 hp in stock.



**CLARK DINGHYS, BANANA BOATS, BOAT
CANOPYS, SAIL REPAIRS, REDCO BOAT
TRAILERS, EVINRUDE
SALES & SERVICES.**

**GUY
LAMONT**



**MARINE DIVISION,
PH: 25 5255
EXT: 224**

Rugbi Lig

NIUS

NO KEN SALIM

Issue Namba 4, Fonde 2-8 Mas, 1989

LEVEL 1 KOSA KOS BAI KAMAP

LEO WAFIWA i raitim


PNG RAGBI Futbol Lig i redi nau long karimaut namba wan Level 1 kosa Kos bilong dispela yia aninit long 1989 Nesenel Kosa Skim. Dispela Kos bai i kamap long Nesenel Spots Institut (NSI) long Goroka long Sarere Mas 5.

Wanpela ripot i kam long opis bilong PNGRFL i tok planti kosa tru bilong kain kain lig senta insait long kantri i bin givim nem long stap insait long dispela kos. Bikos bipo long taim ol i stapim aplikesen, opis bilong PNGRFL i kisim nem bilong 20 kosa pinis.

Na aplikesen bilong 7-pela arapela kosa i bin kamap bihain. Olsem na ol i no inap long stap insait long dispela bikpela kos.

Nesenel Kosing Dairekta Ivan Ravu bai i go pas long dispela kos em bai i stap wanpela wik olgeta. Em bai kisim helpim long ol tripela kosa bilong ol arapela spot olsem Tom Brandt, Jan Waddy na Justis Joseph.

Hia em nem bilong ol kosa husat bai kisim Level 1 Kos: Kore Seeto, Age Vele, Andi Akivi (Mendi), John Jacob (Madang), David Oromari (Ramu), Austin Reddy, Dickson Darius, Patrick



Nesenel Kosing Dairekta Ivan Ravu

Dau (Kavieng), Daure Osea, Harold Amos (Schoolboys), Konz Kara (Kundiawa), Ravu Vagi (Lae), Ilo Koko, Billy Wartovo, John Harangu, Clement Francis, Solomon Ravu, Jack Posa, Heagi Isaiha na Sam Heaho (Mosbi).

Na namba tu priliminari kosa kos bilong dispela yia em i bin kamap long Alotau i bin kamap gut tru. Dispela kos i bin kamap long Februeri 15-17. Na 11-pela kosa bilong wan wan klap insait long Alotau i bin stap insait long dispela kos.

Ravu i tok em i amamas tru long lukim tupela olupela Sauten Zone representativ pilaia i stap insait long dispela kain kos. Bikos as bilong holim dispela kos em long apim stended bilong ragbi lig long junia level. Nem bilong dispela tupela pilaia em John Gabisini na Manoa Panta.

Dispela kos i bin kamap gut tru na Ravu i tenkim sekretari/tresera na Provinsal Spots Kodineta long ogeraisim na toksave long ol kosa kamap long kos.

Hia em nem bilong 11-pela kosa husat i bin kamap long dispela priliminari kos: George Aigoma, Lana Sarnuel (Tigers), John Gabisini, Kasa Isai, Paru Naime (Raiders), Manoa Panta, Labui Bua (United), Donald Biru, Sakaio Uduru (Hivolele), Gideon Tairumu (Tarangau) na Bob Fernandez (Bay Eels).

Train tasol



• "Welkam long Mosbi Lig Bare Dium". Dium em wanpela top pilaia bilong Madang Tigers. Tasol dispela yia em bai train stail bilong em wantaim Kone Tigers tim long Mosbi. Poto HENRY MORABANG.

TOKSAVE

TOKSAVE i go long olgeta Lig insait long Nothern Zone olsem bikpela kibung bilong yupela bai i kamap long Fraide Mas 17, 1989. Dispela kibung bai i kamap long Mosbi long Travelodge Hotel.

Ol Lig insait long Nothern Zone olsem Lae, Morobe Country, Wau/Bulolo, Kainantu, Madang, Ramu, Wewak na Vanimo i mas salim mausman bilong ol i kamap long dispela bikpela kibung.

Yupela i ken ringim Asisten Dairekta bilong Nothern Zone, George Mack long toksave olsem yupela bai kamap long kibung o nogat. Telepon Namba bilong George Mack em 42 3501.



T.V, VIDEO, ANTENNA AND SATELLITE SALES AND SERVICE.

FOR THE BEST PRICE CONTACT

TOLEC ELECTRONICS

P. O BOX 822, LAE, MULA STREET,

PHONE: 42 4242 - 42 4253

Skulbois lig bai stat long Westen provins

SKULBOIS ragbi lig insait long Not Flai distrik bilong Westen provins i stat long kamap bikpela nau long dispela yia. Bikos planti edukesen senta insait long distrik i putim dispela gem i go insait nau wantaim ol arapela samting em ol studen bai i lainim.

Kodineta bilong Skulbois Ragbi Lig long Westen provins,

Ian Kakarere i tok olsem tupela skul i sapatim dispela aida na bai skulim ol studen bilong ol long pilai ragbi lig. Nem bilong dispela tupela skul em Kiunga Boy's Taun na Tabubil Haikul.

Dispela yia tupela man husat i gat pepa bilong kosim ragbi i tis nau long Kiunga haikul. Nem bilong tupela em Cornel Daipo na Sutherland Yore. Tupela i redi nau long kirapim skulbois ragbi lig

kompetisen.

Kiunga Boy's Taun em wanpela pos praimer teknikel na vokesinel skul em ol Bruder bilong Monfort Katolik Misen i ranim.

Ol Bruder bilong Monfort Katolik Misen i bilong kantri Frans na Kanada. Ol i save ranim dispela skul.

Ol dispela Bruder no save tumas long pilai ragbi. Tasol ol i save olsem ol bai lainim ol studen bilong ol nau long pilai ragbi.

Bruder Nick bilong Boy's Taun i toksave pinis olsem em bai sapatim Skulbois Lig kompetisen. Olsem na nau yet em i askim pinis ol tisa bilong Kiunga haikul long helpim long kamapim dispela gutpela tingting.

Na long Kiunga haikul yet, skulbois lig bai stat gen taim olgeta samting i redi.

"Bikpela samting em ol studen i mas redi

gut long mekim skul wok bilong ol. Olsem na skul wok em bikpela samting insait long Kiunga haikul.

"Na taim mipela i ogenaism na redim olgeta samting pinis bai i gat inap taim bilong kirapim skulbois ragbi lig kompetisen", Kakarere i tok.

Kakarere i bilip olsem skulbois lig kompetisen long Kiunga haikul bai i stat long tem 2. Bikos long dispela taim ol studen husat i laik pilai ragbi i ken stretim medikel ripot. Na tu bikpela samting em ol i ken kisim tok orait pepa long pilai ragbi long papama bilong ol.

Kakarere i tok moa olsem ating bai i gat skulbois ragbi lig kompetisen namel long ol skul. Na dispela bai i namba wan taim nau bilong kain kompetisen olsem i kamap insait long Not Flai eria long dispela yia.



• Kain kain man i gat kain kain stail. Hia em fulbek bilong West Risev Gret tim i soim stail bilong ol "Saki" long holim bal long wanpela han tasol.

Namba 8 bikpela tumas long Kundiawa

Dia Edita, Kundiawa Lig i wok long redi long kisim 8-pela klap long resis long kompetisen.

Mi ting olsem dispela namba em i bikpela tumas long liklik taun olsem Kurdiawa na tu kompetisen namel long ol klap bai i no inap strong na gutpela olsem las yia.

Las yia, Kundiawa Lig i bin gat 6-pela klap tasol na kompetisen i bin gutpela tru. Ol sapatu i save sanap long sait i save amamas tru long lukim. Dispela i bin wokim na Kundiawa i bin winim Highlands Inter-zone pilai long Goroka na Hagen las yia.

Sapos Kundiawa Lig i laik holim dispela taitel olsem top lig senta long Hailans rejion, em i mas gat 6-pela klap tasol i resis long kompetisen long Kundiawa Lig.

Waim Tangigl, Kundiawa.

Tigers i nekim Bulldogs long Sidni Lig

BIKPELA gem bilong las wiken long Sidni Ragbi Lig kompetisen long Australia i bin kamap namel long Balmain Tigers na Canterbury Bulldogs. Tupela tim ya i bin kaikaim bun long Sarere 18 Februari 1989.

Planti pipel tru i bin kamap long lukim dispela gem. Bikos dispela tupela tim i bin pilai long gren fainal bilong las yia na Canterbury i win.

Dispela gem i bin kamap strong tru olsem gren fainal bilong las yia stret.

Tasol long Sarere, Balmain Tigers wantaim ol gutpela pilaia bilong las yia yet olsem skipa Wayne Pearce, Paul Sironen, Steve Roach, Benny Elias na Garry Jack i pilai gut tru na autim Canterbury 28-16.

Ol arapela tim insait long Sidni Lig i mas putim was nau long ol tim olsem Balmain Tigers, Canterbury Bulldogs na Brisbane Broncos. Bikos ol dispela tim i gat planti gutpela pilaia. Olsem na ol i stat long kamapim stongpela pilai nau.

Na kepten bilong PNG Kumul tim, Bal Numapo i kamapim gutpela trening nau wantaim Canterbury klap. Em i gat bikpela sane bilong pilai insait long Sidni Lig. Tasol wanpela samting nau em em i mas senisim dispela pasin bilong em long sem.

Konjo em sempion bilong Bomana

GERSON TOKANA i raitim

KONJO Tigers em i sempion bilong Bomana Tas Ragbi kompetisen. Konjo i bin autim McGregor Raiders 9-7 long gren fainal long las Sande.

Dispela pilai bilong ol lain plisman bilong Bomana na McGregor i bin gutpela tru.

Raiders i bin go pas na kikum wanpela fil gol i go namel long tupela pos. I no long taim na ol Konjo tu i bekim wantaim fil gol na tupela wantaim i dro 1-1.

Dispela taim nau em tupela tim wantaim i stat wokim paia. Konjo i wok long muvim ol Raiders i go bek long trailain bilong ol. Na hariap tru na Herman Ipai i kisim bal na abrusim gut tru difens bilong Raiders long slip antap long trailain namel stret long gol pos. Dispela trai bilong em i bringim Konjo long go antap long 5-1. Ol i bin kikum ken i go insait na bringim Konjo i go antap long 7-1.

Long namba tu hap, Raiders i stat pilaim kain stail pilai bilong ol. Jonah Tokiong, Jacob Kautu, Patrick Seko na George Revesit i

wok long go pas long ol.


Tasol Konjo i was gut tru long ol. Referi i bin painim ol Raiders i opsait na givim penelti kik i go long Konjo insait long mak bilong Raiders.

Kika bilong Konjo na wanpela top pilaia Fedinan Nongas i saitim gut tru lek na bal i go insait long tupela gol pos na putim poin i go antap moa 9-1.

Raiders i no wari long dispela ol i wok long subim het yet i go na ol i putim wanpela trai namel stret long pos. Na kik bilong dispela trai tu i sut stret i go namel long tupela gol pos na bringim poins i go antap long 9-7.

Ol Raiders i bin pilai gut tru long las minit tasol taim i bin sot na Referi i stapim gem. Konjo Tigers i autim McGregor Rouna Raiders 9-7.

Dispela win bilong Konjo Tigers i mekim Konjo long holim taitel tupela taim olgeta.



• Nupela huka bilong West A Gret tim Danny Moi (No. 12) i ran i go long helpim narapela pilaia bilong em. Moi em wanpela gutpela pilaia bilong Saut Setelmen Ragbi Lig resis husat i pilai nau wantaim West. Em i kisim posisen bilong kosa pilaia Roy Heni. Heni i pilai nau long prop posisen.

Ol referi i gat bikpela wok

Referi Asosiesen bilong ol yet.

Sapos nogat gutpela Referi Asosiesen long ragbi lig na ol arapela spot, bai stended bilong pilai i no inap long kamap gut.

Olgeta ragbi-referi asosiesen insait long PNG i mas putim kamap nau wanpela lo we ol i ken bihainim.

Ol referi i ken lukautim gut gem sapos ol i gat gutpela save long lo bilong pilai. Nau yet, mipela mas stat long kamapim wanpela sistem bilong skelim stended bilong ol referi na baim ol long wok bilong ol. Bikos dispela em wanpela

samting mipela i ken mekim long apim stended bilong ol referi insait long kantri.

Ol referi i gat bikpela wok bilong lukautim pilai insait long fil. Na planti gutpela pilaia i save go insait long fil long bagarapim bodi bilong ol olsem brukim bun long rabis pilai.


Olsem na sapos ol referi i bihainim gut ol lo bilong ragbi lig bai dispela i givim bikpela helpim tru long apim stended bilong gem long sampela kain we.

I tru olsem planti Referi Asosiesen i save haim ol referi

long olgeta wiken. Olsem na ol referi i laki long dispela bikos planti A Gret pilaia i no save kisim pe olsem.

Tasol nau yet i luk olsem sampela referi i ting olsem dispela em namba tu wok mani bilong ol. Olsem na ol i no save wari sapos ol i lukautim gut gem o nogat.

Dispela kain pasin i mas pinis nau sapos mipela i laik apim stended bilong ragbi insait long kantri. Bikos planti pilaia bai tingim sekyuriti bilong ol na bai i no inap tingting long kamapim gutpela pilai taim ol i kisim fil



A TALL YARN from YORE

LAS wik mi bin toktok long PROFESSIONALISM. Bikos dispela em bikpela eria em i ken helpim long apim stended bilong ragbi lig insait long kantri.

Wanpela samting mi bai toktok nau aninit long dispela het tok yet em long wok bilong ol referi. Olgeta Lig insait long kantri i gat

SYDNEY LEAGUE

MAKING THE BIG GAME BIGGER

MAKING THE BIG GAME BIGGER

WINFIELD CUP '89

RUGBY LEAGUE DOWN - UNDER



• Bal Numapo i sanap wantaim Canterbury Bulldogs jesi bilong em. Nau yet em i gat bikpela sans long kisim ful kontrak wantaim Bulldogs long pilai long A Gret tim.

Bal i gat bikpela sans

KEPTEN bilong Kumul ragbi lig tim bilong PNG husat i pilai nau wantaim Canterbury reserve gret long Sidni Lig, Bal Numapo i apim stret nem bilong mipela long Australian.

Las wik stori bilong em i bin kamap long wanpela ragbi lig niuspepa bilong Australia ol i kolim Rugby League Week. Wanpela niusman, Daniel Lane i raitim stori bilong em.

Lane i raitim olsem Numapo em i wanpela pilaia husat i gat gutpela save bilong pilai ragbi. Wanpela pilaia husat i bin givim wankain toktok tu em Mark Elia.

"Numapo em wanpela pilaia ol birua bai painim hat liklik long takolim. Bikos em i gat gutpela bikpela strongpela bodi", Elia i tok.

Elia i save pilai long senta posisen bilong Nu Silan Kiwi. Canterbury klap i kisim em tu long pilai wantaim ol.

Elia i tokaut olsem bikpela wari bilong em nau em long resis wantaim Numapo long kisim ful kontrak wantaim Canterbury klap A gret. Bikos em tu save olsem sapos em i no pilai strong bai Numapo i winim em na kisim kontrak na, em bai lusin sans bilong em.

Mark i save gut tru long kain pilai bilong Numapo. Bikos tupela i bin pilai engensim tupela yet long tripela intenesenel gem pinis.

I no bin i gat bikpela stori taim Numapo i kamap long Australia. Tasol sapos mipela i lukluk long we em i wok long oo nau, i luk olsem dispela nem Numapo bai kamap planti taim long ol niuspepa bilong Australia olsem Rugby League Week long bihain.

Sapos Numapo i kamapim gutpela pilai long risev gret na go pilai antap

long A gret, em bai opim dua bilong ol ragbi lig pilaia bilong PNG long go daun pilai long Australia insait long Sidni Lig kompetisen.

Numapo i tok olsem, "Dairi Kovae i bin pilai wantaim Norths long las yia. Na nau mi gat sans long pilai wantaim Canterbury Bulldogs. Mitupela i opim dua na mi save olsem sans bilong ol PNG pilaia long kam daun pilai long Australia i stap long mitupela".

Taim ol i bin trening long Belmore, Numapo i bin kamapim sampela gutpela rekot. Em resis wantaim ol arapela fowat pilaia bilong Canterbury long 50 mita mak na winim ol. Na dispela i amamasim tru ol opisal bilong Canterbury klap.

Bihain kosa bilong em Phil Gould i putim em long resis wantaim sampela beklain pilaia. Tasol Numapo i winim ol tu. Na las tes em long resis wantaim Robin Thorne. Thorne em i wanpela pilaia tasol bilong Canterbury husat i gat moa spit. Tasol Numapo i winim em long taim tupela i resis.

Taim Numapo i kam bek bihain long sisen i pinis, em bai tingting long lainim ol samting em i bin lainim long Sidni long ol lokol pilaia.

Nau em bai pilai wantaim na engensim sampela top pilaia bilong Australia olsem Noel Cleal em bipo em i save lukim tasol nem bilong ol long niuspepa.

Numapo i tok tu olsem ol lain long ples bai laikim tru long save long ol pilaia olsem Noel Cleal na kain trening bilong ol.

Maketing opisa bilong Canterbury, Peter Mortimer i tok Numapo i gat bikpela sans long pilai insait long Sidni Lig kompetisen. Tasol bikpela samting nau em em i mas traime na lusim dispela pasin bilong em long sem.

Winfield 25's



LEAGUE NEWS

BENSON and HEDGES WEEKLY POINT LADDER & DRAW TABLE

PROVINCIAL LEAGUE



• Ol bagaros ya bilong Konjo Tigersi amamas bikos ol i sempion nau bilong Bomana Tas resis. Ol i winim McGregor Raiders 9-7 long gren fainal bilong Bomana Tas resis em i bin kamap long las wiken. Poto JOSEPH KAU.



• Winga bilong Magani (No.5) i nogat we long go bikos wanpela pilaia bilong Kone Tigers i holim em pinis. Olsem na em i pudaun na slip isi tasol long graun i stap. Kone Tigers i winim dispela gem 24-18. Poto HENRY MORABANG.



• Ol pilaia bilong McGregor Rouna Raiders tim. Trangu ol i no strong tumas na lus long Konjo Tigers 9-7. Tupela plis tim ya i bin kalkaim bun long gren fainal bilong Bomana Tas resis em i bin kamap long las wiken. Poto JOSEPH KAU.

Wewak

Pora Oval Saturday 4th March 1989

11.00am	U19	Tarangau	v	Tigers
12.30pm	U19	Defence	v	Wharfies
2.00pm	A/res	Tarangau	v	Tigers
3.30pm	A/res	Defence	v	Wharfies
5.00pm	A	Tarangau	v	Tigers

Sunday 5th March 1989

12.00pm	U19	Works	v	Country
1.30pm	A/res	Works	v	Country
3.00pm	A	Defence	v	Wharfies
4.30pm	A	Works	v	Country

Bye: Royals

NCD

National Capital Rugby Football League

Sunday 5th March 1989 Game No. 1 - Pre-season

9.00am	U17	Boroko	v	Korobosea
9.35pm	U17	Bomana	v	Tokarara
10.10pm	U17	Hohola	v	Waigani

10.45pm	A/res	Boroko	v	Korobosea
11.30pm	A/res	Bomana	v	Tokarara
12.15m	A/res	Hohola	v	Waigani

1.30pm	A	Boroko	v	Korobosea
2.30pm	A	Bomana	v	Tokarara
4.00pm	A	Hohola	v	Waigani

Goroka

Goroka Rugby Football League

Sunday 5th March 1989 Game No. 2 - Pre-season

1.00am	A	Brothers	v	Tigers
2.00pm	A	Tarakum	v	United
3.00pm	A	Siane	v	Hawks
4.00pm	A	Tarno	v	Country

Lae

Lae Rugby League Round One Draw Saturday 04/03/89

Time	Grade	Fixture
12:00	Res	Defence v Spiders
1:20	Res	Brothers v Panthers
2:40	Res	Magani v Royals
4:30	A	Defence v Spiders

Sunday 5/03/80

8:00	Res	Tigers v Tarangau
9:00	A	Spiders 3
10:00	A	Magani v Royals
11:00	A	Tigers v Tarangau

PRE-SEASON POINT LATA

Pool A	Pool B
Tigers 4	Panthers 3
Tarangau 2	Spiders 3
Magani 2	Defence 2
Royals 1	Brothers 0

Minj

Minj Rugby Football League

Saturday 5th March 1989

Game No. 1 - Pre-season

10.00am	U17	Tarangau	v	Brothers
11.00pm	U17	Hawks	v	Panthers
12.00pm	U17	Royals	v	West

1.00pm	A/res	Tarangau	v	Brothers
2.00pm	A/res	Hawks	v	Panthers
3.00pm	A/res	Royals	v	West

Sunday 6th March 1989


1.00pm	A	Tarangau	v	Brothers
2.00pm	A	Hawks	v	Panthers
4.00pm	A	Royals	v	West



• Ol arapela pilaia bilong Canterbury i amamasim wanpela pilaia bilong ol bihain long em i putim wanpela trai egensim Balmain Tigers. Tupela tim ya i bin pilai long gren fainal bilong Sidni Lig long las yia na Canterbury i win. Tasol las wiken Tigers i winim Canterbury 28-16. Poto WILLIAM KOTSON.




• Hokama A Gret tim bilong Hawks Op sisen kompetisen insait long Mosbi. Poto JOSEPH KAU



• Dispela yia ol wokman bilong St John's Ambulance i sambai arere long fil long helpim ol pilaia husat i kisim bagarap. Tupela yia i go pinis St John's Ambulance i no givim kain sevis olsem. Olsem mipela oigeta mas givim sapat nau long ol. Poto HENRY MORABANG.



CAMBRIDGE CUP P.N.G. Big League



SINCE 1985

SUPPORTING
THE GREATEST
GAME OF ALL
AND STILL
GOING STRONG

1985
PORT
MORESBY
DCA

1986
PORT
MORESBY
DCA

1987
MT HAGEN
TIGERS

1988
NGIP
MURUKS

IT IS ON
AGAIN
IN
1989.
WHO WILL
TAKE IT?

CAMBRIDGE CUP P.N.G. Big League

Kimbe bai putim lait long fil

WOK bilong putim lait long Kimbe Ragbi Futbol Lig Oval bai kirap long stat bilong mun Mas. Seketeri hilong Kimbe Rugby Lig Grevacious Rovi i bin tokim Rugby Lig Nius olsem long Mande 27 Februari.

As bilong dispela em long givim bikpela helpim long holim ol gem long nait. Bikos ol gem em i no kamap long wiken i ken kamap long nait.

Ol arapela wok i no inap long kamap inap dispela wok bilong putim lait long fil i pinis.

Long ol arapela samting, Lig i askim nau olgeta tim na klab long rejisterim olgeta pilaia. Na tu wanpela dokta i mas sekim gut olgeta pilaia na tok orait bipo long ol i kisim fil.

Dispela i bilong stapim wanpela bikpela asua em i bin kamap long las yia we

FRANCIS ULIAU i raitim

wanpela pilaia i bin dai.

Las yia wanpela pilaia i bin dai long fil bihain long em i kisim wanpela strongpela hevi takol. Dispela pilaia em klap em i pilai long em i no rejisterim em. Na tu tim dokta i no givim tok orait long em i kisim fil.

As bilong dispela em long stapim Lig long painim kain hevi gen.

Na dispela wiken bai Lig i pilaim namba tri gem bilong sisen propa.

Long bikpela A Gret gem bilong las wiken, Yunaitet i winim Brothers 22-20 long tupela poin tasol.

Yunaitet i winim dispela pilai long gutpela strongpela pilai long fowatlain. Ol pilaia husat i bin pilai strong long fowatlain em Francis Henesi, Daplen Francis na top hap bek pila-

ia, Harry Yoma.

Na long Brothers em ol pilaia olsem Tony Miria, Francis Ben na Leo Bigot i pilai strong tru.

Miria i bin wanpela olupela ripresentativ pilaia bilong Island Zone long bipo.

Ol i bin pilai strong tru na setim ol beklain pilaia bilong ol long putim 4-pela trai olgeta. Tasol ol i lus bikos tripela trai tasol em kik bilong gol i karim kaikai.

Long ol arapela A Gret gem, ol primia bilong las yia Hawks i soim gen pawa bilong em na winim Umboli Raiders 20-18. Na Lae Biscuit Tarangau i no strong tumas na lus long Twisties Muruks 18-16 long tupela poin tasol.

Dispela gem namel long Muruks na Tarangau i no bikpela gem bilong las wiken. Tasol i bin holimpasim tru ai bilong planti manmeri na opisal husat i bin lukim.


Tarangau wantaim ol gutpela strongpela pilaia bilong ol olsem John Korea, lok posisen pilaia Peter Kuria na winga John Varui i bin kamapim strongpela pilai tru.

Tasol ol gutpela pilaia bilong Muruks olsem Brown Bae, Maniot Kaliop, na Bob Towes i pilai strong tru na autim ol. Bae em wanpela olupela pilaia bilong DCA A gret tim long Mosbi.

Long B Gret kompetisen, United i winim Brothers 22-8, Umboli i autim Hawks 26-6 na Tarangau i laki na autim Muruks 16-10.

Ol junia gret olsem U19 na U17 bai statim namba wan gem bilong ol long dispela wiken.

Ol opisal i bin senisim olgeta gem bilong junia i kam long dispela wiken bikos ol registresen buk i no bin kamap hariap. Long dispela as tasol na gem bilong ol sinia i stat pas long ol junia.



Maski painim wok long ovasis

MI sapatim tru Alex Lubanski long toktok bilong Tony Kila na Wata Sauna. Bikos Western Suburbs i no givim gutpela sans long tupela we tupela i ken soim tru stail bilong ol long pilai.

Tupela i no tasim bal o holim bal liklik we tupela i ken soim stail bilong ol. Ol arapela pilaia bilong Western Suburbs i griti tru long bal.

Planti pilaia i laik pilai long Australia. Olsem na olgeta bai traim strong long kamapim gutpela stail em i ken amamasim ol opisal bilong klap ol i laik kisim kontrak wantaim.

Olsem na ol kosa i no lukluk long tim i pilai o wari long tim i win. Bikos ol i laik lukluk tasol long stail bilong wan wan nupela pilaia.

Wankain pasin i bin kamap long taim Rest of the World tim i pilaiam Australia. Dispela tim em planti pilaia bilong Nu Silan i stap insait long en.

Ol i save griti long bal na i no salim wanpela bal i go liklik long Dairi Kovae. Kovae em wanpela pilaia tasol bilong PNG husat i bin stap insait long dispela tim na pilai long winga posisen.

Mipela i mas mekim ol klap long Australia i painim ol pilaia bilong mipela. Olsem na ol wan wan pilaia i no ken mekim praivet kontrak long go pilai long Australia. Sapos mipela i kamapim gutpela stended bilong pilai bai ol klap long Australia i givim stret kontrak long mipela. Na mipela i no inap go daun long traim resis long kisim kontrak.

Mi ken tok olsem mipela i gat sampela bilong ol top ragbi pilaia long wol. Olsem na mipela i mas tingting tasol long yusim ol dispela gutpela pilaia long apim stended bilong ragbi insait long kantri.

Na long dispela tasol bai mipela i ken winim ol arapela ragbi lig kantri olsem Australia.

Mi amamas long save olsem Dairi Kovae wantaim Arnold Krewanty i kisim gutpela kontrak nau wantaim Newcastle Knights. Newcastle i gat bikpela bilip long tupela na givim stret kontrak long tupela. Nau yet i luk olsem tupela i gat gutpela sans long pilai insait long A gret.

Bal Numapo tu i kamapim gutpela pilai nau long Australia wantaim Canterbury klab. Em i pilai nau long risev gret. Dispela i soim olsem em i gat gutpela sans long pilai long A gret.

Na long Mosbi yet i luk olsem mipela i nogat ol komiti bilong makim sisen propa dro. Olsem na disisen bilong larim pri sisen kompetisen i stap yet long wanpela wiken moa i bin kamap. Komiti i mas kamapim dro nau na mipela i no ken larim dispela i stapim kompetisen long go het.



• Yu no ken ting olsem dispela bikpela man em husat. Em bikpela brata bilong Gideon na Haoda Kouoru, Nao Kouoru. Olgeta i save pilai long West A Gret tim long Mosbi.



• Pilaia bilong Defence i kisim hai takol stret i kam long han bilong wanpela West pilaia. West i laki na winim Defence 18-14 long A Gret kompetisen.

Brothers i bekim dinau

JOE KAU i raitim

BROTHERS i bin bagarapim stret Tigers 26-6 long namba wan pri-sisen gem bilong ol long Madang Ragbi Lig long Sande las wiken.

Tigers i bin winim Brothers long gren fainel las yia na las Sande em taim bilong ol Brothers na ol i bin bekim. Brothers i bin traim sampela nupela na yangpela pilaia bilong ol long wanem sampela pilaia bilong klap i lusim ol na pilai wantaim Hawks long dispela sisen. Ol yangpela pilaia bilong Brothers i soim olsem dispela strong bilong las yia i stap yet na ol i bin bagarapim stret Tigers.

Wanpela gutpela pilaia bilong Tigers husat i no bin stap long dispela pilai em Brown Sil husat i stap nau long Simbu provins. Tasol olgeta ol arapela i bin pilai.

Long ol narapela gem, ol yangpela bilong Air Niugini Harry Rogers i save kosim ol i bagarapim stret sindaun bilong nupela tim Tarangau 22-12.

Air Niugini i gat ol nupela pilaia tasol na planti long ol i save skul long Divine Word Institute. Air Niugini i soim olsem em i wanpela tim em ol arapela i mas was long en long dispela yia.

Tarangau i no bin gat strong long stapim ol, tasol i luk olsem ol bai kamapim gutpela pilai long bihain taim. Narapela gem tu namel long Hawks na Panthers, Hawks i nekim Panthers 22-12.

Namba tu kibung bilong Noten Zone

LEO WAFIWA i raitim

WANPELA toksave i bin kamap olsem bikpela kibung bilong olgeta Lig insait long Noten Zone bai i kamap long Sarere Februari 11 long Madang. Tasol sampela Lig i no salim i presentativ bilong ol kamap long kibung. Olsem na dispela kibung i no bin kamap.

Ektung Darekta bilong Noten Zone, George Mack i tokim Ragbi Lig Nius (RLN) olsem ol ripresentativ bilong 4-pela lig tasol i bin kamap long dispela kibung. Ol dispela Lig em Lae, Morobe Country, Madang na Ramu tasol i bin kamap long kibung.

Ol arapela Lig insait long Northern Zone olsem Kainantu, Wewak, Wau/Bulolo na Vanimo i no bin salim wanpela ripresentativ long dispela kibung.

Mack i tokim RLN olsem narapela kibung bai i kamap long Fraide 17 Mas, 1989. Dispela kibung bai i kamap long Travelodge Hotel long Mosbi.

Olsem na namba tu toksave i go gen long olgeta Lig olsem ol i mas salim wanpela ripresentativ

long dispela kibung.

Bikpela samting em ol bai toktok long dispela kibung em long mekim kalenda bilong dispela yia. Narapela samting em ol bai toktok moa long en insait long dispela kibung em long ol trail gem wantaim sponsasip bilong dispela sisen.

Las yia Noten Zone i no kisim wanpela sponsasip. Tasol dispela yia, Mack i laikim olsem Northern Zone i mas kisim wanpela sponsasip.

As bilong dispela em long helpim long holim ol Noten Zone Trails. Na tu long helpim kari-maut ol arapela ektiviti em olgeta Lig insait long Noten Zone bai stap insait long en.

Mack i tok olsem em i toktok pinis wantaim 6-pela praivet kampani long dispela. Na tripela bilong ol dispela kampani i tokaut pinis olsem ol bai givim helpim long sait bilong sponsasip.

Mack i bilip nau olsem bipo long Mas 17, em bai kisim wanpela gutpela ansa.

NCRFL bai stretim pilai

NESENEL Kapitel Ragbi Futbol Lig (NCRFL) bai statim pri sisen resis bilong em long dispela wiken long Sande. Dispela pri-sisen resis bai stap i go inap long 7-pela wik olgeta.

Lig i toksave long olgeta klap pinis olsem ol dispela pilaia husat i kamap long long namba wan pilai long Sande i mas rejista bipo long ol i kisim fil.

Presiden bilong NCRFL, Tau Peruka i tok olsem sapos wanpela klap i putim ol pilaia em i no rejista yet i go insait long fil, dispela klap bai baim K50 fain mani i go long Asosiesen.

Olsem na olgeta klap na tim i mas stretim rejistresen fi bilong ol pilaia bilong ol long Sande moning. Wanem klap i no mekim olsem bai i no inap putim ol dispela arapela pilaia long fil.

"Mipela bin givim inap taim pinis long ol klap long stretim ol rejistresen fi bilong ol pilaia. Na sapos wanem tim i no baim hariap ol dispela fi bipo long Sande bai asosiesen i autim ol stret long resis bilong dispela sisen," Peruka i tok.

"Asosiesen bai i no inap harim tu toktok bilong ol opisal bilong ol klap long givim sampela moa taim long kisim ol dispela mani bilong stretim rejistresen fi bilong ol."

Ol dispela lain bikman na opisal bilong ol klap i mas save olsem long taim ol i baim afliessen fi bilong ol klap i go long Lig, ol i bin putim ol yet long go pas long stretim ol arapela fi na wanem

SUMEO KAKARERE i raitim

samting em Lig i laikim long en.

Long wanem toktok i bin kamap long maus bilong ol sampela opisal bilong klap, nogat wanpela klap i gat inap namba yet bilong putim wanpela ful tim bilong ol tripela gret long resis.

Resis bilong pri-sisen bai i stap long tripela divisen, U17, U19 na ol Sinia.

Long ol arapela samting em i bin kamap long Lig, Boroko Hotel i kamap gen pinis na sponsorim pri-sisen lig bilong NCRFL wantaim K400. Hotel bai i givim tu wanpela rum bilong ol eksekutiv bilong Lig na klap opisal long holim ol kibung bilong ol long olgeta wik.

Namba tu presiden bilong NCRFL, Inspekta Mans Kei husat i bin go pas long stretim sponsa wantaim Boroko Hotel, i tok tu olsem Hotel bai i givim ol arapela liklik prais long olgeta wiken taim sisen propa i stat.

Ol i wok long tingting nau long givim K50 long top pilaia bilong wanpela wiken.

Wanpela gutpela sapota bilong bilong NCRFL, Joseph Kau bai i sponsorim tu U17 'best and fairest' o gutpela pilaia prais bilong pri-sisen.

Kau i tok olsem em bai sponsorim dispela prais long poket mani bilong em yet. Kau i bin tokaut long dispela long wanpela klap kibung em i bin kamap long Tunde 21 Februari, 1989. Dispela kibung i bin kamap long Hohola yut developmen senta.

Togala wari long Mosbi

IAN KAKARERE i raitim

DEFENCE A gret tim bilong Mosbi i lusim nau sevis bilong wanpela gutpela strongpela pilaia na kepten Alex Togala. Bikos Togala i stap nau long Kiunga.

Togala i save wok olsem wanpela Koperel long PNG Difens Fos. Em i stap nau wantaim Sapot yunit bilong Enjinerim dipatmen long Kiunga.

Togala i gat bikpela tingting long pilai ragbi lig. Tasol strongpela tingting em long wok bilong em olsem wanpela soldia.

"Mi gat bikpela laik tru long pilai ragbi lig long Mosbi. Tasol namba wan samting em wok bilong mi.

"Na tu olsem wanpela non komisen opisa, mi gat planti wok bilong mekim. Sapos mi wok olsem wanpela praivet soldia bai mi gat

moa taim", Togala i tokim *Ragbi Lig Nius* olsem.

Togala i tok, "Mi save olsem Difens Fos i no inap salim mi i kam hariap long Mosbi bikos mi wanpela soldia.

"Mi bilip tasol olsem bipo long Mas 10, mi mas stap long Mosbi. Tasol dispela i stap tasol long ol bos bilong mi", em i tok.

Togala i mekim mentenens wok nau long Kiunga wantaim sapot yunit bilong Difens Fos.

Nau yet em i save esesaisim em yet i stap long gutpela strongpela trening bilong ami. Na tu olgeta de em i save pilai ragbi tas wantaim ol arapela soldia long redim em yet long pilai ragbi lig gen.

Pepsi i sapotim Lae lig

GERSON TOKANA i raitim

TARANGAU bai autim save bilong ol long rausim ol Tigers long bikpela gem long Sande. Tigers em i stap namba wan long pri-sisen lata wantaim 4 poin na Tarangau wantaim 2 poin long pol A.

Tasol Tarangau em i wanpela tim i gat planti gutpela pilaia husat i bin winim wanpela pilai long resis. Las wiken ol i inap long winim pilai tasol ol liklik asua tasol na ol i bin lus long Magani.

Ol lain bilong Tigers tu bai kirapim strongpela pilai bikos ol i laik stap antap yet long lata.

Long narapela bikpela gem long Sarere, Spiders bai nekim Difens Spiders em rana-ap long Cambridge Kap las yia na primia tim

bilong Lae lig. Difens i slek liklik long dispela yia.

Las wiken ol i no bin pilai egenisim Brothers na givim tasol dispela gem i go long Brothers. Tasol bai yumi lukim gen long dispela wiken. Nogut bai ol i pairapim stret Spiders.

Presiden bilong Lae Ragbi Lig, Pater Yasi i bin tokaut tu long Sapot bilong Pepsi Cola i go long Lae Ragbi Lig. Pepsi i bin givim K600 i go long Lae Ragbi Lig long helpim ol long dispela yia. Pepsi Cola i bin givim tu sampela arapela liklik samting bilong helpim ol pilaia long gem.



• Winga bilong Magani (No. 5) i nogat we long go bikos bagaros nogut bilong Kone Tigers i tasim em pinis long lek. Olsem na em i pudaun slip long graun. Ol yangpela bilong Kone Tigers i winim dispela gem 24-18. Poto HENRY MORABANG.

Eels em sempion bilong Gerehu

SUMEO KAKARERE i raitim

PARA EELS em i sempionsip nau bihain long em i autim Poolside Raiders 7-4 long gren fainal bilong Gerehu tas resis. Tupela tim ya i bin kaikaim bun long Sarere.

Long stat bilong pilai, ol pilaia long tupela sait wantaim i kamapim strongpela pilai tru. Bikos tupela tim wantaim i gat strongpela tingting long winim gren fainal.

Eels i winim dispela gem bikos em i gat ol gutpela beklain pilaia husat i gat planti spit taim ol i ran.

Na tu ol i bin pasim bal long wanpela sait i go long narapela sait. Na dispela i bin paulim ol pilaia bilong Roosters long bihainim bal na sotwin nating long sil.

Ol gutpela beklain pilaia bilong Eels i putim wantaim pilai bilong ol klostu long pinis bilong namba tu hap na salim winga Vincent Friday i go putim las trai long bringim skoa i go 6-4.

Tasol referi John Peter i bin stapim gem samting olsem 7-pela minit bipo long fultaim bikos tudak i bin kamap.

Ol opisal bilong tupela tim i toktok wantaim na kamap long wanpela disisen olsem tupela tim wantaim bai pinisim hap pilai long Sande.

Orait long Sande Para Eels wantaim Poolside Roosters i kaikaim bun gen.

Na samting olsem 2-pela minit tasol bipo long gem i stat, Eels i kisim wanpela poin long fil gol. Dispela fil gol i kamap long lek bilong 5/8 pilaia, Rossen Matanga. Kik bilong em i bringim Eels i go pas yet long skoa 7-4.

Roosters i no laik tru long lusim dispela gem. Olsem na ol pilaia bilong em i kamapim strongpela pilai tru.

Tasol ol malio nogut bilong Eels i save yet na putim strongpela was tru long trailain bilong ol inap fultaim.

Para Eels i winim Poolside Raiders 7-4.

Ol pilaia bilong Eels husat i bin pilai gut tru long dispela tupela de em fulbek Ovo Rai, kosa pilaia Kipling Aisi na winga Vincent Friday.

Na long Roosters em hapbek Bruce Mera. Mera i kamapim gutpela pilaia tasol em i no kisim gutpela sapot long ol arapela pilaia.

Vincent Friday husat i save pilai long winga posisen bilong Eels i kisim Gerehu Supamakot top trai skoara bikos em i bin kamapim top pilai long stat bilong sisen i kam inap nau.

Roosters i kisim tropi wantaim K100 prais mani bilong kamap namab tu top tim long dispela sisen.



• Bikpela fowat pilaia bilong Tarangau, Ben Bire i kisim sampela skul long referi Jubilee Lavako. Ating em i mas kamapim sampela paul pilai ya. Dispela gem i bin kamap strong tru tasol Paga Panthers i strong na winim Tarangau 27-6. Poto HENRY MORABANG.

WANTOK

SPAK MAIK!



BARGAIN CLOTHING PTY LTD P.O. BOX 3579, LAE

WHOLSEL PRAIS K4.50


NAU EM K3.50/kg

OL KAIN KAIN KLOS I STAP!!

* SPESEL BILONG OL MERI

45 kg KARAMAP - K100.00 TASOL

RAGS BILONG WOKSOP - K1.00/kg



SAPOS YU LAIK MIPELA SALIM I KAM... RINGIM: 42 4730 FAX: 42 5714

REBO

LONG 3-KLOK REBO I GO KOT NA EM WINIM...

REBO YU WINIM KOT.. NOGAT WITNES I KAM!

TENKIU TRU YO ONA!

HARIAP TRU EM GO LONG PLES BALUS...

TARANGU, EM I NO WAGWAS.. EM KISIM LIKLIK HANBAG TASOL NA EM KALAP LONG BALUS...

HARIAP!!

MAN!! KLOSTU MI ABRUSIM BALUS!

EM KAMAP LONG PLES BALUS BILONG NUSILAN. TASOL NOGAT MAN I WETIM EM...

TEKSI!.. KARIM MI GO LONG KLAB!

...HARIAP TRU EM KISIM TEKSI NA GO LONG OPIS BILONG TIM MENESA...

TIM MENESA I AMAMAS LONG LUKIM EM...

REBO MI AMAMAS LONG LUKIM YU.. TASOL YU MAS MALOLO NAU STAP LONG ARERE..

...OL I SINDALIN NA TOK TOK...

OKE, BAI MI SINDALIN LONG ARERE NA LUKIM GEM TASOL!

LONG SATADE TIM BILONG REBO I PILAI...

...REBO I SINDALIN ARERE NA LUK-LUK LONG GEM...

KAMON BRO! BRUKIM BUN BILONG OL!

OL I PILAI I STAP NA PORO BILONG REBO I BRUKIM LEK BILONG EM...

HARIAP!! TOKIM REBO LONG SENIS! EM MAS KAM INSAT NA PILAI

OOH!

I GO MOA NEKS WIK

PINIKI

LIKLIK TAIM BIHAIN, TEKSI KAM LUSIM PINIKI LONG HAUS.

JOHN KROS NOGUT TRU NA LAIK PAITIM PINIKI.

HA!.. KANDERE, MASKI LONG PAIT!!

PINIKI NA JOHN STAT KROS LONG MONI NA KAIKAI. OL WANTOK LES NA I GO LONG BEK DUA

MI LES PINIS LONG KROS BILONG TUPELA MI PELA I GO.

JOHN KROS WANTAIM I GO INSAT LONG HAUS NA LUKIM OLSEM OL LAIN I GO PINIS.

HA! KANDERE!..... DUA OP I STAP? HA! KANDERE!

JOHN KIRAP PAITIM PINIKI.

WAN WIK BIHAIN.... JOHN KISIM WANPELA PAS I KAM LONG KANDERE BILONG EM.

PAS I TOK..... JOHN RAUSIM PIPA MERI BILONG YU. EM SEMIM MI NOGUT TRU, EM MAS BAIM MI.

BAI MI WOKIM WANEM NAU YA?

Winfield 25'S

GOVERNMENT WARNING - SMOKING IS DANGEROUS TO HEALTH



pes 4



Moresby Theatre Group

presents

I'll Be Back Before Midnight!

by Peter Colley

The Waigani Arts Centre

1st - 4th; 8th - 11th
Gala Nights

March — 7.30pm
1st and 8th

Tickets: **SOFT TOUCH,**
and **THE THEATRE**

BRIAN BELL PLAZA
K7.50 adults — K4.00 children

Directed by: Shirley Corke



*The **BENSON** and **HEDGES** Company*

proudly supports the
Moresby Theatre Group

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.